


Am




Ex Bibliotheca
majori Coll. Rom.
Societ. Jesu

III. 12. c

III III
14 15
D D





81.25.4.13

SERMON DV VOILE DE MOYSE, SVR

2. I. Cor. 3. 13. 14. 15. 16.

*Avec deux autres Sermons sur
les textes suiivans.*

Par M. AMYRAVT.



A SAVMVR,


Par JEAN LESNIER, Imprim
meur & Libraire.

M. DC. LL

THE
JOURNAL OF THE
ROYAL ANTHROPOLOGICAL INSTITUTE
OF GREAT BRITAIN AND IRELAND

Volume 100, Part 1, 2000
January 2000

THE JOURNAL OF THE



Published by the Royal Anthropological Institute

1, BEDFORD SQUARE, LONDON, WC1R 4EJ, UK

Telephone: +44 (0)20 7612 9800

Fax: +44 (0)20 7612 9801

Internet: <http://www.raninstitute.org.uk>



A MADAME
MADAME
LA
BARONNE
DE
VILLARNOVL



ADAME,

*Ceux qui doivent
en diuers lieux, & à diuerses
personnes, se trouvent en beau-*

EPISTRE.

coup de peine quand ils sont pressés par leurs creanciers. Les mauvais payeurs cherchent des fuites & des détours ; au lieu que ceux qui sont de bonne foy reconnoissent leurs dettes franchement, & n'ont ordinairement recours sinon aux prieres qu'on patiente, & aux promesses qu'ils font qu'on n'y perdra iamaïs rien. Que s'ils ont à faire à des gens qui les sollicitent un peu vivement, ils taschent à les contenter par des intersts, & à les adoucir par des presens, & mesmes à gagner par ce moyen là ceux qui ont du pouuoir sur leurs esprits, afin d'obtenir par leur interuention quelque delay, pour débarrasser leurs affaires.

EPISTRE.

Outre les autres labours à la production desquels ie me suis engagé enuers le Public, il y a maintenant iustement trois ans, MADAME, que ie promis la *Morale Chrestienne* à Monsieur vostre mary. Depuis ce temps là ie n'ay pas eu l'honneur de le voir une fois, ny de receuoir de ses lettres, qu'il ne m'ait ramentû cette promesse, & qu'il ne m'ait poursuiui avec une ardeur incroyable à l'execution de ce dessein. Et bien que ie ne me plaigne nullement de sa ciuilité, que tout le monde reconnoist extraordinaire, ie vous aduoüe pourtant qu'il agit comme s'il auoit peur que ie deuienne enfin insoluable

EPISTRE.

à son égard. Chacun sçait, MADAME, que ie suis de bonne volonté, & les diuers ouurages qui sont sortis de ma main depuis ce temps là, nonobstant les indispositions qui m'ont trauaillé, doiuent auoir donné cette opinion aux honnestes gens, que si Dieu me fait la grace de viure, ie tascheray de les contenter. Et quand ie dcurois manquer à quelcun, les obligations que i'ay à Monsieur vostre mary, le ressentiment que i'ay de l'honneur de sa bonne volonté, la veneration que i'ay pour son incomparable vertu, & la chaleur mesme qu'il témoigne en cette occurrence, & qui montre combien il a les vertus &

EPISTRE.

Chrestiennes & Morales en recommandation, m'ont fait prendre la resolution de donner tellement ordre à mes affaires, moyennant la grace de Dieu, que quand ie sortirois de cette vie, on trouueroit dans mon cabinet de-quoy luy faire connoistre qu'il a eu un homme de bien pour son debiteur. Si cette sorte de pieces n'auoyent point à passer par les mains des Imprimeurs pour auoir cours parmy le monde, ie serois déjà quitte de cette dette, au moins pour une bonne partie, si ce n'estoit pour le total. Mais ils ont eu tant d'autres occupations d'ailleurs, & maintenant encore leurs Presses sont tellement em-

EPISTRE.

*peschées, qu'il m'est impossible de
 m'en servir pour mettre mon pa-
 yement en estat. Cela me fait
 craindre l'impatience de mon
 creancier, & m'oblige de recou-
 rir à vous, MADAME, pour
 vous supplier tres-humblement
 qu'il vous plaise de vous emplo-
 yer à m'obtenir un peu de répit.
 Il est vray qu'ayans mesmes in-
 terests, & vous accordant com-
 me vous faites parfaitement bien
 en toutes choses, vous aués enco-
 re en cecy pareilles inclinations.
 Vous aués mesmes fait de ma
 promesse une affaire de vostre
 famille, & destiné le fruit que
 vous attendés de son accomplit-
 sement, au bien & à l'éducation*

EPISTRE.

de Messieurs vos enfans. Tellement qu'après les premières teintures de la piété & de la vertu, que vous leur aués données avec un soin incestimable, vous leur aués fait espérer qu'à mesure qu'ils croistront, ils auront de quoy s'y former entièrement à l'aide de cette Morale. Cela donc me donneroit occasion de douter si ie vous trouuerois plus fauorable que Monsieur de Villarnoul, n'estoit que les presens ont quelque efficace enuers toutes sortes de personnes, & que ie vous en ay choisi un qui est tout à fait selon vos affections. Ce sont trois Sermons, MADAME, que j'ay faits en cette Egli-

EPISTRE.

Je depuis peu de temps, & qu'a-
pres les auoir conceus dans une
meditation passagere, & pro-
noncés en suite de viue voix, i'ay
recucillis & fixés sur le papier à
la priere de plusieurs personnes,
& puis donnés à l'Imprimeur
pour les mettre en quelque estat
de vous estre présentés. Si vous
ne regardés qu'au volume, & si
vous ne les estimés que par ce
qu'il y peut auoir de moy, le pre-
sent est fort petit, & de peu de
consideration. Aussi ne prtens-
je pas ny de le faire passer pour
un acquittement entier de ma
dette, ny mesmes de le vous im-
puter en diminution du sort prin-
cipal. Je vous en donne icy une

EPISTRE.

*nouvelle reconnoissance, & que
 ie ne defalque rien par là de tou-
 tes les obligations que Monsieur
 vostre mary & vous aués acqui-
 ses sur moy. Mais neantmoins ie
 ne doute nullement que vous n'y
 consideriés la matiere de mon ou-
 vrage, qui en surpasse infini-
 ment la façon. Car encore qu'elle
 ne soit point de moy, mais de l'A-
 postre S. Paul, qui me l'a four-
 nie toute entiere, si est ce que les
 ouvriers qui travaillent sur une
 matiere excellente, ont ordinai-
 rement ce bonheur, que le prix
 de la chose en donne aux traits
 de leur burin & de leur ciseau.
 De sorte que les belles connois-
 sances de la religion qui sont en*

EPISTRE.

Vous, vous donāt & la faculté de
 bien iuger des sujets de cette natu-
 re, & l'inclination à les estimer,
 il ne se peut faire que la dignité
 de celuy que i'ay entrepris, ne
 répande sur ce liure quelque air
 de grace & de beauté qui le vous
 rendra bien agreable. Je ne di-
 ray rien du respect & de l'affe-
 ction avec laquelle ie le vous of-
 fre, parce que ie vous ay déjà dit
 que c'est pour mō interest. Car ie
 vous veux, s'il vous plaist, em-
 ployer à ralentir un peu la vi-
 gueur des poursuites de Mon-
 sieur de Villarnoul, iusques à ce
 que i'aye satisfait à quelque au-
 tre creance qui est de plus ancien-
 ne datte que la sienne, & qui par

EPISTRE.

consequent à quelque hypothe-
que deuant luy. Toutesfois,
MADAME, quand cela ne se-
roit point, ie vous aurois choisie
pour mettre vostre nom à la teste
de cet Ecrit, afin que tous ceux
qui le verront sachent, qu'en pie-
té enuers Dieu, en devoirs enuers
Monsieur vostre mary, en ten-
dresse enuers tous vos enfans, en
soin de les éleuer aux choses dig-
nes de leurs ayeuls & de leur
naissance, en douceur, en mode-
stie, & en toutes autres bonnes
qualités, i'estime que vous tenés
un tel rang en vostre condition,
qu'il y en a peu d'exemples qui
vous y soyent comparables. Je
me reposeray donc sur une si puis-

EPISTRE.

*santé intercession que doit estre la
vostre, & neantmoins ie vous
asseure que ie n'en abuseray pas
au delà de la raison. Desormais,
s'il plaist à Dieu favoriser mes
resolutions, ie ne preuoy plus
d'autre retardement à mon des-
sein, ny à vostre commun con-
tentement en cet égard, sinon de
quelque peu de mois seulement,
que l'Imprimeur se promet de
pouuoir deliurer sa Presse d'un
ouurage sur quoy elle roule.
Durant lequel temps ie me suis
proposé de ne mediter & de n'é-
crire autre chose que la Morale
de Iesus Christ. Mais cette let-
tre est desormais bien longue pour
la dedicace d'un Liure, de sorte*

EPISTRE.

que ie n'y adjoſteray rien ſinon
que cependant ie prieray Dieu
de tout mon cœur qu'il vous con-
ſerve tres-long temps. Mon-
ſieur de Villarnoul, & vous
à luy, & vous deux à cette bel-
le, & noble, & nombreuſe fa-
mille de laquelle il vous a benits,
en vous comblant tous enſemble
d'une entiere proſperité. C'eſt,

MADAME,

Votre tres-humble & tres-
obeiſſant Seruiteur,

AMYRAVT.

De Saumur ce 5. de
May 1651.



ERRATA.

Pag. 51. lin. 2. lisés, la mettiés pag. 81. lin.
22. lisés. correspondance. pag. 105. lin. 17. li.
fés. adressée. pag. 149. lin. 13. lisés, ceux qui.
pag. 172 lin. 17. lisés. faits. pag. 223. lin. 10.
lisés, y fait pag. 224. lin. 10. lisés, repeté,
pag. 262 lin. 10. lisés, lisions.

SER



S E R M O N

SVR CES PAROLES

DE S. PAVL,

². Cor. chap. 3. v^s. 13. 14. 15. 16.

*Nous ne sommes point comme
Moysè, qui mettoit un voile
sur sa face, à ce que les enfans
d'Israel ne regardassent à la
consommation de ce qui de-
uoit prendre fin.*

*Parquoy leurs entendemens sont
obscurcis : car iusques à ce
jourd'huy ce mesme voile de-
meure en la lecture de l'An-
cien Testament, sans estre
osté : (lequel est aboli par
Christ.)*

*Ains iusqu'à ce iourd'huy quand
on lit Moysé, le voile de-
meure sur leur cœur.*

*Mais quand il se conuertira au
Seigneur, le voile sera osté.*



RERES BIEN-AI-
MÉS EN NOSTRE
SEIGNEUR:

Qui considerera com-
me il faut la façon dont les A-
postres de Iesus Christ ont an-
noncé son Euangile, ne trouuera
point de difficulté à comprendre
la raison pourquoy S. Paul dit
icy qu'ils ne font pas comme
Moysé, qui mettoit vn voile sur
son visage. Car ils nous ont ra-
conté l'histoire de la naissance,
de la vie, & de la mort de nostre
Seigneur si clairement; ils nous
ont rendu si hautement témoi-

gnage de sa resurrection d'entre les morts; ils nous ont parlé si ouuertement de son ascension au Ciel, & de l'enuoy de son Esprit sur ses disciples en la terre; ils nous ont enseigné la doctrine de la Iustification par la foy, & de l'efficace de la Grace en nostre sanctification, & de l'esperance de l'immortalité bienheureuse, en termes si intelligibles; en vn mot, ils nous ont si magnifiquement déployé deuant les yeux les secrets du royaume des cieux, & ont mis dans vne si pleine euidence toutes les verités qui concernent le salut, qu'il ne se peut rien ajouster à la clarté de leur traditue. Tellement que c'est à tresbonne raison que S. Paul dit, que *si leur* 2. Cor.
Euangile est couuert, il est couuert 4 3. 4.
à ceux qui perissent; En qui le Dieu
de ce siecle a auenglé les entende-

mens, à ce que la lumiere de l'Evangile de la gloire de Christ ne leur resplendist. Mais cela n'empesche pas, mes freres, que si vous venés à considerer quelques passages de leurs écrits en particulier, il ne s'y rencontre quelquesfois de telles difficultés, qu'on a peine en les lisant à s'empescher de soupçonner que de propos délibéré ils y ont en quelque sorte voilé leur intention & l'intelligence de leurs pensées. Le passage que vous venés d'ouïr nous en peut fournir vn bel exemple. Car ie m'asseure qu'en l'écoutant à mesure que ie le lisois, vous y aués trouué de l'obscurité; & ie me persuade mesmes que quand dans vostre cabinet vous l'examineries avec plus de loisir, & plus d'application d'esprit qu'une lecture volante & passagere n'en peut ou donner ou per-

mettre, vous n'en remporteriez pas pourtant vne entiere satisfaction. Au moins certes les interpretes & les commentateurs y ont ils de fort differens sentimens, entre lesquels il n'est pas aisé de choisir; ce qui est vne marque ordinaire de la difficulté d'une sentence. De sorte que cette pensée pourroit bien venir en l'esprit de quelques vns, que S. Paul se fust bien expliqué plus clairement s'il eust voulu, & qu'il a eu quelque dessein dans l'obscurité de ses termes. En effect, il est d'un costé besoin d'exciter par fois extraordinairement l'attention de nos entendemens à rechercher & à approfondir le sens de ces diuins Ecriuains; & de l'autre, ces endroits de l'Ecriture où nous sentons reboucher la pointe de nos esprits, seruent à nous apprendre la modestie &

l'humilité, en reconnoissant qu'il y aura toujours dans la Parole de Dieu, quelques choses qui passeront nostre portée. De forte que pour auoir vne parfaite connoissance de tout ce qui est contenu dans le Vieil & dans le Nouveau Testament, il faut attendre que nostre Seigneur, par la splendeur de son apparition, nous donne des illuminations dont nos ames ne sont pas encore capables. Neanmoins, comme vous voyés que S. Paul dit que le voile qui empesche les Iuifs d'appercevoir la gloire de Dieu, laquelle reluist en la face de nostre Seigneur Iesus Christ, n'est pas sur l'Euangile, qui desormais nous est reuelé tres-clairement, mais qu'il est sur le cœur des Iuifs mesmes, & qu'il consiste en l'endurcissement de leurs entendemens, ie croy que l'obscurité de la

pluspart de ces passages que nous estimons difficiles en l'Ecriture, n'est pas tant en eux-mesmes, qu'en nostre propre infirmité. Mais il reste toujors en nous quelque chose des anciennes tenebres de nostre nature, & mesmes quelques preiugés dont nos esprits sont preuenus de longue-main, qui nous empêchent d'y trouuer l'euidence & la netteté qu'indubitablement nous y trouuerions autrement. Si donc par l'Inuocation du nom de Dieu, & par vne consideration tres-attentive de la chose mesme, nous dissipions ces tenebres dont les yeux de nostre intelligence sont naturellement offusqués, nous en remporterions beaucoup plus de contentement que n'a de coustume de nous en donner vne meditation foible & languissante. C'est ce qui fait que ie me pro-

pose aujourd'huy , moyennant la grace de Dieu , d'examiner ce passage bien soigneusement, autant que le temps destiné à ces actions le pourra souffrir. En quoy mon intention est de servir premierement à vostre commune edification & consolation. Car toutes ces choses ont esté écrites afin que par patience & consolation des Ecritures, nous ayons esperance. Puis apres, ie desire donner quelque satisfaction à ceux qui consacrent leurs estudes à l'intelligence plus exacte de la Parole de Dieu, pour la pouuoir expliquer aux autres.

L'histoire à laquelle S. Paul regarde en cet endroit, se trouue au trantequatrieme chapitre de l'Exode. Là il nous est raconté qu'apres que Moysé par vne sainte indignation eut rompu les Tables de l'alliance que Dieu

SERMON I. 9

luy auoit données, parce que le peuple d'Israel auoit fondu & adoré le veau d'or; & qu'il eut intercedé pour le peuple & apaisé le colere de l'Eternel, il fut obligé par le commandement du Seigneur de remonter dans la montagne, pour y receuoir ses instructions & ses lois. Il y demeura donc quarante iours & quarante nuits, *sans manger du pain, ny sans boire de l'eau*, comme l'Ecriture parle, c'est à dire, sans prendre aucune chose pour sa nourriture, ny pour son breuillage; la puissance & la bonté de Dieu le soustenant miraculeusement. Dans cette longue & étroite communication qu'il eut avec Dieu, son visage deuint resplendissât par quelque impression de lumiere, dont il ne s'apperçeut point alors pourtant; de sorte que quand au bout des quarante

iours il descendit de la montagne, ayant en sa main deux autres Tables de la Loy, lesquelles Dieu auoit gravées de son doigt, il ne sçauoit point qu'il eust la face rayonnante. Mais Aaron, & les enfans d'Israël qui l'attendoient en bas, luy firent incontinent connoistre qu'il auoit en sa personne quelque chose d'extraordinaire. Car quand ils vinrent à l'envisager, & qu'ils apperceurent les rayons que sa face iettoit de toutes parts, ils n'en peurent soustenir l'éclat, & en partie à cause de l'éblouissement que cela caufoit à leurs yeux, en partie à cause de l'estonnement qu'il produisoit dans leurs ames, ils se destournerent de luy. Ce que Moyse ayant reconnu, il mit vn voile sur son visage, afin de couvrir & de rabâtrer la splendeur qui en éclattoit, & de pouvoir executer

la charge que Dieu luy auoit donnée, en rappelant Aaron & les Isrélites à foy. Ils revinrent donc, & puis il leur declara toutes les choses que l'Eternel luy auoit dites en la montagne. Or est il remarqué expressement en l'histoire, que pendant tout le temps que Moysé estoit hors de la presence de Dieu, & qu'il conuersoit avec les Israélites, il se couvroit toujours de ce voile : mais que quand le temps venoit de remonter au coupeau de Sinaï, où Dieu estoit, il ostoit le voile de dessus son visage, & se presentoit ainsi la face découverte à l'Eternel.

Ces choses là, mes Freres, comme presque toutes les autres qui ont eu quelque merueille dans le ministère de ce personnage, doiuent estre considérées en diuers égards. Car premierement, parce que c'estoit vn miracle,

qui auoit esté produit immédiatement par la puissance de Dieu, il seruoit à l'illustration de sa gloire, & à autoriser de plus en plus la vocation de son seruiteur; & il deuoit seruir à confirmer les Israelites dans cette creance, que c'estoit le vray Dieu qui les auoit tirés d'Egypte, & qui prenoit le soin de leur conduite, pour en esperer d'autant plus fermement l'accomplissement de ses promesses, & la protection de sa main. Apres cela, ils en pouoyent tirer cet enseignement, que quiconque s'approche de Dieu avec la pieté & la reuerence qui est deuë à sa Majesté glorieuse, en remporte quelque communication de gloire, & quelque illumination. Car non seulement *c'est par deuers luy qu'est la source de la vie*, comme il est dit au Pseaume XXXVI. mais *c'est*
aussi

aussi par sa clarté que nous voyons clair. Et comme vous chantiés tantost, que qui le regardera, s'en trouvera tout éclairé, qui taschera de le contempler attentivement des yeux de l'ame, en tirera des lumieres & des connoissances, qui non seulement enrichiront & perfectionneront admirablement son intelligence, mais mesmes qui pourront profiter à l'instruction de ses prochains. S. Paul, au septieme verset de ce mesme chapitre, en tire ce particulier endoctrinement. C'est que par là Dieu vouloit faire paroître que le ministere de la Loy, dont Moyse estoit comme le chef & l'interprete, estoit vne chose digne d'une singuliere estime, & d'une grande veneration. Si, dit-il, le ministere de mort, qui est écrit en lettres, & engravé en pierres, a esté glorieux, tellement que les en-

fans d'Israël ne pouvoyent regarder en la face de Moÿse, pour la gloire de sa face : comment ne sera plustost glorieux le ministère de l'Esprit ? En effect, quoy qu'il y ait eu de grands Patriarches, & de grands Prophe-tes pendant le cours de l'ancien-ne économie, iusqu'à l'advene-ment de Christ, si est-ce qu'il n'y eut iamais aucun d'entr'eux à qui il soit advenu vne chose si glorieu-se. Mais la principale & la plus pre-cise consideration qu'on en doit faire, est qu'il y auoit en cela quelque representation symboli-que d'autres choses de plus gran-de consequence, qui deuoyent arriuer puis apres. Car si S. Paul, au dixieme chapitre de la premie-re aux Corinthiens, nous aduer-tit si expressément que toutes les choses qui sont arrivées au peu-ple d'Israël au desert, ont eu quelque signification figuratiue

de ce qui regardoit l'accomplissement des temps , que deuons nous penser de ces accidens si memorables aduenus au plus excellent personnage des Israélites, & que Dieu auoit choisi pour estre leur Legislatteur, & le Mediateur entre luy & eux ? Mais quand S. Paul ne nous auroit point donné cet aduertissement general, que nous pouuons étendre & appliquer à quantité d'autres choses, la consideration qu'il fait de de celle-cy en cet endroit nous autoriseroit à en auoir cette opinion.

Partant, mes Freres, pour vous en donner vne interpretation generale, iusques à ce que ie la particularise d'auantage, vous pouués considerer dans ces paroles de l'Apostre, premierement la chose mesme qu'il dit, c'est que Moysè mit vn voile sur son

visage : puis apres la cause pour-
quoy il dit qu'il le fit ; à ce que
les enfans d'Israel ne regardas-
sent pas à la consommation de
ce qui deuoit prendre fin. Or
pour ce qui est de la chose mes-
me , l'Apostre nous y donne assés
d'ouuerture dans le propos pre-
cedent , & dans ses autres écrits.
La splendeur du visage de Moyse
est le type de la doctrine de l'E-
uangile , qui seule est la lumiere
sous la conduite de laquelle on
peut paruenir à salut. Le voile
dont il la couurit est la figure de
la Loy. Or l'Apostre nous en-
seigne que l'Euangile est la fin à
laquelle la Loy a tendu. Car
Christ est la fin de la Loy en Iustice
à tout croyant. Et de fait la Loy
ne fut iamais instituée de par
Dieu sinon à dessein de la faire
seruir à l'Euangile. De plus , le
mesme Apostre nous enseigne

Rom.

10. 4.

dans le propos qui precede celuy que ie vous explique maintenant, que la Loy a deu prendre fin, & que l'Euangile a deu estre permanent. *si*, dit-il, *ce qui denoit prendre fin a esté glorieux*, ce qu'il entend du ministere legal; *ce qui est permanent est beaucoup plus glorieux*; ce qu'il entend du ministere de l'Euangile. Et cela conuient parfaitement bien à la condition des legislators de ces deux Aliances. Car il a esté vn temps que Moyse n'estoit point; & il en a esté vn autre que Moyse n'a plus esté. Ainsi la Loy a commencé bien long temps apres la creation du monde, & a deu finir bien long temps deuant la consommation des siecles. Mais quant à l'Euangile, il a commencé dès la cheute du premier homme, & ne finira point à perpetuité, comme nostre Seigneur

Iesus est deuant les siecles, & demeure à toute eternité. C'est pourquoy l'Apostre dit, que *Iesus*

Heb 13.

8.

Christ a esté le mesme hier, & aujourd'huy, & l'est aussi eternellement.

Les enfans d'Israel donc estant empeschés par le voile de voir la splendeur du visage de Moyse, ont esté empeschés par la Loy de voir l'Euangile de Christ, & ainsi n'ont pas regardé à la fin de ce qui deuoit estre aboli. Car encore que ces paroles, *à ce qu'ils ne regardassent à la consommation de ce qui deuoit prendre fin*, puissent receuoir vn bon sens, cette autre façon de parler, *regarder à la fin de ce qui deuoit estre aboli*, est beaucoup plus claire à mon aduis, & plus accommodée aux termes employés dans l'original. Pour ce qui est de la cause pour laquelle Moyse a mis le voile sur son visage, il semble, comme nostre

version tourne ce passage, que Moyse l'ait fait expressement à dessein d'empescher que les enfans d'Israel ne peussent voir la lumiere qui en sortoit. Car ce terme, *à ce que*, designe ordinairement le but que nous nous proposons en quelque chose. Et neantmoins diuerſes raisons nous obligent à croire qu'il vaudroit mieux tourner ainsi : *à cause que les enfans d'Israel ne regardoyent pas*, c'est à dire, ne pouuoient regarder, ou dresser les yeux vers la fin de ce qui deuoit estre aboli. Car la particule grecque qui est dans l'original, a quelques fois cette signification, mesmes en l'Euan-gile. Comme quand nostre Seigneur dit aux Iuifs que c'est *à cause* de la dureté de leur cœur que Moyse leur a permis de repudier leurs femmes, ce mot y est employé. Et l'histoire mesme, ainsi

Matth.
19. 8.

que Moyse la nous raconte, veut que nous le prenions ainsi. Parce que Moyse ne sçauoit pas que son visage fust resplendissant, lors qu'il descendit de la montagne, voila pourquoy il descendit le visage decouvert. Et si les Israelites en eussent peu soutenir l'éclat, il ne se fust pas aduisé de se couvrir d'un voile. Mais quand il vid qu'Aaron & le reste du peuple se détournoit, comme ayant crainte de son aspect, alors il s'apperceut de ce que c'estoit, & recourut a ce voile. A quoy vous pouvés joindre la consideration de la chose même que ce type là representoit. Car Dieu n'a pas couuert les doctrines Euangeliques de l'obscurité de l'alliance legale, pendant le temps de l'ancienne économie, à dessein d'empescher le peuple d'Israël de les appercevoir. Mais par ce que

le peuple d'Israël n'estoit pas encore alors capable de les recevoir, & d'en supporter la splendeur, si on les luy eust mises tout à nu deuant les yeux de l'entendement, il a falu pour condescendre à l'infirmité des Juifs, que Dieu les leur ait fait ombrager de toute cette ancienne dispensation dont Moyse a esté le Mediateur & le Ministre. Et nous verrons cela tantost Dieu aidant plus particulièrement. En fin, l'Apostre mesme nous leue icy toute difficulté par les paroles que ie vous ay tantost rapportées du septieme verset de ce mesme chapitre; où il dit, que *les enfans d'Israël ne pouvoient regarder en la face de Moyse.* Tellement que c'est la foiblesse de leurs yeux qui a esté cause que Moyse en a vsé de la façon. Vous voyés donc desormais quelle est l'intention de S. Paul



dans les paroles du premier verset de ce texte. C'est que luy & ses compagnons en l'Apostolat, ne font pas comme Moÿse, qui mettoit vn voile sur son visage, parce que les enfans d'Israël ne pouuoient supporter l'éclat de la lumiere qui en iaillissoit; en quoy il donnoit assés à entendre quelle deuoit estre la methode de son ministere, en ce que par le moyen de l'alliance legale il obscurciroit la splendeur des lumieres & des verités vrayement salutaires, d'autant que les entendemens de ce peuple là n'estoyent pas en estat qu'on les leur monstraist tout à decouvert. Car quant aux Apostres, ils ont presché l'Evangile si clairement, que leur predication n'a esté ombragée d'aucun nuage de doctrines estrangeres & de ceremonies legales. Mais ie croy, Fres bien-aimés, que vous

attendés de moy vne consideration vn peu plus attentive de ces mysteres , pour l'explication plus exacte tant de ce verset que des suiuaus.

Si vous examinés bien l'histoire de Moyse, vous trouuerés qu'il a eu trois relations merueilleusement considerables. L'vne est, qu'il a esté l'vn des plus reconnoissables types qui ayent figuré nostre Seigneur, en ce que l'vn a esté Mediateur de l'alliance legale, & l'autre de l'alliance Euangelique. La seconde est, qu'il a esté le chef du ministere de la Loy, de sorte que ceux qui sont venus depuis pour l'expliquer & pour l'inculquer, n'ont rien fait sinon suivre ses traces, & la tablatüre qu'il en auoit donnée dans ses écrits & dans sa façon d'agir. La troisieme est, qu'il a esté Mediateur du peuple d'Israël enuers

Dieu, pour faire & pour dire de la part de la Nation ce qui estoit necessaire. Or y a-t-il dans cette belle histoire de la resplendeur de son visage, & de l'action qu'il fit en mettant vn voile dessus, & de ce qu'apres l'auoir porté en conuerſât avec Israël, il l'ostoit quand il luy falloit retourner dans la montagne, diuerſes belles observations à faire, qui se rapportēt à ces trois differētes relations. Car pour ce qui est de la premiere, cette longue demeure de quarante iours dans la montagne, ſans qu'il y priſt aucune des choses qui ſeruent d'aliment & de breuvage aux hommes, a ſans doute quelque chose de mystereux. Cela ne s'estant peu faire ſinon par vn grand & ſigné miracle, ſa condition, tandis qu'il a communiqué avec Dieu, a esté ſurnaturelle, & tres-digné d'admira-

miration. Or qu'estimés vous que cela ait peu représenter sinon cette communication intime & non surnaturelle seulement , mais adorable & incomprehensible aux Anges mêmes , que nostre Seigneur Iesus a eüe de toute eternité avec son Pere, & à raison de laquelle S. Iean dit qu'il est *en son sein* ? Et ie ne doute nullement que S. Iean dans ce passage , *Nul ne vid onc Dieu ; le Fils Vnique, qui est au sein du Pere , luy mesme l'a déclaré* ; n'ait eu égard au rapport que ces choses ont entr'elles. Car il veut dire qu'encore que Moÿse ait eu cet auantage par dessus les autres Prophetes , d'auoir vne conuersation si familiere avec Dieu sur la montagne , qu'il a serui de type à celle que le Fils a eüe avec son Pere celeste, si est-ce qu'à proprement parler il n'a pas veu Dieu ; il n'y a que le seul Fils qui

C

se puisse glorifier de cette prerogative. A peu pres comme quand
 Jean 6. nostre Seigneur dit aux Juifs; *Ce
 3^{le} n'est point Moyse qui vous a donné
 le pain du ciel; mais mon Pere vous
 donne le vray pain du ciel*; il ne
 veut pas nier absolument que la
 Manne n'ait peu porter ce nom
 en quelque façon : mais il veut
 dire qu'elle ne le porte que typi-
 quement; au lieu que quant à luy
 il est la verité & la chose mesme
 qui a esté representée par le type.

Après cela, mes Freres, ce fut
 en cette conuersation avec Dieu
 que la face de Moyse deuint ra-
 yonnante, comme si elle eust tiré
 quelque participation de lumiere
 de la presence de celle de Dieu,
 qui est si radieuse & si pleine de
 splendeur & de Majesté, que les
 Anges mesmes sont contraints de
 couvrir leurs yeux, quand il vient
 à la reueler avec toute sa magni-

ficence. Or que signifie cela encore sinon que c'est de cette communication intime & essentielle que nostre Seigneur a eue avec le Pere celeste, qu'il a tiré ces admirables secrets du Royaume des cieux dont il a illuminé le monde habitable ? C'est pourquoy il dit que *sa doctrine n'est point sienne, mais de celuy qui l'a enuoyé.* Item; *qu'il ne parle point de par soy mesme.* Et derechef, *Que le Fils ne peut rien faire de par soy mesme, sinon qu'il le voye faire au Pere : Que le* Jean 7.
16. 7.
Pere aime le Fils, & luy demonstre Jean 5.
19. 20.
toutes choses qu'il fait ; à peu près comme s'il auoit esté dans l'école de son Pere, pour y apprendre toutes les choses qu'il deuoit enseigner icy bas. Parce que venant en qualité d'enuoyé & d'ambassadeur de son Pere, il falloit qu'il ne mist rien en auant qui fust comme de son cru, mais qu'il

rapporast tout ce qu'il faisoit & tout ce qu'il disoit , à celuy dont il tenoit la Mission & l'ambassade.

En troisieme lieu , l'histoire nous rapporte que Moyse ayant ainsi le visage rayonnant , descendit de la montagne : ce qui indubitablement a représenté la descente de nostre Seigneur Iesus des cieux en la terre. Car la montagne de Sinai , pendant tout le temps que Dieu y a séjourné pour la publication de la loy , & pour donner à Moyse la revelation de ses commandemens , a esté comme vn domicile de la Divinité, où elle habitoit , & où elle se manifestoit en gloire. Tellement qu'elle a esté fort propre pour représenter le Ciel qui est la demeure ordinaire de l'Eternel , où il est assis sur son trône en majesté , où il s'est eternellement communi-

qué à son Fils, & d'où il a toujours revelé ses lois & ses volontés aux hommes. Ainsi Moÿse descendant de la montagne, a esté vne figure bien expresse de nostre Seigneur Iesus Christ descendant du Ciel. Et ie ne sçay si nostre Seigneur n'a point quelque égard à cela quand il dit, que *per-* Iean 3.
sonne n'est monté au ciel, sinon celui ^{13.}
qui est descendu du ciel, à sçavoir le
Fils de l'homme qui est au ciel. Comme s'il vouloit dire qu'encore que Moÿse montast en la montagne, il ne montoit pas au ciel pourtant, & que par consequent il ne falloit pas attendre de luy la revelation des secrets du royaume des cieux. Mais qu'il la falloit attendre de celui qui encore qu'à proprement parler il ne fust iamaïs monté dans le ciel, estoit toujours dans le ciel pourtant, & demeueroit toujours dans le sein du Pere.

C'est aussi vne chose digne de consideration, que ce fut le visage de Moÿse qui deuint rayonnant, & non pas les autres parties de son corps. Car le visage est la partie de nos corps par laquelle nous iugeons de la presence les vns des autres, de sorte que les choses qui se font près de nous, si nous y auons le dos tourné, ne sont pas estimées estre faites deuant nous & en nostre presence. Et en cela cette sapience qui a gouverné tous ces euenemens, nous a voulu donner à entendre que ce deuoit estre la presence de nostre Seigneur Iesus Christ, & son apparition en chair, qui apportast la lumiere de l'Evangile au monde. Car comme

Heb. i.
1.

dit l'Apostre, Dieu auoit bien autrefois parlé à nos peres par les Prophetes à diuerses fois & en diuerses manieres. Mais les oracles dans

lesquels il auoit reuelé quelque chose des verités qui regardent le salut, estoient comme des étoiles qu'il auoit semées deçà delà dans le ciel de l'Ancien Monde, qui est le Vieux Testament. Mais le Nouveau ne pouvoit estre illuminé que par le leuer du Soleil de iustice, qui porte santé en ses ailes. Aussi voyés vous que l'Apostre se sert de ces termes au chapitre qui suit immédiatement celuy-cy. *Dieu qui a dit que la lumiere resplendist des tenebres, est celuy qui a reluy en nos cœurs, pour donner illumination de la connoissance de la gloire de Dieu laquelle est en la face de Iesus Christ.* Où il fait vne manifeste allusion à l'histoire de Moyse, la splendeur du visage duquel a esté vne representation de cette gloire éclattante des vertus de Dieu qui resplendit de la presence du Seigneur Iesus, quand il parut au monde.

2. Cor.
4. 6.

Et c'est bien encore vne chose digne d'estre remarquée en cinquieme lieu, qu'encore que Moyse eust le visage ainsi lumineux, il n'en sentoît rien pourtant, & ne s'en apperceuoit point, iusques à ce que l'ébloüissement & l'auersion des Israélites le luy firent reconnoître. Car c'est à dire qu'encore qu'il eust receu cette impression de clarté par la puissance de Dieu, si est-ce que la chose ne luy estoit non plus sensible que si elle eust esté naturelle: comme vous sçaués que les choses naturelles ne se sentent pas, & aucun ne sauroit quel est le teint que son visage a apporté du ventre de la mere, s'il est blanc ou s'il est noir, s'il est sombre ou éclattant, s'il ne s'estoit regardé dans vn miroir, ou s'il n'en auoit esté aduertî par vn autre. Et cela sans doute a esté ainsi dispesé pour signifier qu'en-

core que le Seigneur Iesus ait eu la reuelation des secrets du royaume des cieux, de la communication qu'il a eüe avec le Pere celeste, si est-ce que la connoissance luy en estoit naturelle, & qu'il ne l'auoit pas ny acquise par travail & par meditation d'esprit, ny receuë par cette sorte d'inspirations qui ont esté enuoyées aux autres Prophetes. Mais comme le Pere luy a tellement communiqué son essence par vne generation eternelle, que cependant il est Dieu de sa nature, sans auoir eu de commencement : ainsi le Pere luy a donné la participation de ses secrets d'une façon si admirable & si incomprehensible, que la connoissance qu'il en a est eternelle, & aussi ancienne que celle que le pere mesme en auoit. Aussi voyés vous comment nostre Seigneur Iesus reuele ces admira-

bles myſteres. Tous les autres hommes du monde qui veulent dire quelque choſe de grand , ſoit qu'ils ſ'y portent d'eux meſmes, ou qu'ils y ſoyent obligés par les difficultés qu'on leur propoſe, & les queſtions qu'on leur fait, font paroître dans l'attention extraordinaire qu'ils y apportent, & dans l'effort de leurs eſprits, que quelque profonde que ſoit leur ſapience, ſi eſt ce qu'ils y ont quelque peine, ou qu'au moins ils reconnoiſſent que leurs entendemens ſont bornés. Au lieu que notre Seigneur Jeſus déploye en ſes propos toutes fortes de merveilles, répond à toutes queſtions pour difficiles qu'elles ſemblent eſtre, reſout toutes difficultés pour arduës & insolubles que les hommes ſe les imaginent, prédit toutes fortes d'euenemens à venir, pour éloignés qu'ils puiſ-

sent paroistre , & enueloppés d'obscurité , avec vne facilité si admirable , vne netteté si incomparable , vne certitude si infaillible , que vous iugés aisément à l'oïr parler , qu'il tire ses propos & ses réponses d'une source inepuisable de sapience , & d'un tresor qui n'a ny rive ny fond.

En fin, l'histoire nous raconte que quand Moyse vint à se présenter deuant Aaron & le reste des Israélites, ils se détournèrent de luy, parce qu'ils ne pouuoient supporter l'éclat de la lumiere de son visage. Ce qui contient vne belle representation de ce qui est arriué à nostre Seigneur Iesus, lors qu'il s'est présenté au peuple des Iuifs. Les Souuerains Sacrificateurs , les Anciens , & les gouuerneurs du peuple , & le reste de la nation, ont détourné leur veüe de dessus luy ; parce

qu'ils n'ont peu supporter ny la lumiere de sa doctrine, ny la gloire de ses actions, & que cela donnoit de l'éblouissement à leurs yeux, & cauſoit des paſſions d'enuie & de ialouſie dans leurs ames. Car ie vous prie, mes Freres, qu'eſtce qui a empesché ce miſerable peuple de le contempler, & de tirer vn merueilleux contentement de ſa preſence, & vne illumination ſalutaire de ſes diuines inſtructions, & des operations miraculeuſes qui ſortoyēt continuellement de ſes mains, ſi non qu'ils auoyent les yeux de leurs entendemens trop foibles, & offuſqués de trop mauuais preiugés, & que d'ailleurs ils auoyēt le cœur rempli d'œuures & de penſées de tenebres, que cette lumiere vouloit diſſiper? Auffi voyés vous que le Seigneur ne s'appelle preſque point autrement

ment que de ce nom de Lumiere, & qu'il n'impute quasi l'incrédulité des Juifs à autre chose sinon qu'ils haïssoient la lumiere, parce qu'elle les conuainquoit d'ignorance & de meschanceté. Venons maintenant au second égard auquel nous auons dit que Moyse deuoit estre considéré.

I'ay dit qu'il estoit le chef du ministère legal, comme de fait c'est luy dont Dieu s'est serui pour établir toute cette ancienne économie. C'est à luy qu'il a donné le patron du Tabernacle; c'est luy qui a presidé sur la construction qu'on en a faite selon le modèle qui luy en auoit esté baillé. C'est luy qui a consacré les sacrifices, & ordonné les sacrifices; c'est luy qui a donné la description de tout ce seruice ceremoniel auquel la religion sembloit consister. Il a établi les loix qui con-

cernoyent la police, il a institué les Iuges, & donné les ordres qu'il falloit fuiure dans les Iugemens. Il a esté le porteur des deux Tables de l'alliance, & quoy que celles qui sont demeurées en deposit dans l'Arche fussent écrites de la main de Dieu, elles auoyent pourtant esté faites par celles de son seruiteur. Il a en fin redigé toutes ces choses par écrit, & a laissé ses livres aux Israélites comme vn memorial eternal de la bonté de Dieu enuers eux, comme la reigle de leur conduite iusques à la venuë du Messie, & comme l'invariable fondement sur lesquelles Prophetes qui viendroyent apres, edifieroyent leur predication, & à la forme duquel ils ajusteroyent l'administration de leurs revelations & de leur charge parmy ce peuple. Et c'est pour cela que la Loy est ap-

pellée de ce nom de Moyse au Nouveau Testament. *Quant à* Act. 15, *Moyse*, dit S. Iacques au XV. 21. chapitre des Actes, *il a d'ancienneté gens par chaque ville qui le preschent, veu que dans les Synagogues il est leu par chaque Sabbat. Et* Christ mesme : *Ils ont Moyse, &* Luc. 16. 29. *les Prophetes ; qu'ils les écoutent. Et derechef ; ils sont assis dans la chaire de Moyse :* c'est à dire, ou l'on enseigne Moyse, & la Loy, dont il a esté Mediateur. Et icy S. Paul, *Iusques à ce iourd'huy quand on lit Moyse, le voile demeure sur leur cœur.* Estant donc tel, & sa Loy estant ainsi appellée, il a esté souverainement convenable que ces memorables accidens qui sont arriüés à sa personne, ayant presenté aux yeux des hommes quelque image considerable de son ministere, & de la façon de laquelle il y deuoit agir. En ef-

fect, il est aisé d'y remarquer plusieurs excellemment beaux rapports. Car premierement, comme tandis que Moyse conversoit avec les enfans d'Israël, après que s^{on} visage fut devenu resplendissant, il y auoit en sa personne deux choses ; l'une estoit cette splendeur qui éclattoit de sa face, l'autre estoit le voile duquel il se seruoit pour se rendre accessible à eux ; dans toute cette économie legale il y auoit deux choses pareillement, qui se remarquent encore dans les livres de ce Prophete, à sçauoir les doctrines Evangeliques, & l'alliance de la Loy. De plus, comme la splendeur de son visage preceda l'usage du voile, dont il ne se seruit sinon quelque temps apres qu'il eut tiré cette impression de lumiere de la communication qu'il auoit avec Dieu, les verités Euan-

geliques ont de bien long temps precedé l'alliance de la Loy, qui, comme S. Paul le remarque au chapitre III. de l'Epistre aux Galates, n'est venuë sinon quatre cens ans apres la premiere Promesse qui fut donnée à Abraham. Et dans les liures de Moyse mesme ces choses ont esté écrites de telle sorte, que le recit de ces promesses où sont contenuës les semences de l'Evangile, se trouve dans le commencement de la Genese; au lieu que l'institution de la Loy ne se rencontre qu'aux livres suiuians. En troisieme lieu, comme le voile couvroit la splendeur du visage de Moyse, & empeschoit qu'elle ne s'apperceust, dans cette ancienne économie l'alliance legale estoit tellement étendue sur les verités Evangeliques, qu'on ne les apperceuoit pas, & encore maintenant dans

les livres de Moyse toutes les parties de la Loy offusquent les doctrines de la Grace. Et pour le vous monstrier en peu de paroles, vous sçavés que dès le XV. de la Genèse, il est dit *qu'Abraham a creu à Dieu, & que cela luy a esté alloüé à iustice.* Paroles dont S. Paul tire cet enseignement, non seulement qu'Abraham a esté iustifié par la foy, mais encore que tout le monde devoit estre iustifié de mesmes, tant les Iuifs que les Gentils, sans aucune exception. Ce qui est la doctrine de l'Evangile toute pure. Cependant, vous sçavés aussi que la formule de l'alliance legale est conceüe en ces termes; *Fay ces choses & tu vivras; &, Maudit est quiconque n'est permanent en toutes les choses de cette Loy, pour les faire; & que cela est inculqué en diuers endroits des livres de Moyse, & mesmes des*

Prophetes qui ont esté suscités depuis. Cela donc semblant mettre clairement la Iustification des hommes dans la sainteté des œuvres, & dans le parfait accomplissement des commandemens de Dieu, dites moy, Freres bien-aimés, ne semble-t-il pas auoir esté expressément ordonné de la façon pour couvrir la doctrine de la iustification par la foy, & pour en oster la connoissance aux Israélites? Cette parole ainsi prononcée vne fois à l'occasion d'une seule personne, & d'une seule action de son ame, par laquelle il auoit embrassé vne promesse de Dieu, sembloit-elle le deuoir emporter par dessus la formule d'une alliance solennellemēt contractée avec vne grande nation, & repetée si souvent tant à elle mesme, par le Mediateur, qu'à sa posterité, par le ministere des

autres Prophetes ? Moyse auoit requis des enfans d'Israël au nom de Dieu & par son commandement, qu'ils eussent à *circoncir leurs cœurs*, & auoit donné diuers autres enseignemens dont ils pouuoient recueillir que c'est le Culte interieur & de l'esprit qui seul est agreable à Dieu, & qu'il ne prend plaisir qu'à la vraye pieté du dedans, & à la pureté des pensées. Ce qui est proprement la doctrine de l'Evangile, qui nous apprend par la bouche mesme de son auteur, que comme *Dieu est esprit, il demande des adorateurs qui l'adorent en esprit & verité.* D'où vient aussi que S. Paul appelle la vraye pieté & sainteté des Chrestiens, leur *sacrifice raisonnable.* Et neantmoins ce mesme Moyse a institué par le commandement de Dieu tant de sacrifices, tant de lauemens, tant

Jean 4.

Rom.
12. 1.

d'oblations de choses corporelles & sensibles , tant d'observations de toutes sortes dans la loy ceremonielle , & recommandé ce service extérieur avec tant de soin , & par des promesses si authentiques , & des denonciations si redoutables , que vous diriez qu'il a voulu ensevelir ce qu'il auoit enseigné plus brièvement de la pieté du cœur , sous la multitude innombrable de ces institutions charnelles. Le Patriarche Iacob auoit prédit que le sceptre ne se departiroit point de Iuda , ny le législateur d'entre ses pieds , iusques à ce que Sçiloh vint , & auoit dit, *qu'à luy appartient l'assemblée des peuples.* Cela donnoit ^{49.} assés à entendre que ce Sçiloh ne seroit pas le dominateur d'une seule nation , puis que les peuples se deuoient assembler autour de luy , pour recevoir ses ordon-

Deut.

32.

nances. Moyse mesme s'estoit écrié, *Nations éionissés vous avec avec son peuple* ; ce qui estoit vn aduertissement assés clair que Dieu vouloit estre le Dieu de toutes les autres Nations aussi bien que du peuple d'Israël, & qu'il leur presenteroit quelque iour à tous vne mesme matiere d'éjouissance. Et neantmoins il establit luy mesme par le commandement de Dieu, vne loy Politique entre les Iuifs, qui estoit si particulièrement accommodée au genie de cette nation, & donnoit vne telle forme à son gouvernement, que comme elle ne se pouvoit ajuster avec les inclinations & l'estat des autres peuples, aussi sembloit-elle auoir esté donnée pour demeurer ferme & inuiolable à perpetuité. Et cela mesmes qu'il y predict, & qu'il y ordonne touchant l'establisement d'un Roy sur la nation

des Juifs, quand vne fois elle seroit introduite & affermie dans la possession de la terre de Canaan, semble deuoir estre tellement propre & particulier à cette contrée, qu'il ne peut bien convenir à aucunes autres regions. Cela donc ne semble-t-il pas auoir esté ordonné expressement pour étouffer la connoissance de la nature du regne du Messias, & pour empescher que ce peuple ne s'aperceust qu'il n'auroit pas plus de privilege à son advenement, que les autres peuples de la terre ?

Mais pour retourner à la consideration de ces rapports que nous cherchons, la splendeur du visage de Moyse estoit vne lumiere, & encore vne lumiere éclatante, puis qu'elle est appellée de ce nom de gloire par S. Paul. Et vous sçaués que c'est le propre de la lumiere, premierement dé-

clairer & de rendre toutes autres choses belles & visibles : Puis apres de réiourir, car il n'y a rien au monde de si agreable que cette belle clarté du soleil qui luit maintenant autour de nous : Et en fin d'échauffer & de viuifier; car c'est la lumiere du soleil qui porte avec soy cette chaleur laquelle donne la vie & le mouuement à toutes les choses du monde. Or ce sont là les propres qualités de l'Euangile de nostre Sauueur. C'est luy seul qui a éclairé nos entendemens de la connoissance du vray Dieu & des lumieres de nostre salut, & qui a épandu sur le vieux Testament la clarté qui le nous rend maintenant intelligible. C'est lui qui a rempli nos consciences de consolation & de paix par l'assurance de la remission de nos pechés & de nostre reconciliation

avec

avec Dieu. C'est lui qui par l'entremise de ces admirables connoissances dont il a illuminé nos entendemens, a regeneré nos volontés, & allumé la charité dans nos affections, en y inspirant la sanctification & l'esperance de l'immortalité glorieuse. Quant au voile que Moysé mit sur son visage, il estoit ou destitué de lumiere, ou mesmes opaque & tenebreux, de sorte qu'au lieu de produire aucun des effects qui sont propres à la clarté, il estoit mesmes capable d'en empêcher l'efficace. Et telle est, mes Freres, la nature de l'alliance de la Loy, à la considerer précisément en elle mesme. Car encore que les dix commandemens des deux Tables, soyent souverainement admirables, & donnent de belles connoissances de la nature de Dieu & de la vraye pieté,

E

à qui seroit demeuré dans l'intégrité de la nature, si estce qu'ils ne reueient nullement les choses esquelles consiste le salut de ceux qui sont tombés en peché, & qu'ils laissent en cet égard nos ames pleines de tenebres. Et tant s'en faut que cette alliance soit capable de nous donner vne solide consolation, qu'au contraire, elle remplit nos consciences de frayeur & de desespoir, en ce qu'elle ne propose la recompense sinon à ceux qui accomplissent entierement ses commandemens, & qu'elle denonce vne irrevocable malediction à tous ceux qui les transgressent. Car à qui estce que sa conscience rende tesmoignage d'auoir obserué toutes les ordonnances de Dieu? Ou qui estce que sa conscience ne conuainq point de les auoir violées en mille & mille rencontres? Et pour

ce qui est de la vie, soit que vous le mettiés en la sanctification; la Loy ne presente point les vrais motifs qui la produisent dans vne ame corrompue par le peché; soit que vous la fassiés consister dans la beatitude que nous attendons, la Loy ne nous en donne point l'esperance. Aussi l'Apostre dit il qu'elle *n'a pas esté donnée pour vivifier* : & dans ce mesme chapitre d'où nostre texte est tiré, il l'appelle le ministère de condamnation & de mort, tant s'en faut qu'il luy attribuë la vertu de communiquer la vie.

A cela vous pouués encore ajouster que la splendeur de la face de Moyse estoit vne chose miraculeuse, & furnaturelle, & qui procedoit d'une cause tout à fait extraordinaire, & qui n'auoit rien de commun avec les causes de la nature : au lieu que le voile

estant de la matiere de laquelle il estoit formé, n'auoit du tout rien que de naturel en soy, rien que de grossier & de terrestre. Ce qui conuient parfaitement bien à la nature des choses que l'Apostre compare icy l'une avec l'autre. Car comme l'Evangile est vne doctrine absolument divine & celeste, aussi a-t-il esté revelé d'une façon tout à fait surnaturelle. C'a esté Dieu qui en a donné, s'il faut ainsi dire, l'impression à son Fils là haut, en cette communication qu'il a eüe avec luy de toute eternité dans son sein; & le Fils le nous a reuelé par des voyes auxquelles il n'y a du tout rien de semblable dans les choses de la Nature. Mais quant à la Loy, il n'en est pas de mesmes. Car si vous la considerés dans les dix Commandemens des deux Tables, & dans la formule, *Fay*

ces choses & tu vivras, c'en est rien sinon le renouvellement de la Loy de la nature, & de l'alliance que Dieu auoit traittée avec le premier homme au commencement. De sorte qu'il n'y a rien en cela que de naturel. Si vous la regardés dans les ceremonies qui y ont esté ajoustées par le ministère de Moyse, elles ont toutes consisté en choses corporelles & charnelles, & qui n'auoyét point d'autre vsage, à les prendre précisément en elles mesmes, sinon corporel & charnel. Voila pourquoy l'Apostre dit qu'elles *sancti-* Coloss. *fient les souillés quant à la chair.* Et ^{2. 10.} S. Paul les appelle *des elemens* ou *des rudimens du monde*, c'est à dire, qui n'ont rien qui ne soit conforme à la nature des choses d'icy bas, & qui ne tiennent rien de celle des celestes. Et en fin, si vous la considerés dans ce qui

concernoit la Police d'Israël ; comme elle ne tendoit sinon à procurer à ce peuple , entant que c'estoit vn peuple qui formoit vn corps d'Estat , vne felicité temporelle , aussi ne dispoſoit elle sinon des choses purement temporelles , & qui ne concernent que le corps.

Outre cela ie vous ay déjà remarqué que ce fut à cause de l'imbecillité des yeux du peuple d'Israël que Moyse mit vn voile sur son visage , par ce que l'éclat en éblouissoit les Israélites , & qu'ils ne le pouvoyent souffrir. Ce qui represente admirablement bien la cause pour laquelle Dieu n'a pas revelé son Euangile à cette nation , dans cette merveilleuse splendeur & dans cette haute magnificence où nous le voyons maintenant. Car les hommes sortant alors de dessous ces épaiss-

ses tenebres d'ignorance qui auoyent couvert la face de la terre, & faisi les esprits de tous les humains depuis le peché, & Dieu ne donnant pas encore alors vne grâde mesure de son Esprit, pour fortifier les entendemēs des hommes, & pour les rendre capables de ces diuines verités; s'il les eust mises tout à decouvert deuant leurs yeux, ils en eussent esté ébloüis de telle sorte, qu'il eust esté impossible de les leur faire receuoir. Voila pourquoy comme quand quelcun a esté long temps dans vne profonde cauerne, où il ne voyoit point de iour, on ne l'amene pas tout d'un coup dans la lumiere d'un plein midy, d'autant que cela seroit insupportable à la foiblesse de sa veüe, mais on le fait passer en quelque lieu sombre, en luy mesnageant la lumiere par degrés, afin d'y

accoustumer ses yeux : ainsi Dieu voulant tirer son Eglise de dessous l'horreur des tenebres dont tout le monde estoit couuert, luy a dispensé ses revelations en telle façon, qu'il l'a premierement fait passer dans l'alliance legale, qui estoit pleine d'ombres & d'obscurité, y adjoustant tantost vn degré de lumiere, & tantost vn autre, iusques à ce qu'enfin le Soleil de Iustice vint à reluire en toute sa force dans l'accomplissement des temps. Et c'est pourquoy S. Paul dit en quelque lieu, qu'il *annonce la sapience entre les parfaits*, & icy, qu'il *ne fait pas comme Moïse, qui mettoit un voile sur son visage*. Par ce que Moïse auoit à faire à vn peuple dont la veüe de l'ame estoit foible, & nullement proportionnée à la splendeur des Verités de l'Evangile de Christ : au lieu que les A-

postres ont annoncé l'Evangile en vn temps auquel Dieu a liberalement distribué l'abondance de sa grace entre les hommes.

En fin, ie croy que vous conceués assés de vous mesmes, que la difference de la distance qui estoit entre les Israélites & Moyse, cau-
soit aussi de la diversité dans les effects que son voile produisoit. Car quant à ceux qui approchoyent le plus près de luy, comme Aaron, peut estre, & les anciens du peuple, & quelques autres, ils pouvoyent bien entreuoir quelque chose de la lumiere de son visage au trauers du voile, quoy que ce fust tresimparfaitement & avec peine, à cause de l'obscurité que le voile y répandoit. Quelques fois mesmes ils en pouvoyent apperceuoir quelques rayons éclattans, qui sortoyent de deffous le voile, si par

vn ébranlement extraordinaire il venoit à flotter, & à découvrir quelque partie du visage du Prophete pour vn moment. Mais quant à ceux qui estoient plus éloignés, ils n'en apperceuoient du tout rien, & ne voyoient sinon le voile dont cet incomparable personnage estoit couuert. Et cela mesmes est arrivé au peuple d'Israël, en ce qui regarde la doctrine de salut, sous la dispensation legale. Ceux à qui Dieu faisoit la grace de s'approcher plus près de la revelation qu'il y donnoit de foy mesme, pour la contempler attentivement, apperceuoient quelque lumiere de l'Evangile au trauers de l'obscurité de la Loy, & du milieu des épouuantemens qu'elle causoit, & des motifs qu'elle presentoit de s'attacher aux choses terriennes & corporelles, ils tiroient quel-

que consolation , & sentoient quelque chose de l'efficace de ces divines verités qui contenoient l'esperance de salut , en la regeneration de leurs ames. Quelques fois mesmes par des mouuemens, & par des transports extraordinaires Dieu faisoit reluire aux yeux de l'esprit de quelques vns, des éclairs Évangéliques si splendides & si lumineux , qu'ils en estoient ravis en admiration , & dans l'Ecriture du Vieux Testament nous en voyons de tres-beaux & tres-memorables exemples. Mais quant à la pluspart des Israélites , ils s'arrestoient à la Loy , & la veüe de leurs entendemens ne passant pas plus auant, ou bien ils se flattoient de l'esperance d'obtenir la Iustification par leurs œuvres, & ainsi s'endormoyent en sécurité ; ou bien ils se laissoient engloutir dans vn

inconsolable desespoir, à cause de la terreur de ses menaces. Et soit que la securité les rendist insensibles aux menaces de la Loy, soit que le desespoir s'emparaist de leurs consciences, tant y a qu'ils demeuroyent toujourns meschans, comme l'experience l'a monstré, & comme David & les autres Prophetes le leur ont toujourns reproché, ainsi que S. Paul l'a remarqué dans les passages qu'il en a cités, & dont il a fait vn tissü au troisieme chapitre de l'Epistre aux Romains. Ainsi voyés vous la ressemblance qui est entre la Loy, & le voile que Moyse mettoit sur sa face. Mais il nous faut encore considerer ce grand Prophete sous la troisieme de ces relations desquelles ie vous ay parlé.

Le vous ay donc dit, mes Freres, qu'il estoit Mediateur du peuple

peuple enuers l'Eternel, & c'est chose qui est claire & manifeste par son histoire. Or pouvés vous reconnoistre, en considerant vn peu attentivement nostre Seigneur Iesus, qui est le Moyenneur de la nouvelle alliance, & en le comparant avec ceux pour lesquels il s'est entremis enuers son Pere, qu'il y doit auoir beaucoup de rapport & de conuenance entre le Mediateur, & ceux pour qui il est établi. Car nostre Seigneur a esté fait d'une mesme nature avec nous, & nous a esté rendu semblable en toutes choses, excepté le peché seulement. Il a reuestu les infirmités auxquelles nous sommes naturellement sujets, & mesmes a voulu paroître comme s'il eust esté de la condition qui est la plus commune & la plus ordinaire entre les hommes, c'est à dire, basse & mépri-

fable. Il s'est fait outre cela le
modelle de nostre vie en ce qui
est de la souffrance des afflictions:
& quand & quand il a voulu estre
le patron de ce que nous auons à
esperer apres nos tribulatiōs, dans
les gloires qui les doiuent suivre.
Ne doutés donc pas que Dieu
qui a conduit toutes les choses
qui sont aduenuës tant à Moÿse
qu'à Israël, avec vne admirable
sapience, n'ait voulu qu'il y eust
de fort notables rapports entre
l'estat de ce peuple, & les choses
qui sont arrivées à celuy qu'il luy
donnoit pour Mediateur. Par
exemple, il a voulu qu'il fust d'v-
ne mesme nation, & l'a fait des-
cendre du mesme sang des Pa-
triarches. Et comme il auoit re-
solu de faire passer à ce peuple
quarante ans dans le desert, auant
que de l'introduire en la terre de
Canaan qu'il luy auoit promise, il

a fait passer à ce sien serviteur quarante ans en exil auant que de l'employer dans la charge à laquelle il l'auoit destiné. Depuis, à la fin de la course de ce grand prophete, Dieu l'amena iusques sur le bord de la terre de Canaan, de sorte qu'il en eut la veüe ; & quand la fin de la durée de cette nation est venuë, Dieu l'a amenée iusques sur le bord du royaume des Cieux. Car qu'est-ce de voir nostre Seigneur Iesus revelé au milieu d'elle, y annonçant le S. Evangile, & y proposant l'esperance du salut si claiement qu'il a fait, sinon estre conduit iusques sur le bord du royaume des cieux, dont l'Evangile donnoit vne si claire revelation, & vne si certaine esperance ? Mais comme Moyse n'y entra pas à cause de quelque defect de foy qui luy estoit arriué auparauant, le peuple des

Iuifs n'est point entré dans le royaume des cieux, à cause de son incredulité, comme S. Paul le remarque. De plus, Moÿse mourut là, & ne passa pas plus auant : & ce fut au temps de sa reïection que le peuple d'Israël mourut aussi. Car qu'est-cela mort d'un peuple sinon la destruction de son Estat, & la ruïne de son gouvernement, quand il tombe dans vne telle desolation qu'il n'a plus de forme d'Estat ny de Republique? Et Moÿse estant mort, son corps fut enterré de telle façon qu'homme vivant ne sceut le lieu auquel il auoit esté mis : de sorte qu'il semble que ses cendres soyent maintenant tellement éparſes avec le reste de la terre, qu'il est impossible de dire où il repose principalement. Et telle est la condition de ce miserable peuple depuis sa dissipation : car il est

tellement dispersé parmy les autres nations , que nul ne sçauroit dire maintenant où est sa principale habitation , ny où séjourne la partie la plus considerable de ses misérables restes. Neantmoins, encore que le corps de Moyse ne soit pas entré en Canaan, son esprit y est pourtant allé par le moyen du desir & de la pensée, & quand il a esté effectiuement séparé d'auec le corps, il a aussi esté réellement & de fait introduit dans le Paradis que la Canaan representoit. Or quoy que l'esprit soit imperceptible aux yeux du corps, si estce pourtant la partie la plus excellente de l'homme. En ce peuple pareillement il y auoit deux Israëls, l'un selon la chair, & l'autre selon l'Esprit, comme S. Paul le nous enseigne. Encore donc que l'Israël selon la chair, qui faisoit

le corps de la Nation, se soit luy
mesme priué du royaume des
cieux par son incredulité, si estce
que l'Israël selon l'esprit y est
entré par la foy, & qu'il a esté
fait participant du salut qui nous
a esté apporté par l'Euangile. Et
quoy que cet Israël fust à peine
reconnoissable, tant il estoit com-
posé de peu de gens, en compa-
raison du reste de la nation, si
en estoit-ce pourtant la partie
incomparablement la plus excel-
lente. Derechef, quoy que Moyse
soit mort avant que d'entrer en
Canaan, & que son corps soit
demeuré priué de cet avantage,
si estce qu'il sera participant de
la bienheureuse resurrection, &
que quand il ressuscitera, il sera
rendu iouissant de la Canaan
celeste. Et de mesmes, encore que
le corps de cette miserable na-
tion se soit priué de la partici-

pation du salut iufqu'à maintenant, il fera pourtant quelque iour conuerti à nostre Seigneur Iefus Christ; & fa conuersion fera, ainfi que S. Paul le nous appréd, comme vne refurrection d'entre les morts. Auffi voyés vous que les Prophetes dans leurs visions nous representent la reftauration de ce peuple là, comme fi Dieu deuoit ramaffer des os épars, & les reueftir de chair, de nerfs, & de peau, & puis leur inspirer tout de nouueau la refpiration & la vie.

Y ayant donc entre ce peuple & fon Mediateur tant de beaux rapports en autres chofes, ne doutés pas, mes Freres, que Dieu n'ait voulu qu'il y en eust encore en cet accident, qui est vn des plus memorables qui luy foyent iamais arriués. Vous voyés quel est non l'ufage feulement, mais

aussi l'effect des voiles. Non seulement ils empeschent que ceux qui les portent ne soyent veus, parce qu'ils leur cachent le visage, mais aussi ils les empeschent de voir eux mesmes si distinctement qu'ils feroient autrement les choses qu'ils ont deuant eux, parce qu'ils leur couurent les yeux. S'ils sont noirs, ils obscurcissent les objets: s'ils sont teints d'une autre couleur, ils les colorent de mesmes; & plus ils sont chargés ou de matiere, ou de teinture, & moins ils sont transparens; ce qui fait qu'ils dérobent aussi davantage aux yeux la veüe des choses visibles. Moyse donc en ayant vn sur les yeux du corps, a eu cette correspondance avec le peuple en cet égard, que ce peuple là deuoit auoir vn voile sur les yeux de l'esprit, c'est à dire, sur l'entendement: car com-

me vous ſçaués , ce que ſont les yeux au corps , cela eſt l'entendement à l'ame. Et comme ce voile de Moyſe l'empeschoit ſans doute de voir les choſes dans leur teint naturel , celuy que les Iſraélites auoyent ſur l'eſprit les a empeschés de voir les doctrines de l'Evangile dans la pureté de leur verité , & d'en iuger convenablement à leur excellence.

En eſſect , mes Freres , entre les autres rapports que ces choſes peuuent auoir entre elles , ie trouue qu'il y en a quatre principalement conſiderables. Le premier eſt , que le voile , à le conſiderer en ſa nature , eſtoit d'une matiere opaque & tenebreuſe d'elle meſme , & qui par conſequent eſtant épandué ſur les yeux , en arreſtoit les fonctions : car à ce que les yeux voyent , il ne faut pas que choſe quelconque les touche ſi-

non vn air, ou quoy qu'il en soit, vn corps ou illuminé, ou transparent. Et les Israélites auoyent naturellement sur l'entendement des tenebres fort épaisses qui en empeschoyent les operations. Car à ce que l'entendement de l'homme exerce bien ses fonctions au iugemēt & au discernement qu'il fait des objets, ou bien il faut qu'il ait déjà de bonnes habitudes de raisonner sur la nature des choses, ou au moins qu'il n'en ait point de mauuaises, & qu'il soit dans l'innocence de son origine, & de son integrité. Le second est, que comme ce voile de Moyse, ainsi que ie le vous ay expliqué, representoit l'alliance de la Loy, ce qui estoit vne signification adjoustée à sa nature; semblablement à cette corruption qui met naturellement des tenebres sur nos esprits, se

font attachés les preiugés que les Iuifs ont pris de l'alliance de la Loy, qui les ont encore rendus beaucoup plus incapables d'appercevoir & de reconnoître les verités de l'Evangile. Car que pensés vous qui ait empesché les Iuifs de recevoir la doctrine de la Iustification par la foy, ou de ce service spirituel que nostre Seigneur a ordonné, ou de ce regne spirituel pareillement qu'il a establi entre toutes nations sur la face de la terre, sinon les opinions inueterées & enracinées dont leurs esprits estoient preuenus, qu'il falloit estre iustifié par les œuvres de la Loy, que la Circoncision & les sacrifices des bestes, & les autres ceremonies estoient le service qui estoit agreable à Dieu, & que le Messie devoit estre vn grand Conquerant, qui reestablist le royaume

d'Israël comme il a esté sous David & sous Salomon , & qui soumift à la nation des Iuifs tous les autres peuples de la terre ? C'est ce voile là , ce sont ces prejugez , dont ils auoyent les esprits saisis , qui ont empesché qu'ils n'ayent reconnu le Sauueur qui leur auoit esté destiné , & qu'ils n'ayent donné lieu à la predication des saints Apostres. C'est ce qui fait dire à Saint Paul en cet endroit , que leurs entendemens sont endurcis ou aueuglés , parce que ces opinions , qui s'estoyent enuieillies dans leurs esprits, estoyent deuenues à peu pres comme vn cal qui se forme sur les yeux , & qui leur oste la faculté de la veüe. Le troisieme est , qu'il nous est expressément rapporté que Moyse auoit le voile sur son visage pendant tout le temps qu'il sejour-

noit

noit avec le peuple d'Israël, c'est à dire, autant de temps qu'il auoit le dos tourné à la Montagne où Dieu residoit alors, & qu'il auoit la face vers le peuple & vers la terre sur laquelle le peuple estoit. Or qui peut douter, mes Freres, que cela n'ait signifié que ce voile formé de la corruption de la nature & des preiugés de la Loy, demeureroit sur le cœur des Israélites autant de temps qu'ils auroient leurs yeux & leurs affections panchées vers les choses terriennes, & qu'ils tourneroyent le dos à nostre Seigneur Iesus ? Il ne faut donc pas trouver estrange si encore que l'Evangile leur ait esté si clairement annoncé, neantmoins ils ne l'ont point embrassé. Ce voile demeure tousiours sur leurs cœurs, par ce qu'ils les tiennent toujourns attachés aux choses terriennes & corruptibles. Et

c'est ce que S. Paul nous veut enseigner quand il dit que ce voile est bien *osté par Christ* à la verité, quant à ce qui est de la clarté de la revelation qu'il nous a faite de son Euangile, lequel il a développé de toutes les obscurités de la Loy : mais que neantmoins *inſqu'à maintenant il demeure, tandis qu'on lit Moysé* en la presence de ce peuplé là, par ce que quelque claire que soit la revelation de l'objet, leurs ames sont trop mal disposées pour le recevoir & pour le comprendre. Car quand il dit, *Mais leurs entendemens sont endurcis ; Mais inſques à ce iourd'huy quand on lit Moysé, le voile demeure sur leur cœur*, il veut aller au deuant d'une objection qu'on luy pouvoit faire, pourquoy les Apostres ne mettant point de voile sur leur visage, & preschant l'Evangile si clairement, & pour-

quoy ce voile estant aboli par Christ, les Iuifs n'ont pas creu pourtant. Et il respond par anticipation, qu'il ne faut pas s'en estonner, puis qu'il auoit esté en quelque sorte prefiguré que le voile demeureroit sur leur cœur vn fort long temps, comme il auoit demeuré vn temps assés considerable sur les yeux de leur Mediateur Moyse. Le quatrieme rapport finalement est entre ce qui arriuoit lors que Moyse se retournoit pour remonter vers Dieu sur la Montagne, & ce qui arrivera quand le peuple d'Israël se conuertira à nostre Seigneur: c'est que comme Moyse ostoit le voile de dessus ses yeux, celuy que le peuple d'Israël a sur le cœur tombera alors; tellement que comme Moyse regardoit la face de Dieu, sans auoir les yeux couuerts, le peuple d'Israël regar-

dera le Seigneur comme à face découverte. En effect, mes Freres, il ne conuenoit pas que Moysé retint son voile quand il retournoit pour parler à Dieu. Car d'un costé le voile ne pouuoit pas l'empescher d'estre veu de Dieu, qui sonde les reins & les pensées: & de l'autre, puis que Dieu luy faisoit l'honneur de l'admettre à sa communication, il ne falloit pas qu'il se priuast de sa contemplation par l'interposition de chose quelconque. Aussi sont absolument incompatibles ensemble, la veüe de la face de nostre Seigneur Iesus; c'est à dire, la connoissance & la foy des verités de son Evangile, & le voile qui se forme de la corruption de la nature, & des prejugs de la Loy. Ces choses ne se peuuent accorder, estant, comme ie le vous

ay représenté , diametralement opposées. De plus , le voile est maintenant assés souuent vn signe de dueil & de tristesse , & autrefois c'en estoit vn de servitude & de sujétion. Or y auoit-il pour Moysé trop de matiere de ioye en la grace que Dieu luy faisoit, de l'admettre à communiquer avec luy , pour porter des marques de dueil ; & ce luy estoit vne chose trop glorieuse , & qui l'élevoit à vne trop haute condition, pour porter sur soy des enseignes de servitude sur la montagne. Comme aussi certes y a-t-il trop de matiere de consolation en la connoissance salutaire de nostre Seigneur Iesus Christ, pour souffrir les détresses & les angoisses que les preiugés de la Loy donnent; & l'adoption que nous auôs en Christ nous mettant dans la iouissance d'une excellente liber-

té, il n'est pas possible que ceux qui en sont participans aient encore ces mouvemens de mercenaires & d'esclaves que l'alliance legale produit. Et c'est ce que l'Apostre nous veut donner à entendre quand il dit icy que quand ou *Israël*, ou le cœur d'*Israël* se conuertira au Seigneur, alors le voile sera osté. Car il n'est pas besoin, mes Freres, de s'amuser icy à rechercher s'il est necessaire que le voile tombe de dessus le cœur des *Israélites* avant qu'il soit conuerti à Christ, ou s'il faut que le cœur des *Israélites* soit conuerti à Christ avant que ce voile tombe. C'est vne chose sur laquelle quelques vns debattent tout à fait inutilement. Ce n'est point l'intention de S. Paul ny de mouvoir, ny de decider icy cette question. Il veut seulement dire que comme on ne doit pas trou-

Ver étrange que le voile de l'incrédulité demeure iusqu'à maintenant sur le cœur des Israélites, puis qu'il a esté ainsi figuré & représenté en la personne de leur Mediateur ; il ne faut pas aussi penser que cela demeure à toujours , d'autant que l'action de leur Mediateur , lors qu'il retournoit vers Dieu, a esté vne représentation de ce qui leur arrivera quand le temps sera venu qu'ils se conuertiront au Sauueur du monde. C'est doncicy vne prediſtion de la conuerſion des Iuiſs, & non vne explication de la maniere en laquelle cette conuerſion ſe fera, & de ce qui doit ou ſuiure ou preceder en elle. Et c'eſt pourquoy cette verſion, *quand il ſe fera conuertir au Seigneur*, que l'on ſuit ordinairement, eſt vn peu plus incommode que ſi l'on traduſoit, *quand il ſe conuertira au ſei-*

gneur, comme l'original le pourroit permettre.

Or estime-je que desormais le texte que j'auois entrepris vous est assés clair, de sorte qu'il ne reste plus sinon que vous en tiries les enseignemens qui pourront seruir à la consolation & à l'edification de vos ames. Et dautant que cette action est vn peu longue, parce que ie n'ay pas voulu interrompre cette meditation, ny la vous proposer à diuerses fois, de peur que vous n'en vissiés pas si bien la suite, ie me contenteray maintenant de vous monstrier seulement comme du bout du doigt, les sources d'où vous pouués puiser ces instructions : car i'espere que de vous mesmes vous les vous appliquerez assés quand ie vous y auray donné les premieres ouuertures. Et premierement ie pense qu'il

n'y a personne d'entre vous qui ne reconnoisse que nous auons icy vn beau sujet d'admirer la sagesse de Dieu, qui paroist manifestement dans l'adjustemēt qu'il a fait de toutes ces choses entre elles. Car il faut bien, mes Freres, que ce soit Dieu qui ait mis dans les choses memorables qui sont arrivées à Moysē, les représentations de celles qui deuoyent arriuer & à nostre Seigneur Iesus Christ, & au peuple d'Israël pendant le cours de tant de siecles, & apres vn si long temps; nulle autre intelligence, quelle quelle soit, n'estant capable de preuoir si auant dans l'auenir, & nulle rencontre de hasard ne pouuant auoir approprié tant de choses les vnes aux autres avec vne si admirable correspondance. Certes la religion Chrestienne porte vne infinité de marques de son origi-

ne celeste & de sa divinité : mais à peine en peut on remarquer vne plus belle ou plus evidente , que celle qui paroist dans les rapports que les choses anciennes ont aux nouvelles , les ombres des temps passés , au corps que nous en voyons en Christ , les figures aux verités , & les peintures enigmatiques qui en ont esté autresfois mises deuant les yeux du peuple d'Israël , aux choses mesmes que nous en voyons maintenant tout à decouvert sous la dispensation de l'Evangile. Et quant à nous, nous auons vn merueilleusement grand sujet de benir la bonté de Dieu , & de nous éjouir de nostre condition, en ce que nous sommes au temps auquel les euene- mens des choses nous donnent vne si claire intelligence de ce dont les fidelles de l'Ancien Testament n'ont veu sinon des sym-

boles tresdifficiles en comparai-
son , & tresimparfaits , & tres
sombres. Apres cela, la predi-
ction que l'Apostre nous fait icy
de la conversion des Juifs , doit
exciter nos esprits en l'attente
d'une chose si merueilleuse & si
souhaittable. Et il ne faut pas,
mes Freres, que la difficulté que
nous y pensons voir , ou que le
peu d'apparence qui en paroist
maintenant en leur estat, & prin-
cipalement en la dureté invinci-
ble de leurs esprits, nous décou-
rage d'en concevoir l'esperance.
Je vous ay dit tantost que ce doit
estre vne resurrection d'entre les
morts. Or à considerer vn mort,
quelle apparence y voyés vous
qu'il doive reprendre la vie? Qui
eust creu du corps de Lazare,
quand il estoit déjà de quatre
iours dans le tombeau, qu'il eust
deu reuenir dans la lumiere du

& à attendre la conuersion des Iuifs, nous auons aussi, & ie ne puis m'empescher de le dire icy, à deplorer la condition de ceux qui ramènent autant comme ils peuuent le voile de l'alliance légale sur l'Euangile de Iesus Christ, & qui s'en envelopent le cœur, de sorte qu'ils ne peuuent apperceuoir ces admirables vérités que nous taschons de leur faire voir dans la Parole diuine. Car que font autre chose ceux de l'Eglise Romaine, quand ils enseignent que nous deuons estre iustificiés en vertu de cette formule, *fay ces choses & tu viuras*; quand ils introduisent en l'Eglise tant de ceremonies non Legales seulement, c'est à dire de l'institution de Moyse, mais Payenes, c'est à dire, tirées, comme ils le confessent eux mesmes, de l'imitation du Paganisme; & quand ils met-

tent entre les marques de l'Eglise la pompe & la prosperité de la terre, sinon couvrir la verité du Sauveur d'une enuoloppe redoublée, qui en ruine l'efficace, & qui en ternit toute la splendeur ? Et qu'estce qui les empesche de reconnoistre l'excellence des doctrines que nous annonçons, sinon que celles qu'on leur presche continuellement, & qu'on leur inculque sans cesse, sont comme un voile opaque & tenebreux, qui couvre les yeux de leurs entendemens, à ce que la lumiere de la gloire de nostre Seigneur ne leur resplendisse ? Mais il faut esperer d'eux, mes Freres, ce que l'Apostre veut que nous esperions des Juifs, c'est que quelque iour ce voile là sera osté, & cependant c'est à nous à louer Dieu de ce qu'il nous en a delivrés, & de ce qu'il nous a donné de pouvoir

contempler sa verité à face découverte. Car nous ne sommes pas issus des Juifs à la verité; mais nous sommes descendus de ceux qui auoyent autrefois souffert qu'on les ramenast sous le ioug du Iudaïsme, & qui n'auoyent autre connoissance de la doctrine vraiment salutaire que ce qu'ils en entrevoyoyent à travers cette obscurité. Graces donc soyent renduës eternellement à ce grand Dieu, de ce qu'il a fait luire la gloire de sa face sur nos temps, de ce qu'il a osté le bandeau de l'ignorance de deuant nos yeux, & de ce qu'il a fait éclatter les rayons de sa verité si magnifiquement au milieu de nos Eglises. Ce qui nous reste à faire c'est que nous nous efforcions de profiter de cette revelation de plus en plus, de nous approcher le plus près que nous pourrons de

nostre Seigneur Iesus Christ, afin de le contempler attentivement; de receuoir avec obeïssance, & de suivre avec prontitude les illuminations de sa parole, & les mouuemens de son Esprit; de sentir la consolation qui vient de sa connoissance, & de nous auancer iournellement en la vraye sanctification. Car c'est par ce moyen là qu'on est transformé dès cette vie en son image, & qu'on reçoit l'impression de sa gloire comme de par son Esprit, iusques à ce que par le salut de nos esprits & la glorification de nos corps, nous soyons rendus conformes à l'image de son estat glorieux, & que nous vivions avec luy eternellement & de gloire en gloire. A luy qui nous en a donné l'esperance, comme au Pere & au S. Esprit, vn seul Dieu benit eternellement, soit gloire, force, &

SERMON I. 91
empire aux siècles des siècles
A M E N.



SERMON
SVR CES PAROLES
DE S. PAVL,

1. Cor. chap. 3. vs. 17.

*Or le Seigneur est cet Esprit là ;
& là où est l'Esprit du Sei-
gneur , là est liberté.*



RERES BIEN-AI-
MES EN NOSTRE
SEIGNEUR :

Je pense qu'il n'y a
personne d'entre vous qui ne
m'advouë vne verité laquelle n'est

H. 3.

que trop confirmée par l'expérience : c'est que parce qu'à ces heures l'infirmité de la nature nous emporte facilement au sommeil, nous y apportons beaucoup moins d'attention aux exercices de piété, que nous ne faisons ordinairement à la matinée. Or est-il bien vray qu'outre l'effort que d'eux mesmes les fidelles doivent faire en cette occasion pour exciter leurs esprits, le principal remede à cette incommodité consiste au soin que les predicateurs de l'Evangile doivent auoir de reueiller leurs auditeurs, & de tenir leurs esprits arrestés par la beauté des choses qu'ils disent, & par l'vtilité de leurs meditations. Mais dautant que quelque affection que vos Pasteurs apportent à s'acquitter de ce deuoir, il est pourtant certain que cela n'a pas toujours l'effica-

ce & le succès qui seroit à desirer, j'espere que vous ne trouverez pas mauvais que ie me serve aujourd'huy d'une methode vn peu extraordinaire pour cet effect, & qu'au lieu de la section du Catechisme que j'aurois à traiter deuant vous en cette iournée, si ie suiuis l'ordre accoustumé, ie prenne pour matiere de mon propos le texte que ie viens de lire en vostre presence. Car vous sçaués que les choses extraordinaires émeuent nos facultés d'une façon particuliere, & qu'elles les portent plus puissamment à leurs operations. Et si la difficulté qui se rencontre en l'intelligence d'une sentence est capable de donner quelque nouvelle ardeur à l'esprit pour tascher à la surmonter par la force de l'attention, comme vous sçaués que les ames vn peu genereuses s'éleuent & se roidissent

en telles occasions , ce texte ne contribuera pas peu à vous donner des mouvemens qui dissipent cette importune pesanteur qui nous travaille à ces heures. Vous deuant donc, comme i'es-
pere, revenir de l'vtilité de mon dessein , ie pense que vous ne blasmerés pas la condescendance dont i'y ay voulu vser envers quelques vns qui ont désiré de moy l'explication de ce passage, & que ie ne misse pas trop d'interualle entre cette action icy & celle que i'ay faite sur le precedent , afin que les idées des choses que i'ay dites sur le voile de Moyse, & qui doiuent servir à l'intelligence de ces paroles de S. Paul , ne s'effaçassent pas de leur memoire.

Vous sçavés, mes Freres , que S. Paul a esté diversement attaqué par ses ennemis en ce qui

estoit de l'exercice de sa charge. Les vns l'accusoyent de peu de sincerité en sa conduite; les autres mesprisoyent la bassesse de son apparence extérieure, qui n'auoit rien de majestueux ny d'éclatant: d'autres s'offenoyent de ce qu'il parloit hardiment, & principalement en ses lettres, desquelles ils ne pouvoyent supporter la force ny la gravité: & comme l'envie & la haine se forment d'elles mesmes des causes d'irritation dans les sujets sur lesquels elles se déploient, il n'y auoit presque rien en ce grand homme sur quoy ses aduersaires ne trouuassent à piccoter. De sorte qu'à toute heure il est obligé de respondre à leurs accusations, de refuter leurs calomnies, & d'aller au deuant des mauuais soupçons, & des mauuais impressions que la passion de ces gens estoit capable

de donner de luy. Et c'est ce qu'il fait dans le chapitre qui precede immediatement celuy-cy, & dans le commencement de celuy-cy encore, & mesmes dans le quatrieme, qui vient incontinent apres. Or est-il à remarquer que la plupart de ceux qui le persecutoyēt de la sorte, estoient Juifs de nation, qui faisoient à la verité profession d'avoir embrassé le Christianisme, mais qui comme ils vouloyent mesler la Loy avec l'Evangile de Iesus Christ, ce que S. Paul ne pouvoit souffrir, aussi parloyent ils merueilleusement avantageusement de la vocation & de l'autorité de Moysē, essayans par ce moyen de rabbaïsser celle des Apostres, & particulierement de S. Paul. C'est ce qui luy donne l'occasion de comparer son ministere avec celuy de ce grand Prophete, afin

de faire voir à ses ennemis que non seulement il ne luy estoit point inferieur , mais mesmes qu'il estoit plus excellent ; dautant que l'un estoit le ministere de la Lettre, & l'autre le ministere de l'Esprit ; l'un le ministere de condamnation & de mort, l'autre le ministere de iustification & de vie. Tellement que si le ministere de la Loy a eu quelque chose de glorieux, le ministere de l'Euangile surpasse de beaucoup en gloire : ce qui luy donne la hardiesse de parler librement comme il fait, ainsi qu'il témoigne au verset douzieme de ce chapitre. Pour confirmer & illustrer cela davantage, il continue au verset treizieme en disant, que ny luy ny ses compagnons en l'Apostolat, ne sont pas comme Moyse, qui mettoit vn voile sur son visage ; en quoy il donne su-

jet aux fidelles auxquels il écrit, de faire là dessus les reflexions dont ie vous representay vne partie il y a quinze iours , afin de leur faire voir dautant plus à clair combien la charge d'Apostre estoit excellente. Puis ayant dans les versets suiuians fait vne belle excursion sur la condition des Iuifs , sur leur incredulité & obstination contre l'Evangile , & sur l'esperance de leur conuersion , dont il nous donne là vne prediſtion notable , il retourne en ce verset dixseptieme à parler de cette sainte liberté dont il vſe en la predication de la Parole de salut , & fonde cette hardieſſe sur ce que l'Evangile qu'il annonce , est la doctrine de l'Esprit , & l'alliance de liberté , comme ie me dispose à le vous monſtrer, moyennant la grace de Dieu, plus exactement, en vous expliquant
ces

ces choses par ordre. Premièrement, qui est le Seigneur dont il parle. Puis après, qui est l'Esprit dont il fait mention, & commēt il entend que le Seigneur est cet Esprit là. Et en fin, comment là où est l'Esprit du Seigneur, là est liberté.

Or quant à la premiere de ces choses, ce nom de Dieu qu'en nostre Version Françoisē du Vieux Testament, nous traduisons ordinairement *l'Eternel*, ne se prononçoit point par les Juifs, dès plusieurs siècles avant la venue du Sauveur du Monde. Par tout où il se trouue dans les livres de l'ancienne alliance, les Juifs le lisoient comme si le nom que nous tournons par celui de *Seigneur*, s'y fust rencontré, sinon qu'aux lieux où celui de *Seigneur*, & celui d'*Eternel* se trouvent ensemble, ils lisoient celui d'*Eter-*

nel, comme si celuy que nous traduifons *Dieu* y eust esté écrit. Et cela est venu de ce que les Iuifs auoyent ce nom en si grande veneration, qu'ils n'estimoyent pas que les hommes fussent dignes de le faire passer par leur bouche. Soit donc que les anciens interpretes qui ont tourné la Bible de la langue Hebraïque en la langue Grecque, fussent imbus de cette mesme opinion, ou qu'ils ayent seulement voulu suivre la coustume qui estoit vniuersellement pratiquée dans la Iudée, tant y a que là où ce nom d'*Eternel* s'est présenté à eux dans le Vieux Testament, ils ont pour le représenter, employé le mot Grec qui est en ce texte icy, & que nous exprimons par celuy de *Seigneur* en nostre langue. D'où est venu que non seulement dans tous les passages du Vieux Testament qui

font cités au Nouveau , là où ce terme se rencontre , le mot de Seigneur est employé , par ce qu'ordinairement les Euangelistes & les Apostres alleguent les lieux de la Bible selon la version des septante Interpretes Grecs ; mais mesmes que les Ecriuains du Nouveau Testament , là où ils parlent de leur chef , & sans se seruir d'allegations , appellent communément Dieu de ce nom de Seigneur , parce qu'ils imitent volontiers la Phrase de cette ancienne Version grecque.

Mais comme l'Evangile nous a decouvert des verités , & donné des connoissances que les Anciens n'auoyent pas , ou au moins qu'ils ne possedoyent que d'une façon fort imparfaite & fort sombre , aussi nous a-t-ilourny les occasions de faire sur cette parole des reflexions lesquelles ils

ne pouvoyent pas faire en leur temps. Ayant donc appris que la Divinité n'est qu'une seule & simple essence, mais que trois personnes y subsistent distinctement, nous avons aussi appris à remarquer que quelquesfois ce nom de Seigneur s'employe pour signifier l'essence de la Divinité, sans avoir aucun particulier égard à la distinction des personnes, & que quelques fois aussi il s'applique à l'une ou à l'autre de ces trois personnes singulierement. Par exemple, quand il est defendu aux hommes de tenter *le Seigneur leur Dieu*, & qu'il leur est commandé de n'adorer autre que *le seigneur leur Dieu*; item, de rendre *au seigneur leur Dieu* ce qu'ils ont promis par iurement; passages qui ont esté cités par nostre Seigneur Iesus en l'Evangile; ce mot regardel'essence diuine, & non la

Deut.

6. 16.

Deut.

6. 13.

Exod.

20. 7.

distinction des personnes proprement. Et quand il est souvent dit, *afin que fust accompli ce qui a esté dit par le seigneur*, ou qu'il est fait mention de l'Ange envoyé par le Seigneur, ou de l'Ange du Seigneur, ce terme a la mesme intelligence. De quoy il y a vne infinité d'exemples semblables. Mais en ces paroles du centdixieme Pseaume, lesquelles sont diverses fois rapportées au Nouveau Testament, *le seigneur a dit* Matt. 1.
à mon Seigneur, Sieds toy à ma dex- 22. 2.
tre, iusques à tant que i'aye mis tes 15.
ennemis pour marchepié de tes pieds,
il est manifeste & sans contestation que le Pere & le Fils y sont particulierement & distinctement designés. Car c'est le Pere qui parle à son Fils, & qui est appelé de ce nom de *seigneur* ou d'*Eternel*; & c'est le Fils à qui il est dit que ses ennemis luy seront as-

fujettis ; & qui est nommé de ce nom de *seigneur* encore. Celuy qui apparut à Esaïe au fixieme de ses revelations, est nommé de ce nom d'Eternel & de Seigneur trois ou quatre fois en ce beau passage. Car il est dit là que les Seraphins qui estoient autour de son trône crioyent, *Saint, Saint, Saint, est l'Eternel des armées*, où le mot d'Eternel a esté traduit *Seigneur* par les Grecs comme ailleurs ; & ces mesmes paroles ont esté employées selon leur version au quatrieme chapitre de l'Apocalypse. Et il est dit là mesme encore, que le Prophete a veu *le Seigneur seant sur un trône haut & eleué*. Cependant, si nous nous en rapportons au témoignage de S. Iean ; & à l'autorité de qui defererions nous plustost en telles choses ? c'est à la personne du Fils que ces paroles là doivent

estre particulieremēt appliquées.

Car il dit que celles-cy, *il a aveu-*

glé leurs yeux, & a endurcy leur Ican

cœur, & les suiuanes, qui se trou- II. 40.

uent en ce passage d'Esaïe, ont

esté dites par le Prophete quand

il vid la gloire de Christ, & *qu'il*

parla de luy. Au chapitre vingt

& vnième du livre des Nombres,

il est dit que l'*Eternel*, ou le *Sei-*

gneur, enuoya sur le peuple des

serpens brûlans, pource que les

Israëlites l'auoyent tenté. Ce-

pendant Saint Paul interprete

cela de nostre Seigneur Iésus

Christ, & dit que c'est à luy que I. Cor.

s'est adressée la tentation qui at- 10. 9.

tira cette playe sur les Israëlites.

Ce qui monstre que ce nom de

Seigneur en cet endroit du liure

des Nombres, doit estre inter-

preté de la personne du Fils. Au

Nouueau Testament ce mot est

diuerfement appliqué. selon les.

occurrences. Mais neantmoins il est certain qu'il est incomparablement plus souuent employé pour designer la personne du Fils, que non pas l'essence de Dieu simplement, ou la personne du Pere. Car il n'y a quasi page dans les Epistres de S. Paul, où il ne se rencontre en ce sens, ce que chacun peut iustifier à l'ouverture du liure. Et il n'est pas malaisé, mes Freres, d'en rendre la raison. Nostre Seigneur a cela de commun avec son pere, qu'il est Dieu benit eternellement, d'une mesme essence avec luy, d'une mesme maiesté, & d'une mesme puissance. Tellement que si la nature diuine donne au Pere le droit & l'autorité de prendre cette qualité de Seigneur, qui designe l'empire absolu qu'il possede sur toutes choses, elle la donne au Fils pareillement. Mais

il a cela de particulier qu'il s'est acquis son Eglise, non par or, ou par argent, ou par chose corruptible, mais par vne chose infiniment plus precieuse, qui est son propre sang. Tellement que si les choses que nous achetons de nostre argent, sont à nous, & si nous pretendons auoir droit d'en vser comme il nous plaist, avec vne puissance toute entiere, quel droit pensons nous que le Fils ait sur ce qu'il a acquis par vn prix si excellent & d'une façon si extraordinaire? Et c'est là dessus que S. Paul fonde cette belle exhortation qu'il fait aux Corinthiens. 1. Cor. 6. 19. 20.

Vous n'estes, dit il, point à vous mesmes. Car vous aués esté achetés par prix: glorifiés donc Dieu en vostre corps & en vostre esprit, lesquels appartiennent à Dieu. Et parce que nostre Seigneur Iesus Christ a volontairement donné son sang

pour l'acquisition de son Eglise,
& qu'il s'est en cela rendu obeis-

Phil. 1. *sant à son Pere iusques à la mort,*
8. 9. 10. *voire la mort de le Croix, S. Paul*

enseigne que pour cette cause aussi
Dieu l'a souverainement élevé, & luy
a donné un nom qui est sur tout
nom : afin qu'au nom de Iesus tout
genouil se ploye, de ceux qui sont
aux cieux, & en la terre, & sous la
terre : & que toute langue confesse
que Iesus Christ est le Seigneur, à la
gloire de Dieu le Pere, A quoy s'ac-

Heb. 1. *corde ce que dit l'auteur de l'E-*
2. *pistre aux Hebreux, que le Pere*

a establi son Fils heritier, c'est à
dire, Seigneur de toutes choses : Et

S. Pierre, au deuxieme chapitre
du liure des Actes : Que toute la

Aët. 2. *Maison d'Israel sache assurement,*
36. *que Dieu l'a fait Seigneur & Christ,*

voire iceluy Iesus lequel, dit-il, vous
anés crucifié. De sorte que le Pere
luy ayant remis l'empire de l'V-

nivers entre les mains, pour le gouverner à sa volonté, le tiltre de Seigneur luy conuient d'une façon particuliere à nostre égard, & aussi est-cele nom duquel nous l'appellons d'ordinaire.

Suiuant ce stile, qui est si familier à S. Paul, ie ne fais point de difficulté de prononcer hardiment que c'est nostre Seigneur Iesus Christ qu'il nomme ainsi en ce passage. Aussi n'y a-t-il aucun interprete qui le reuoque tant soit peu en doute. Mais ie pense qu'il n'y a personne qui puisse douter non plus, qu'il n'y ait icy vne tacite opposition entre nostre Seigneur & Moyse. Car comme ie le vous ay representé, Moyse a esté vn excellent type de Iesus Christ; & S. Paul veut que l'on face icy comparaizon de la chose mesme avec sa figure. Et les paroles qui suivent le monf-

trent manifestement. Car quand l'Apostre parle ainsi, *nous tous qui contemplons comme en un miroir la gloire du Seigneur à face découuerte*, il entend dire qu'il n'en est pas de luy comme du peuple d'Israël : par ce que le peuple d'Israël ne voyoit la gloire du visage de Moyse qu'au trauers du voile duquel il estoit couuert : au lieu que luy & ses compagnons en l'Apostolat, & en suite le peuple Chrestien, contemplent la gloire de la face du Seigneur Iesus à découuert, & sans l'interposition d'aucun voile. Or Moyse doit estre consideré en deux façons : à sçauoir précisément en sa personne; & puis, entant qu'il a esté le Mediateur de l'ancienne alliance, & le chef du ministere de la Loy. Quand on le considere en la premiere, le mot de Moyse signifie ce personnage lequel estoit fils
de

de Hamram, & frere d'Aaron & de Marie, de la lignée de Levi, qui fut choisi d'entre tous les Israélites pour estre le liberateur & le conducteur d'Israël. Mais quand on le considere en cette seconde maniere, cette charge de Mediateur de l'ancienne alliance, & de chef du ministere de la Loy, fait que quelquesfois ce nom de Moyse signifie l'alliance de la Loy mesme, ainsi que Moyse l'a establi, & qu'il l'a redigee par écrit dans les livres que nous auons de luy. Et de cela ie vous ay cy-deuât produit les preuves en vous allegant les passages où ce nom se prend en ce sens, outre celuy que nous auons dans le texte precedent en ces mots : *iusques à ce iourd'huy quand on lit Moyse, le voile demeure sur leur cœur.* Et la raison de cela ne se doit pas prendre seulement de ce que Moyse a

esté l'auteur & l'écrivain de ces divins volumes là , comme nous appellons Hippocrate , Aristote , & Ciceron , les œuvres de ces grands hommes ; mais aussi de ce que Moyse en estoit en quelque façon la matière & le sujet. Car sa vocation de Mediateur a esté telle ; que ceux qui ont embrassé la Loy , ont esté disciples non pas seulement de Dieu , en l'autorité de qui ce sien serviteur parloit ; mais de Moyse encore , comme vous sçaués que les Juifs se sont qualifiés tels en l'Evangile. *Nous*

Iean 9.

20

1. Cor.

10. 2.

Exod.

14 13.

sommes , disent-ils , *disciples de Moyse*. A quoy se peut rapporter ce que dit S. Paul , que les *Peuples ont tous esté baptisés en Moyse, en la nuée, & en la mer*. Comme aussi s'y rapporte ce qui est dit au livre de l'Exode , apres le passage de la mer rouge , que le peuple ayant veu cette grande merveille,

ils creurent à l'Eternel, & à Moïse son serviteur : C'est à dire qu'ils reconnurent l'un pour leur Dieu, par la puissance de qui ces grands miracles se faisoient, & l'autre pour leur Mediateur entre Dieu & eux, & le liberateur qu'il leur avoit donné pour les tirer de leur servitude.

Selon cette distinction, & dans l'opposition qui est icy assés manifeste, ce mot de Seigneur peut avoir deux diverses intelligences. Et il est sans doute que d'ordinaire il signifie la personne mesme du Redempteur ; Iesus, dije, le Fils de Marie selon la chair, & le Fils eternal de Dieu, selon l'Esprit de sanctification. Icy la raison veut qu'il se prenne plustost pour l'alliance de l'Evangile, comme dans les paroles immediatement precedentes le nom de Moïse se préd pour l'alliance de la Loy. En

effect, mes Freres, nostre Seigneur est le Mediateur de l'Alliance de Grace, le legiflateur établi de par Dieu pour donner à son Eglise ses constitutions & ses Lois, le chef du miniftre de l'Evangile, en l'autorité de qui les Apostres, les Prophetes, les Euangeliftes, les Pasteurs & les Docteurs, qu'il a donnés pour l'afsemblage des saints, ont exercé leurs fonctions, & les exerceront à l'aduenir, iufqu'à la consommation des fiecles. C'est de luy de qui nous fommes disciples, c'est en luy que nous deuons croire, comme nous croyons en son Pere; & si Moyse a esté autresfois en quelque forte participant de quelque chose qui eust de la reffemblance avec cet honneur, ce n'a esté qu'en qualité de figure de ce Redempteur, en qui la chose mefme deuoit auoir fon accom-

plissement, & la plenitude de sa gloire. Mais outre cela, nostre Seigneur est le sujet & la matiere qui remplit son Euangile en toutes ses parties; tellement que soit que vous consideriés cette divine alliance en son total, soit que vous la regardiés en chacune des choses qui la composent, vous y trouverés l'image du Seigneur Iesus empreinte si profondement, & au reste si splendide & si lumineuse, qu'elle est capable de vous donner de la satisfaction & de l'admiration, à peu près comme si luy mesme se presentoit en sa personne à vos yeux. Qu'est-ce que l'Evangile sinon la bonne nouvelle de la naissance de Iesus Christ, le recit de sa vie, de sa predication, & de ses actions miraculeuses, l'histoire de sa passion & de sa resurrection d'entre les morts, & le tableau dans lequel

il nous est représenté montant au Ciel, & s'asseyant à la dextre de son Pere en magnificence? Que sont les doctrines qui dependent des actions & des passions du Sauveur, & des gloires qui les deuoyent suiure, sinon la declaration des fruits qui nous reuiennent de la communion de Christ, qui le nous mettent deuant les yeux, & qui le nous engrauent dans l'ame? Dans la doctrine de la iustification nous est présenté le fruit de sa croix en la remission de nos pechés, & en l'imputation de sa iustice. Dans la doctrine de la sanctification nous est offert le fruit de sa resurrection d'entre les morts, en la vivification du nouvel homme en nous, dont la nouvelle vie qu'il a menée depuis qu'il est sorti du tombeau, nous fournit vn modelle admirablement efficace. Dans la doctrine

de la resurrection & glorification de nos corps, nous est offert le fruit de son ascension là haut, où il est monté comme avantcoureur pour nous, afin de nous y preparer nostre lieu, & de nous y rendre quelque iour participans d'une mesme gloire. Le Batefme le nous represente lavant nos ames en son sang : la Cene le nous communique en viande & en breuvage : en vn mot, toutes les parties de la Religion, toutes les faces esquelles on peut considerer l'Eglise de Dieu, en portent vne belle empreinte. Et comme le Monde ancien, de quelque costé qu'on le considere, presente des marques euidentes des vertus du Pere qui l'a créé, le nouveau monde presente pareillement de toutes parts des images du Fils qui l'a sauvé ; & n'y a endroit de ce nouvel vnivers qui ne soit tout

ensemble marqué de son sang , & resplendissant de quelque rayon de sa gloire. Comme donc l'Eglise s'appelle quelquesfois de ce nom de Christ , à cause de la communion qu'elle a avec luy, l'alliance de l'Evangile peut bien porter le mesme nom , parce qu'il en fait toute la substance. Et ie croy que c'est en ce sens que l'Apostre prend le mot de Christ deux versets au dessus de celuy-cy, où il dit que *iusques à ce iourd'huy le voile demeure en la lecture de l'Ancien Testament sans estre osté; lequel , neantmoins , dit-il, est aboli par Christ.* Car c'est proprement par la revelation de l'Evangile que ce voile a esté dissipé: c'est la splendeur de la doctrine de salut , qui a fait evanouir les ombres de l'alliance & des ceremonies legales. Mais il est temps de venir à la consideration du second

Point, où nous devons rechercher pourquoy S. Paul dit que le Seigneur est cet Esprit là.

Quelques vns font icy vne observation qu'ils estiment estre d'importance. Ils disent que la Loy de Moyse est cy dessus appellée de ce nom de Lettre, parce qu'elle a esté donnée par écrit au commencement, & que la viue voix qu'on a employée depuis a en faire la lecture dans les Synagogues, & dans les maisons des particuliers, n'a esté qu'une chose subsidiaire à l'Ecriture, & qui s'administroit par toutes sortes de gens. Mais que cela n'égaloit aucunement la dignité & l'autorité de l'Ecriture, dans laquelle la Loy auoit esté consignée, tant par le soin de Dieu mesme, qui en auoit graué les deux Tables de son doigt, que par le ministere de Moyse, qui en

a composé quatre grands volumes entiers, ou il en a expliqué toutes les particularités avec vne exactitude émerueillable. Quant à l'Euangile, il semble qu'ils vueillent pretendre qu'il ait esté nommé Esprit pource qu'il a esté premierement presché de viue voix, & que la viue voix est vn souffle ou vn esprit qui sort de la bouche de l'homme; & que l'Ecriture, que les Apostres & les Euangelistes ont employée pour le laisser à la posterité, n'a esté qu'une chose pareillement subsidiaire à la viue voix, à ce que la doctrine de salut fust conseruée plus seurement, & commise à vne plus fidelle garde que ne peut estre la memoire & la tradition des hommes. Encore qu'il y peust auoir en cela quelque chose de veritable (quoy qu'il y a beaucoup à dire en cette obseruation) ce

n'est pourtant pas là la raison pourquoy l'Apostre fait cette opposition entre la Lettre & l'Esprit, & luy même nous fournit en ce chapitre le moyen de faire là dessus des considerations beaucoup meilleures. Au verset troisieme il parle ainsi aux Corinthiens. *il paroist en vous que vous estes l'epistre de Christ, administrée par nous, & écrite non point d'encre, mais de l'Esprit de Dieu vivant: non point en placques de pierre, mais en placques charnelles du cœur.* Puis apres auoir dit que cela ne vient pas de luy ny de ses compagnons en l'Apostolat, mais de Dieu, il adjouste: *lequel nous a rendus suffisans pour estre ministres du Nouveau Testament; non pas de lettre, mais d'esprit: car la Lettre tue, mais l'esprit vivifie.* Là il oppose l'Ancien Testament au Nouveau; les placques de pierre, dans lesquelles la

loy fut gravée, aux placques charnelles du cœur ; & la lettre , qui est la graveure de la Loy dans les tables de pierre , à l'Esprit qui imprime l'Evangile dans le cœur. Tellement qu'il veut dire que la Loy n'a point esté accompagnée de la vertu de l'Esprit , mais que l'Evangile en est accompagné ; d'où vient que la Loy n'a esté écrite que dans les Tables & dans les livres esquels elle a esté laissée au peuple d'Israël ; au lieu que l'Evangile penetre par la vertu de l'Esprit dans les cœurs & dans les ames des hommes. Ainsi Moyse & les autres predicateurs de la Loy ont reçu de Dieu le ministere de la Lettre : S. Paul & les autres Apostres ont reçu de Iesus Christ le ministere del'Esprit.

En effect , mes Freres , si nous examinons la chose comme il faut , nous trouuerons dans ce
que

que l'Apostre dit icy diuerſes inſtructions ſouuerainement conſiderables. Vous aués quelques fois entendu de nous qu'il faut ſoigneuſement diſtinguer en cette ancienne Economie ſous laquelle les Iſraélites ont veſcu, l'alliance de la Loy preciſément conſiderée en elle meſme, d'avec les ſemences & les elemens de l'alliance de Grace, qui ſont ſemés çà & là dans les liures des Prophetes, & qui conſiſtent dans les Promeſſes de miſericorde, & particulièrement dans les oracles qui concernent le Redempteur. Car quant à l'alliance de la Loy, qui dit, *Fay ces choſes & tu viuras*, & *Maudit eſt quiconque n'eſt permanent dans toutes les choſes de cette Loy pour les faire*, ce n'a nullement eſté le miniſtere de l'Eſprit. La pluſpart de ceux à qui cette Loy a eſté donnée n'en ont eſté non

plus émeus que des rochers , & n'en ont senti aucune vertu pour la sanctification de leurs ames. D'où viennent ces frequentes plaintes des Prophetes , ces declamations si vehementes & si pathetiques contre les vices de leur temps , & ces terribles menaces des iugemens de Dieu contre la dureté & l'impenitence des hommes. L'Apostre S. Paul en fait vn recueil au chapitre troisieme de l'Epistre aux Romains , où il nous donne la portraiture du débordement de ceux qui ont vescu sous le Iudaïsme. *Il n'y a*, dit-il, *nul iuste , non pas vn seul. Il n'y a nul qui entende ; il n'y a nul qui recherche Dieu. Ils ont tous fourvoyé , & ont esté ensemble rendus inutiles ; il n'y a nul qui face bien , non iusqu'à vn. C'est vn sepulcre ouuert que leur gosier ; ils ont frauduleusement usé de leurs langues ; sous*

leurs levres il y a venin d'aspic. Desquels la bouche est pleine de malediction & d'amertume. Leurs pieds sont legers à épandre le sang ; destruction & misere est en leurs voyes ; Et n'ont point connu la voye de paix. La crainte de Dieu n'est point devant leurs yeux. A quoy il adjouste que ce que la Loy dit, elle le dit à ceux à ceux qui sont sous la Loy, afin que personne ne s'imaginast qu'il eust voulu décrire la condition des Gentils, & non celle de la nation Judaïque. Que s'il y a eu quelques vns d'entre les Juifs, qui ne fussent pas veritablement fides & participans de la vraye sanctification, & dont neantmoins la vie ne fust pas si horriblement débordée que porte la representation que l'Apostre S. Paul en fait là, qui, dije, se continssent en quelque respect de la Loy, & des institutions divines, (& il ne faut

nullement douter qu'il n'y en ait eu quelques vns.) comme ils n'auoyent pas cela de leur nature, laquelle est également corrompue en tous, aussi ne le tenoyent ils pas de cet Esprit d'adoption & de sanctification qui accompagne l'Evangile. C'estoit ce que l'Apôstre S. Paul appelle *l'Esprit de seruitude*, qui agissoit en eux, qui leur imprimoit en l'ame quelque terreur des menaces de la Loy, qui excitoit en eux quelque desir de la recompense dont elle proposoit l'esperance, où qui en fin leur donnoit quelque legere & quelque euanoüissante connoissance de la sainteté qui reluisoit dans les commandemens de Dieu, & qui refrenoit pour vn peu de temps l'impetuosité de leur corruption, iusques à ce qu'il s'éleuaist en leurs cœurs vne passion vn peu turbulente. Car alors ny

Rom.
2.

les mouvemens d'esclauve , que la peur des menaces engendroit, ny les desirs de mercenaire , que la promesse de la recompense produisoit, ny cette telle quelle idée de la pieté & de la vertu, dont la connoissance de la sainteté de la Loy donnoit quelque reverence , n'estoit pas capable d'empescher que leur corruption ne les emportast à l'abandon , & que comme dit S. Paul , la Loy ^{Rom.} de l'entendement ne fust emmenée prisonniere sous la loy de péché, qui dominoit absolument en leurs membres. Tellement que la Loy, ainsi précisément considérée en elle mesme , n'estoit point le ministration de l'Esprit, puis qu'elle n'illuminait pas les entendemens des hommes efficacement, & qu'elle ne sanctifioit pas véritablement leurs affections, ce que la seule grace de l'Esprit de

Iesus Christ peut faire. Aussi certes la nature de la Loy n'estoit elle pas capable d'estre accompagnée de cet Esprit qui engendre la vraye pieté, & la vraye sanctification dans les hommes : non à cause d'elle mesme, mais à cause de la corruption de la nature, & de la condition dans laquelle nous sommes tombés. Car l'Esprit ne se communique sinon pour disposer interieurement les facultés à recevoir l'objet tel que la predication de la Parole le propose exterieurement. De soy mesme il ne fournit point d'autres motifs à la pieté ny à la sainteté, que ceux que la Parole exterieure presente. Quand donc il eust parfaitement bien disposé les esprits des hommes à recevoir la persuasion de cette verité, que Dieu ne manqueroit pas de donner la recompense de la vie à ceux qui ac-

compliroient entierement ses commandemens, quelle esperance est-ce que cela pouuoit engendrer en ceux qui se voyoyent si fort éloignés de leur auoir rendu vne pleine & entiere obeïssance? Quand il les eust rendus capables de receuoir cette persuasion que Dieu ne manqueroit pas à punir la transgression de ses lois, que pouuoit cela produire en eux sinon vn inconsolable desespoir, parce qu'ils sçavoyent bien qu'ils les auoyent violées? Quand il eust illuminé leurs entendemens à tel point qu'ils eussent peu apperceuoir toute la beauté de la vertu, & toute l'excellence de la pieté qui est prescrite par la Loy, quelles bonnes inclinations est ce que cela pouuoit donner à des ames qui se voyoyent absolument privées de l'esperance de la felicité, & assujetties ir-

revocablement à vne malediction
eternelle ? L'amour de Dieu , &
le defespoir ; la vraye pieté , & le
sentiment eternel de la maledi-
ction de Dieu , ne font-ce pas
choses incompatibles en nostre
nature ? La Loy donc non seu-
lement n'estoit point le ministere
de l'Esprit , mais mesmes elle ne
le pouvoit pas estre.

Pour ce qui est des semences
de la Grace , & des elemens de
cette alliance salutaire dont
Christ est le Mediateur , il n'y a
point de doute que Dieu ne les
ait accompagnés de quelque effi-
cace de son Esprit enuers ses élus
sous la dispensation du Vieux
Testament. Ceux dont l'Apostre
nous propose les exemples à imi-
ter , au chapitre onzieme de l'E-
pistre aux Hebreux , en sont des
témoignages assurez , & c'estoit
parmy cette nation là seule alors ,

que Dieu se conseruoit vne Eglise. Tellement que cette appellation de miniftre de l'Efprit, pourroit bien conuenir à cette partie de l'économie ancienne, fi vous la confiderés absolument en elle mefme. Neantmoins, deux chofes principalement font que l'Apoftre S. Paul attribue ce tiltre à la pleine reuelation de l'Euangile de Iefus Chrift, comme fi c'eftoit excluſiuement à toutes autres chofes. L'une eft, que ces commencemens ont efté fi petis, en comparaifon de la plénitude de la chofe mefme, qu'à peine font ils reconnoiffables. Car foit que vous ayés égard au nombre des perſonnes à quicet Efprit d'illumination, de conſolation, & de ſaincteté a efté autrefois communiqué, il a efté tres-petit au prix de la multitude innombrable de ceux qui l'ont reçu ſous l'Euangile.

Soit que vous regardiés à la qualité & à la mesure de leurs dons, les temps de la nouvelle Dispensation y ont vn incomparable auantage. Or sçaués vous qu'en telles comparaifons le lustre de ce qui est de beaucoup plus lumineux & plus éclattant , ternit & efface tout à fait ce peu qu'il y pourroit auoir d'éclat dans les choses moins considerables. L'autre est , que tandis que l'alliance de la Loy a eu vigueur , les semences de l'Euangile sont demeurées tellement meslées avec elle , & tellement obscurcies de ce voile qui les couvroit , qu'elles sembloient faire partie de son ministere. De sorte que comme encore que pendant la nuit il paroisse quelques étoiles dans le ciel , qui ne font point partie de festenebres , puis qu'elles sont lumineuses en elles mesmes , ce

temps-là pourtant ne laisse pas de s'appeller la Nuit, dautant que les tenebres y preualent; bien que dans l'economie legale, ceux qui y sont attentifs y remarquent les commencemens de la Grace, qui ne font point partie de la Loy, mais appartiennent à l'Evangile de Iesus Christ, ce temps-là ne laisse pas de s'appeller le temps de la Loy. Comme à l'opposite nous appellons l'Evangile; la dispensation qui a coulé depuis l'ascension de nostre Seigneur, quoy que quelquesfois il se mesle dans la predication de la doctrine de salut, quelques nuages de la Loy, ainsi que les occurrences le demandent.

L'Evangile donc est le ministere de l'Esprit; ce qui merite vne consideration plus exacte & plus attentue. Et premierement, encore que tous ceux à qui il est an-

noncé n'y croient pas, si estce qu'il n'est annoncé nullepart que quelques vns n'y croient. Car telle est la conduite de la Prouidence de Dieu, tel est l'honneur qu'il a voulu faire au nom de son S. Fils Iesus, qu'il ne veut pas qu'il soit presché en aucun endroit où il ne déploye quelque efficace. C'est vne semence qu'il ne veut pas que ses seruiteurs épandent inutilement sur du sable ou sur des rochers. Il veut bien certes qu'ils l'épandent sur le sable, & qu'ils la sement sur les rochers: car nos cœurs ont naturellement aussi peu de disposition à la recevoir, que le grauiier qui est au riuage de la mer, ou que les plus durs cailloux des monts Pyrenées. Mais afin qu'ils ne le facent pas inutilement, il amollit ce miserable terroir, il l'engraisse, & le détrempe, & par la vertu de son

son Esprit, & de ses interieures operations, il le rend toujours en quelques vns propre à la recevoir en son sein, & fait qu'elle y germe, qu'elle y iette des racines bien avant, & qu'elle y fructifie à vie eternelle. Apres cette premiere illumination de l'entendement, qui produit la foy en nous, & qui nous introduit en la communion du Sauveur du monde, il n'y a aucun de ceux à qui elle s'est fait sentir, qui ne tire diuerfes autres graces de la participation à l'Esprit qui en decoule. Car premierement, à ceux qui croient en Christ, Dieu donne la remission de leurs pechés; & tout aussi tost qu'il les a iustificés par là, il verse sa consolation dans leurs cœurs, & en les assurant de leur reconciliation avec luy, il les remplit de sa paix, & d'une ioye inenarrable & glorieuse. Et c'est l'Es-

prit de nostre Seigneur Iesus Christ qui fait cela, en nous arroufant du sang de sa croix, & en imprimant profondement en nos cœurs les promesses de son Evangile. Puis apres, ce mesme Esprit qui s'est déployé en nostre consolation, se déploye pareillement en la sanctification de nos ames. Car c'est luy qui les remplit de gratitude par le sentiment qu'il nous donne du bienfait inestimable de nostre salut : c'est luy qui enflamme nos cœurs d'amour enuers Dieu, par l'assurance qu'il nous donne de son eternelle & invariable dilection ; c'est luy qui nous estreint des liens de la charité de Christ, & qui nous imprime cette pensée, que si vn est mort pour tous, tous aussi sont morts : c'est luy qui graue dans nos esprits le saint portrait de sa croix, & de sa resurrection d'en-

tre les morts, & qui le rend efficace à la mortification du vieil homme & à la viuification du nouuel Adam en nous : c'est luy qui reuele à nos entendemens la beauté de la sainteté, & la vénérable idée des vertus de nostre Seigneur, & les motifs de la piété, & les argumens de la charité, qui nous sont fournis en l'Euan-gile : c'est luy qui fait descendre la vertu de toutes ces choses iufques dans nos affections, qui chasse la corruption & l'excès de nos passions, qui reduit nos conuotifes sous l'empire de la raison, & qui emmene toutes nos pensées captiues sous l'obeïssance du Sauueur du monde. Des inspirations de ce mesme Esprit nous vient le courage dans nos combats, la patience dans nos afflictions, la constance invincible au milieu de toutes les tentations dont nous

Rom.
37. 38.

hommes attaqués, le mépris du monde, l'attente des choses du ciel, l'assurance contre la mort, & contre tous les autres ennemis de nostre salut, l'esperance certaine de la resurrection de nos corps, & de leur transport là haut en gloire. En fin, des inspirations de ce mesme Esprit nous viennent ces admirables eleuations, qui nous font brauer & la vie, & la mort, & les Anges, & les principautés, & les puissances, & les choses presentes, & celles qui sont à venir, & les hauteesses, & les profondeurs, & toutes les autres creatures, comme incapables de nous separer de la dilection de Dieu, laquelle il nous a montrée en nostre Seigneur Iesus Christ. Ce sont là, mes Freres, les causes principales pour lesquelles l'Euangile est appelé le ministere de l'Esprit.

On y en pourroit encore ad-
 jouter vne autre qui merite qu'on
 la considere : c'est que ça esté l'E-
 uangile qui a apporté l'accom-
 plissement des Propheties par les-
 quelles Dieu auoit autrefois pro-
 mis d'enuoyer & de repandre de
 son Esprit sur toute chair ; ce qui ^{Ioal 2.}
 regardoit aussi ces dons extra-^{18.}
 ordinaires & miraculeux qui
 ont rendu au commencement la
 predication de l'Euangile si glo-
 rieuse. En effect l'Apostre met
 cela entre les auantages qui signa-
 lent l'Euangile par dessus la Loy,
 & qui doiuent sans contredit
 nous induire a preferer cette nou-
 uelle dispensation à l'ancienne.
Je voudroy, dit il aux Galates, Gal. 3.
seulement entendre cecy de vous ; 2. 3. 4.
Aués vous receu l'Esprit par les œu-
res de la loy, ou par la predication de
la Foy ? Estes vous tant insensés
qu'ayant commencé par l'Esprit,

M 3.

*maintenant vous finissies par la chair? Celuy donc qui vous fournit l'Esprit, & qui produit les vertus en vous, le fait il par les œuvres de la Loy, ou par la predication de la Foy? Et qu'il entende là par l'Esprit les graces extraordinaires & miraculeuses qu'il cōmuniquoit alors, il en appert par ce mot de *vertus*, qu'il adjouste pour servir d'explication; & parce que si les Galates eussent receu ces autres dons ordinaires de l'Esprit qui consistent en foy, en consolation, en sanctification, & en illumination des verités salutaires, ils eussent eu de tout autres sentimens. que ceux qui obligeoyent S. Paul à les reprendre comme il fait, iusques à leur reprocher que les faux docteurs leur ont perverti l'entendement, comme par quelque espece d'enfercellement & de charme. Et ailleurs le mesme A-*

postre, en faisant le denombrement des choses que Dieu départoit alors liberalement à son Eglise par la communication de l'Esprit, s'exprime en cette sorte. *A chacun est donnée la manifestation de l'Esprit pour ce qui est expedient. Car à l'un est donnée par l'Esprit la Parole de sagesse : & à l'autre selon le mesme Esprit la Parole de connoissance : A l'autre Foy en ce mesme Esprit : à l'autre dons de guérison en ce me Esprit : A l'autre operations de Vertus, à l'autre prophetie : & à l'autre le don d'interpreter diuers langages.* Où vous voyés qu'il n'oublie pas les dons extraordinaires & miraculeux. Neantmoins, mes Freres, ie ne doute pas que S. Paul n'appelle plustost l'Evangile, le ministere de l'Esprit, à l'occasion des graces ordinaires dont ie vous ay parlé cy-dessus, que non pas à l'occasion des autres.

1. Cor.
 12. 7. 8.
 9. 10.

Car la foy, l'esperance, la charité, sont vertus salutaires d'elles mesmes, quand bien on n'auroit pas le don de parler diuers langages, ou celuy des guerisons. Au lieu que ny la faculté de parler diuers langages, ny celle des guerisons, ny les autres graces de cette nature, ne sont point salutaires d'elles mesmes, si elles sont destituées de la Foy & de la vraye sainteté. Ce qui monstre qu'encore que ces dons miraculeux ayent plus d'éclat, & fassent plus de bruit, & donnent beaucoup plus d'admiration, si est-ce que ces autres vertus, qui ne reluisent que dans le dedans, sont incomparablemēt plus excellentes. Or est il raisonnable que l'Evangile tire cette glorieuse appellation, de ses operations plus considerables. Adioustés à cela que quand l'Apostre le nomme ainsi,

il luy veut donner vn nom qui luy conuienne en tout temps. Or ces dons miraculeux n'ont éclaté qu'au commencement de la predication : au lieu que la communication de ces graces salutaires de l'Esprit est perpetuelle en l'Eglise, & doit accompagner l'Euangile iusqu'à la consommation des siècles. En vn mot, l'Apostre nomme ainsi l'Euangile pour luy attribuer ce qu'il dit qui ne conuient point à la Loy. Or est il certain que son intention n'est pas proprement icy d'oster à la Loy cet auantage d'estre le miniftaire des vertus, c'est à dire, des dons extraordinaires & miraculeux : mais bien de luy oster la gloire d'auoir peu consoler les ames des hommes par le sentiment de leur iustification, & de leur auoir peu communiquer la vraye sainteté, & donner vne certaine

esperance de la vie. Car ce sont ces choses là qu'il a accoustumé de nier que la Loy puisse conferer, comme il est clair nommément par les sept ou huit premiers chapitres de l'Epistre aux Romains; comme aussi ce sont elles qu'il attribué à l'Evangile de Iesus Christ à l'exclusion de toute autre chose.

Cela ainsi expliqué, il ne me reste plus rien à dire sur ce Point, sinon que puisque S. Paul appelle la Loy de Moyse du nom de Moyse mesme, & l'Evangile de Iesus Christ, du nom mesme du Seigneur; de la mesme façon que l'on peut dire que Moyse est cette Lettre dont il a parlé dans les versets precedens, l'on peut dire pareillement que *le seigneur est cet Esprit là*, dont il a aussi parlé dans les mesmes lieux, en entendant par *Moyse* l'alliance de la Loy,

& par *le Seigneur* l'alliance de l'Evangile. Parce que comme il n'y a aucune partie de la Loy qui n'ait esté gravée en lettres par le doigt de Dieu, ou écrite de la main de Moyse, il n'y a non plus aucune partie de l'Evangile qui ne soit comme animée de cet Esprit de nostre Seigneur, & par l'entremise de laquelle cet Esprit ne d'éploys son efficace. Tellemēt que comme la Loy estant vn corps de doctrine destitué d'esprit, & par consequent depourueu d'efficace & de vigueur, elle ne peut estre mieux designée que par le nom de ce qui seul y paroist, qui est la Lettre & les caractères dans lesquels elle a esté consignée: l'Evangile estant vn corps de doctrine que l'Esprit de Dieu informe, par maniere de dire, & anime de toutes parts, & qui par consequent est plein de vigueur & d'a-

Étiuité, il ne peut estre mieux designé que par le nom de ce qui le rend ainsi agissant, & qui se manifeste magnifiquement en toutes ses parties. Car de fait, il ny a rien en toute la Religion Chrestienne, soit que vous la considériez dans les histoires où la naissance, la vie, la predication, les miracles, les souffrances, la resurrection de Christ, & son ascension aux cieux nous sont rapportées; soit que vous la regardiez dans les doctrines qui dependent de ces histoires, & dans les promesses qui y sont fondées: soit que vous la contempliciés dans les saintes ceremonies qui ont esté instituées pour nous représenter quelques vnes de ces histoires, & pour nous confirmer ces dogmes & ces promesses qui contiennent l'esperance du salut, qui ne soit rempli de cette vertu de l'Esprit,

l'Eprit , a peu pres comme l'ame d'un homme viuant & sain remplit vniuersellement tous ses membres. De sorte que comme dans vn homme sain & viuant, l'ame donne à tous ses membres le mouuement & la vigueur necessaire pour leurs operations , à chacun selon la nature des fonctions à quoy il a esté destiné par la nature; dans la Religion Chrestienne, telle que nostre Seigneur & ses Apostres en ont fait l'establissement , cet Esprit donne à toutes les choses qui la composent la vertu d'agir puissamment en l'esprit humain , à chacune selon son genie, & selon la nature des qualités à la production desquelles elle est destinée de par Dieu. Vient maintenant à estre consideré le troisieme Point, où S. Paul dit que là où est cet Eprit du Seigneur, là est liberté. mo

N

Pour bien expliquer cela , mes Freres, il faut continuer à remarquer l'opposition que l'Apostre fait icy entre *Moyse & le seigneur*, c'est à dire , entre la Loy & l'Evangile. Car tant s'en faut que la Loy ait esté l'alliance de liberté, qu'au contraire, ç'a plustost esté la conuention par laquelle le peuple d'Israel estoit mis en servitude. Ceste promesse, *Fay ces choses & tu vivras*, en des esprits corrompus, tels que sont ceux des hommes naturellement; ne produisoit point d'autres mouvemens que sont ordinairement ceux des mercenaires, qui ne s'affectionnent aux choses qu'on leur commande , sinon par ce qu'ils s'attendent d'en estre recompensés. Hors cela , non seulement ils n'y ont point d'inclination, mais mesmes le plus souvent ils ont de l'auersion contre leur ou-

vrage. Or entre la disposition de ces mercenaires, & celle des esclaves, il ny a presque point de distinction, comme entre leur condition il n'y en a gueres. Ceste menace, *Maudit est quiconque n'est permanent en toutes les choses de cette Loy pour les faire*, en des esprits ainsi disposés, ne pouvoit engendrer d'autres sentimens que ceux des esclaves, qui ne sont ordinairement contenus en leur devoir que par la crainte des fouës & des écourgées. Hors cela, tant s'en faut qu'ils se portent volontairement à faire ce qui est de la volonté de leurs maîtres, qu'ils murmurent & grondent en leurs cœurs contre leurs commandemens, & qu'ils nourrissent au dedans vne haine tacite contre leurs personnes. Et cela s'est d'autant plus verifié entre eux qui ont esté sous la Loy, que les merce-

naires esperent certainement leur recompense, parce qu'ils n'entreprennent point de besongne dont ils ne puissent venir à bout: & que les esclaves ne desesperent pas de pouuoir euites les effects de la colere de leurs maistres, parce que communément, quoy que les commandemens qu'on leur fait soyent difficiles, ils ne sont pourtant pas absolument impossibles à executer. Au lieu que ceux d'entre les Juifs qui se sont attachés à ces deux formules de la Loy, pour obtenir le salut par là, ont enfin esté contraincts d'abandonner l'esperance de la recompense, parce qu'ils voyoyent bien qu'ils ne pouuoient accomplir les commandemens de Dieu; & se sont trouués ineuitablement engagés dans la souffrance de la punition, d'autant qu'ils les auoyent transgressés,

& qu'ils en estoient conuaincus en leurs consciences. Or des ames mal constituées, comme sont naturellement les nostres, ne se portent iamais à aimer ceux dont elles n'esperent point de bien, & se portent toujours à haïr ceux dont elles attendent du mal; & moins on void d'occasion d'esperer, & plus le bien de l'esperance duquel on dechet est grand, moins a-t-on de disposition à l'amour : & derechef, plus on void de suiet de craindre, & plus le mal auquel on se void assujetti est à redouter, plus a-t-on les inclinations à la haine & à l'aersion violentes & implacables. Aussi voyez-vous qu'au chapitre quatrieme de l'Epistre aux Galates, S. Paul interpretant l'histoire d'Agar & d'Ismael allegoriquement, tire cette conclusion de l'allegorie qu'il y trouue, c'est que

tout autant qu'il y a eu de Iuifs, qui ont voulu estre iustificiés par la Loy, ç'ont esté autant d'esclaves. Car il dit qu'Agar a representé l'alliance de la Loy, en ce qu'estant serue quant à son estat, elle ne pouuoit engendrer d'enfans qui ne fussent de mesme condition avec elle. Il dit qu'Ismael a representé les Iuifs qui ont suivi l'alliance de la Loy comme la mere qui les auoit engendrés, en ce qu'il n'a point esté tenu pour semence d'Abraham, mais qu'il a esté conté entre ses esclaves. Il dit qu'Agar & son fils, ayant esté chassés de la maison d'Abraham, en suite de cet oracle, *iette hors la seruante & son fils, car le fils de la seruante ne sera point heritier avec le Fils de la franche*, ont esté des images de la condition de la Loy, qui a fait place à vne autre alliance, & de la condition

des Juifs, qui ont esté exclus de de l'heritage du Pere celeste.

Il y a plus. C'est que les fidelles mesmes, qui ont eu recours pour leur iustification, à la remission de leurs pechés, comme David au Pseaume trente deuxieme, & qui en suite ont receu quelque mesure de l'esprit de sanctification, & au cœur de qui a relui quelque beau rayon de l'esperance de l'immortalité glorieuse, comme vous en voyés des enseignemens & ailleurs, & particulièrement dans les Pseaumes du mesme Prophete; bien qu'ils fussent enfans, n'ont pas laissé de tirer quelque chose de la condition des esclaves. S. Paulle dit ex Gal. 4.
 pressément en ces termes. *Je dis 1. 2. 3.*
que durant tout le temps que l'heritier est enfant, il n'est different en rien du serf, combien qu'il soit seigneur de tout: Mais il est sous tu-

teurs & curateurs, iusques au temps déterminé par le pere. Nous aussi pareillement, lors que nous estions enfans, nous estions asservis sous les rudimens du monde. En effect, la Loy ceremonielle estoit vne discipline rigoureuse, & dont l'exacte obseruation auoit quelque chose de seruile. Plus la Loy Politique particularisoit scrupuleusement tous les devoirs auxquels les Israélites estoient assujettis en qualité de citoyens d'une Republique, & de membres d'un Estat, plus resserroit-elle leur liberté. Et les fidelles estoient obligés à l'obseruation de ces deux Loys, aussi bien que les autres. Pour ce qui est de ces deux formules; *Fay ces choses & tu viuras*, &, *Maudit est quiconque n'est permanent en toutes les choses de cette Loy pour les faire*, ils y auoyent renoncé, pour auoir recours aux promesses de Grace.

& de remission, & aux oracles qui donnoient esperance d'un Redempteur, en quoy ie vous ay dit souuent que consistoyent les principes de l'Evangile. Mais neantmoins ces paroles retentissoient à leurs oreilles si souuent, Moysé & les Prophetes les inculquoyent avec tant d'emphase, Dieu mesme les accompagnoit d'une telle efficace de sa vertu, pour penetrer dans les cœurs, & pour rendre les hommes capables de reconnoistre le besoin qu'ils auoyent de misericorde & de Redempteur, qu'il estoit impossible qu'elles ne produisissent dans les fideles quelques vns de ces mouuemens de mercenaires & d'esclaves dont ie vous parlois tantantost, qui se mesloyent avec ces autres sentimens qu'engendroyent les semences de la Grace. A peu pres comme vous voyés.

que les enfans qui font en leur bas aage éleués vn peu rigoureusement, & sous la verge d'un pere seuer, sçauent bien qu'ils sont enfans, & la connoissance qu'ils en ont leur donne des sentimens & d'amour pour leur pere, & de consolation pour eux. Mais neantmoins, à la moindre demonstration que le pere fait de son courroux, ils sentent de telles émotions de crainte & d'épouuancement en leurs cœurs, qu'à les voir pallir & trembler vous ne les distingueries pas d'avec les esclaves. C'est ce qui fait dire à S. Paul en opposant les temps de l'Euangile à ceux de la Loy, que *nous n'auons point receu l'Esprit de seruitude, pour estre de rechef en crainte.* Et c'est là mesme qu'il faut rapporter cet autre celebre passage; *que Christ a participé à la chair. & au sang, afin que*

Rom.
8.

par la mort, il destruisist celui qui auoit l'empire de mort, c'est assaïoir le Diable; & qu'il en deliurast tous ceux qui pour crainte de mort estoient toute leur vie assuiettis à seruitude.

Telle a esté, mes Freres, l'alliance de la Loy, à laquelle celle de l'Euangile est directement opposée. Car elle ne denonce pas vne malediction irreuocable à tous ceux qui auront transgressé les commandemens de Dieu: au contraire, elle en offre la remission & l'abolition entiere au sang de nostre Seigneur Iesus. Elle ne propose pas l'esperance de la vie sous la condition de les accomplir: elle l'offre comme vn don gratuit, procedant de la pure liberalité de Dieu, qui n'exige autre condition de nous sinon que nous ne la refusions pas, que nous la receuions avec foy, que nous soyons persuadés qu'il est si mi-

fericordieux enuers nous qu'il la nous donne. Ainsi la grace de la remission nous oste la crainte, qui est la passion des esclaves. Le don liberal & gratuit de la vie, nous oste de la peine de l'acquiescer par nostre travail ; ce qui est la peine des mercenaires. Le sentiment de nostre iustification deuant Dieu, & l'esperance de la iouissance de sa gloire, fondée sur le don qu'il nous en a fait, remplit nos ames de ioye & de consolation, & les enflamme d'amour & de dilection enuers Dieu qui nous a procuré cet inestimable bien fait, & enuers nostre Seigneur Iesus Christ, en consideration de qui le Pere celeste le nous donne. Car naturellement nous n'auons point d'auersion contre ceux de qui nous ne receuons point & n'attendons point de mal : & s'il y a en nous quelque
gratitude

gratitude & quelque generosité, nous aimons ceux de qui nous auons receu du bien, & sentons accroistre & redoubler nos affections à proportion de ce que les biens que nous en auons receus sont grands, & que nous auons connoissance de leur excellence. Aussi voyés vous que le mesme S. Paul, au mesme endroit où il explique allegoriquement l'histoire d'Agar, interprete celle de Sara d'une façon toute opposée. Car il veut que Sara, qui estoit libre de condition, & femme legitime d'Abraham, ait esté l'image de l'alliance Euangelique : & qu'Isaac, qui est né de Sara, libre de condition comme elle, & qui seul a esté reputé pour semence d'Abraham, ait esté le type des fidelles, que Dieu reputé seuls pour ses enfans : & en fin que le mesme Isaac, lequel en vertu

O

de cet oracle , *En isaac te sera appelée semence* , est demeuré dans la maison de son Pere , & a esté son heritier , ait representé la condition de ceux qui sont iustificiés par la foy , qui demeurent en la maison du Pere celeste à toujours , & qui auront part en son heritage. Et c'est ce qui luy fait dire encore , non seulement que nous n'auons pas receu l'Esprit de seruitude , pour estre derechef en crainte , mais aussi que *nous auons receu l'Esprit d'adoption* , par lequel nous crions *Abba Pere* : tellement que nous osons reclamer Dieu sous ce tiltre là avec vne pleine & entiere confiance. Et ailleurs. *Quand l'accomplissement*

Gal. 4. *du temps est venu , Dieu a enuoyé*
 4. 5. 6. *son Fils , fait de femme , & fait sujet à la Loy : Afin qu'il rachetast ceux qui estoient sous la Loy ; à celle fin que nous receussions l'adoption des*

enfans. Et pourtant que vous estes enfans, Dieu a enuoyé l'Esprit de son Fils en vos cœurs criant Abba, Pere; Parquoy maintenant tu n'es plus serf mais fils, que si tu es fils, aussi es tu heritier de Dieu par Christ. Comme il auoit dit aux Romains, que c'est ce mesme Esprit qui rend témoignage avec nostre esprit, que nous sommes enfans de Dieu; Et si nous sommes enfans, nous sommes donc heritiers; heritiers d'ye de Dieu, & coheritiers de Christ. Ce qui doit imprimer en nos cœurs de tout autres sentimens que ne sont ceux de la seruitude. Et la façon mesme de laquelle l'Euan-gile nous a esté presché & administré par les seruiteurs de Iesus Christ, y contribué merueilleusement. Car ils nous ont desliés de l'obligation à la Loy des ceremonies, & nous ont mis en cet égard dans vne pleine liberté. Ils

Rom.

8. 16. 17

nous ont affranchis de la necessité d'observer toutes les particularités de la Loy de la Police d'Israël, laissans les Princes & les Estats Chrestiens en la puissance de disposer de leur gouvernement à leur volonté. Ils n'ont imposé aux particuliers autre ioug en cet égard, sinon de s'assujettir franchement aux lois de leurs pays, & de rendre l'Evangile de Iesus Christ de bonne odeur par leurs bons exemples. Et quant à ces formules, *Fay ces choses*, &, *Maudit est*, on ne les entend du tout plus en leur predication; en leur place est venue ce que les Prophetes auoyent promis; vne voix qui crie incessamment, *Grace, Grace.*

Le ministere de Moyse estant tel, mes Freres, qu'à cause du mauuais naturel de l'homme, il engendroit à seruitude, & la seruitude produisant necessairement

la crainte, & la crainte estant vne passion qui oste la liberté & la franchise de parler, il n'estoit pas conuenable que Moyse parlast si librement & avec tant de hardiesse de l'esperance de salut, ny qu'il en découvrît les moyens ainsi clairement & tout à nu, comme ont fait les saints Apostres. Mais bien estoit il certes conuenable qu'il eust en sa personne quelque marque de la condition de son ministère, & de la façon dont il le deuoit exercer, telle qu'à esté le voile qu'il a mis sur son visage. Car comme ie vous ay dit vne autre fois, outre les autres considerations qu'il faut faire sur le voile de Moyse, il ne faut pas oublier celuy-cy, c'est que comme les voiles sont maintenant assés souvent des témoignages de tristesse & de dueil, c'estoyent autrefois ordinairement des témoi-

gnages de quelque fujetion, & d'une condition qui doit estre accompagnée de beaucoup de retenue, de circonfpection, & de crainte. Voilà pourquoy, comme Moysé couvroit la splendeur de son visage du voile qu'il y mettoit, il couvroit aussi l'esperance de salut, & des verités qui la produisent, de l'alliance de la Loy; & comme il ne pouvoit éclatter aucun rayon de la gloire de son visage, tandis que le voile estoit dessus, sinon rarement, & comme avec peine, il ne parloit aussi quant à luy de l'esperance du salut sinon fort échauffement, & avec beaucoup de reserve, comme si quelque timidité l'en eust empesché, & luy eust osté la liberté de la parole. Mais quant à l'alliance de l'Evangile, puis qu'elle deliure de seruitude, & qu'elle engendre à liberté, elle a deu

donner d'autres mouvemens à ceux qui en ont esté les predicateurs & les ministres. Car c'est elle qui donne l'adoption, & la qualité d'enfans en nostre Seigneur Iesus; c'est elle qui nous fournit l'Esprit qui sceille cette adoption en nos cœurs, & qui fait que non seulement nous parlons, mais mesmes que nous crions, Abba Pere. C'est elle qui nous inspire cette generosité que doivent avoir des enfans, principalement quand ils sont devenus grands, & qu'ils sentent en eux l'impression des louables qualités & des vertus de leur pere. Et si c'est là son genie, & le genie de ceux qu'elle engendre à Dieu, quel a deu estre celuy du ministre qui en devoit épandre la connoissance par toute la terre? quelle la magnanimité des Apostres à qui elle a esté commise pour la

nous annoncer ? quelle la façon de la publier, sinon ouverte, & libre, & sans hesitation, sans circuits, sans ambiguité, sans y mesler aucune des ombres de la Loy, ny aucune doctrine étrange ? Et c'est pourquoy l'Apostre, dans le chapitre immédiatement suiuant, faisant quelque reflexion sur ces paroles de Dauid au Pseaume

Pf. 116.
10.

CXVI. *I'ay creu, & pour ce ay-je parlé, & sentant en soy-mesme cet Esprit de Foy, qui auoit esté donné en vne mesure si considerable*

2. Cor.
4. 13.

tant à luy qu'à ses compagnons en l'Apostolat, se les applique, & à eux aussi en disant, Aussi croyons nous, & pourtant parlons nous, comme leur appartenant d'une façon particuliere. En effect si la foy donne la hardiesse de parler, & de témoigner la confiance qu'on met dans les promesses de Dieu, les Apostres ont deu

parler merueilleusement hardiment, en qui cette vertu estoit singulierement excellente. Si la connoissance nette & distincte qu'on a d'une verité, fait qu'encore qu'on n'y soit point appelé par vne charge particuliere, on a neantmoins de l'inclination à la publier, & en parler hardiment : les Apostres ayans vne si pleine certitude de la vie, & de la mort, & de la resurrection de nostre Seigneur Iesus, & en ayans esté establis par luy les témoins & les herauts, en ont deu testifier avec vne liberté incomparable. Si la persuasion sur laquelle on fonde l'esperance de quelque bien, porte naturellement les hommes à le témoigner par leurs paroles avec allegresse, cette vive & profonde persuasion que les Apostres auoyent de la verité des promesses du Redempteur, les a deu exci-

ter à s'en glorifier magnifiquement, & à en donner les mesmes sentimens, à en inspirer les mesmes émotions aux autres. C'est pourquoy S. Paul apres avoir dit, *Nous croyons, & pourtant parlons nous*, adjouste incontinent : *Sachans que celuy qui a ressuscité le Seigneur Iesus, nous ressuscitera aussi par Iesus, & nous fera comparoir en sa presence avec vous* ; comme si cette belle & glorieuse esperance ne leur permettoit pas de se taire. En fin, si cet Esprit de foy, qui se communique vniuersellement à tous les élus, est capable de leur donner de notables elevations d'esprit, pour confesser franchement le nom de nostre Seigneur Iesus, & pour publier sa verité salutaire ouvertement, sans crainte de quoy que ce soit, où les occasions s'en presentent, les Apôtres, à qui Dieu auoit adressé

de si admirables revelations , & à qui il auoit donné , non l'esprit de foy seulement , mais celuy de *connoissance* , & celuy de *sapience* , & celuy d'*intelligence* , en vn degré souverainement eminent , à qui il auoit fait voir des uisions , & fait sentir des transports , & experimenter des rauissemens , auxquels il n'y eut iamais rien de comparable , ont deu faire retentir cette divine verité qu'il leur auoit donnée en depost , avec vne admirable liberté , & d'une voix singulierement éclattante.

Vous voyés maintenant , Freres bien aimés , pourquoy l'Apostre S. Paul dit que le Seigneur est cet Esprit là , & que là où est l'Esprit du Seigneur là est liberté , & reconnoissés assés quel honneur les Apostres ont receu de là , quelle gloire en reiaillit sur leur ministere. La comparaison

qu'il fait à cette occasion entre sa charge, & celle de Moyse, seruiteur de l'Eternel, & l'avantage qu'il pretend y auoir sur ce personnage, à qui tous les siecles precedens n'auoyent rien veu de pareil, vous met dans l'esprit vne assés magnifique idée de la dignité de l'Apostre, sans qu'il soit besoin que j'insiste sur cette matiere. L'enseignement que vous aués à en tirer est, que puis que les Apostres ont esté tels, & honorés d'un si glorieux ministere, vous receuiés leurs enseignemés, vous deferiés à leurs exhortations, vous vous laissiés conduire sans resister à la doctrine qu'ils vous annoncent. Et certes il n'y a point de peine à les suiure. L'ay comparé deuant vous la dispensation legale à la nuit, dans les tenebres de laquelle il resplendit quelque lueur que les étoiles répandent.

pandent. Si vous estiés sous cette économie là, comme ont esté les fidelles autrefois, il faudroit que vous vous contentassiez de cette lumiere. Et vous sçaués, quelques claires que soyent les étoiles, avec quelle incommodité on marche la nuit, à quelles bronchades on est suiet, & mesmes à quelles frayeurs, principalement si on est près de l'ennemy, & si on oit quelque cri d'alarme. Et telle estoit la condition des fidelles sous le vieux Testament. Maintenant, en cette grande liberté avec laquelle les Apostres nous ont parlé, en cette grande clarté en laquelle ils nous ont reuelé l'Euangile du Sauueur, nous cheminons comme en plein iour, à la lumiere d'un beau midy, sans peril d'achoppement, sans crainte de mauuaise rencontre. Au reste bien que les Apostres ayent e

une grande prerogative, en ce qu'ils ont esté les herauts de cette alliance de liberté, & en quelque forte les dispensateurs de cet Esprit dont S. Paul parle en ce passage, parce que Dieu en acompagnoit leur ministere, il ne laisse pas de nous en reuenir aussi des vtilités & des auantages inestimables. Par cet Euangile nous auons esté affranchis; par cet Euangile nous auons obtenu la qualité d'enfans de Dieu; par cet Euangile nous auons receu la communication de l'Esprit de nostre Seigneur; par cet Euangile en fin nous auons esté faite participans de la liberté dont l'Apostre parle. Cela, mes Freres, doit chasser de nos cœurs toute crainte, excepté celle de pecher; cela doit exciter en nous des pensées non de vanité, mais de vraye generosité, & dignes de la vocation

à laquelle cette diuine alliance nous appelle. Pour rejeter tout ioug indigne de la liberté des enfans de Dieu, en cas qu'on nous en voulust imposer, & ne receuoir autres ceremonies en la Religion, sinon celles que le Seigneur Iesus a instituées. Pour ne nous laisser pas ramener dans l'ignorance des temps passés, & ne permettre pas qu'on estende aucun voile d'obscurité sur la doctrine de l'Evangile. Pour en contempler les lumieres, pour en approfondir les doctrines, pour en tirer les connoissances, & en receuoir les impressions, à la gloire de nostre Seigneur, & à la consolation de nos consciences. Pour en épandre mesmes la clarté, & la prouigner au long & au large, chacun selon la mesure de la grace de Dieu en luy, & la vocation à laquelle il est appelé : les mi-

nistres par la predication publique, les autres fides par les instructions & les conuersations particulieres, où les occasions s'en presenteront; à l'illumination de ceux de dehors, & à la consolation de nos freres. Pour confesser tous ensemble, & chacun en son endroit, hautement & franchement le nom du Seigneur Iesus, & pour n'en estre point empeschés, quelque peril que nous y vissions, à quelque persecution que nous fussions exposés de la part de ses adversaires. Enfin, pour en faire luire la splendeur sur toutes nos actions, & rendre nostre profession glorieuse en la sainteté de nostre vie. Car la voix est bien l'instrument ordinaire de la predication, mais la vie est ce qui luy donne vne merueilleuse efficace. La liberté avec laquelle on publie cet

te Verité, est digne de son genie, & de son origine celeste, & est vn effect, & vne marque de l'Esprit de foy qui la reuele, & qui l'imprime dans les cœurs; mais la sainteté des mœurs, la iustice en nostre conduite, la pieté enuers Dieu, la charité enuers le prochain, est vne preuve & vn caractere indubitable de cet Esprit de sanctification, qui anime, qui vivifie, qui rend efficace l'Evangile du Seigneur, & qui en remplit toutes les parties. Monstrés doncques, Freres bien-aimés, que vous en aués esté faits participans, & en la iouissance de cette sainte liberté en laquelle l'Esprit de nostre Seigneur Iesus vous a mis, attendés la revelation de celle de la gloire des enfans de Dieu, dont il vous a donné l'esperance. A luy, comme au Fils, & au saint Esprit, vn seul Dieu

benit eternellement , soit gloire,
force , & empire dès maintenant
& à iamais : A M E N .



SERMON
SVR CES PAROLES
DE S. PAVL,

2. Cor. chap. 3. v. 18.

*Ainsi nous tous qui contempons
en un miroir la gloire du Sei-
gneur à face découuerte, som-
mes transformés en la mesme
image, de gloire en gloire,
comme de par l'Esprit du Sei-
gneur.*



RERES BIEN-AI-
MÉS EN NOSTRE
SEIGNEVR:

Il n'est pas besoin d'e-
stre Astronome, mais seulement

d'auoir des yeux, & de les élever la nuit en haut, pour reconnoistre que dans le ciel il y a quelques endroits plus clairs & plus lumineux que les autres. Et cette plage qu'on appelle ordinairement la voye de lact, en peut porter vn suffisant témoignage. Ceux qui vacquent attentivement à la contemplation des choses de la Nature, croient que la lumiere qui paroist en ces endroits là, vient d'vne grande & comme innombrable quantité de petites étoiles que Dieu y a semées à l'heure de la creation; & si cette opinion n'a esté receüe entre les Philosophes pour vne indubitable verité, au moins a-t-on confessé qu'elle auoit beaucoup d'apparence. Neantmoins, lors qu'il a esté question de distinguer ces étoiles les vnes d'avec les autres, comme on fait en chaque constel-

lation, ou leur multitude, qui les confond, ou leur petitesse, qui les dérobe à la veüe, ou la foiblesse des yeux des hommes, qui n'ont pas ce sens si lointain que quelques vns des animaux, a toujours empesché qu'on n'en peust venir à bout. De sorte que quand on s'est arresté à contempler cette clarté, on en a toujours esté plus touché d'admiration, qu'on n'en a remporté de satisfaction par la connoissance nette & distincte de sa cause. Or n'est-ce pas sans beaucoup de raison que quelques vns ont comparé l'Ecriture sainte au Ciel, à cause de plusieurs beaux rapports qui s'y rencontrent; entre lesquels i'estime qu'on peut à bon droit conter celuy que nous fournit la lecture de ce passage & de quelques autres. Car il ne faut pas estre Theologien non plus, mais seulement auoir

les yeux de l'entendement vn peu illuminés de la connoissance de la Religion Chrestienne, pour appercevoir que cette sentence de l'Apostre, laquelle ie viens de lire deuant vous, a quelque chose de plus rayonnant que n'ont iuers autres endroits du Nouveau Testament. Et il est assés manifeste que cette splendeur extraordinaire laquelle vous y voyés répandue, vient de la grâde quantité de termes magnifiques que l'Apostre y a accumulés, & qui y brillent comme autant d'étoiles. Car il y parle *de la gloire du Seigneur*, il dit qu'il la *contemple comme en vn miroir*, & encore à *face découuerte*. Il dit que ceux qui la contemplent ainsi sont *transformés en la mesme image*; à quoy il adjoust que *c'est de gloire en gloire*; & en fin que cela se fait *comme de par l'Esprit du Seigneur*. Y a-t-il

aucun endroit de si petite étendue dans la parole de Dieu, où il se trouue ensemble plus de beaux mots, & qui mettent dans l'esprit de plus glorieuses idées? Et neantmoins lors qu'il est question d'examiner chacune de ces paroles à part, & d'en rechercher la propre signification, pour en composer le sens de la sentence, de telle sorte qu'on la puisse entendre bien exactement, elles mettent quelque espece d'éblouissement dans les esprits, qui empesche les interpretes de s'y accorder entierement en leurs sentimens, & de s'asseurer chacun en particulier d'en auoir exactement compris toute l'intelligence. Mais comme le desir de sçauoir, qui possede naturellement les esprits des hommes, leur a fait chercher des inuentions & des instrumens, par le moyen desquels ils s'ap-

prochent en quelque sorte des
 cieux pour en pouuoir mieux
 contempler les astres , & recon-
 noistre plus distinctement ces es-
 toiles qu'ils ne peuuent discerner
 autrement : Le zele dont nous
 deuons estre embrasés pour la
 gloire de Dieu , l'affection que
 nous deuons auoir à l'intelligence
 de l'Ecriture & à l'auancement
 de nostre salut, nous doit exciter
 à redoubler l'attention de nos
 esprits , à ce que par l'assistance
 de la grace du Seigneur , & par
 la force de la meditation , nous
 puissions approfondir, & mettre
 dans vn plein iour le sens de cet-
 te sentence & de ses semblables.
 C'est ce que ie me propose d'es-
 sayer , Dieu aydant , en cette
 action, en laquelle pour faire que
 le succès responde à mon inten-
 tion , ie vous demande que nous
 ioignons ensemble nos vœux,
 pour

pour obtenir l'Esprit de sapience
& de connoissance.

Il y a donc icy , mes Freres,
quatre choses principales à consi-
derer. Premièrement, quelle est
cette gloire de nostre Seigneur
dont l'Apostre parle , & ce que
c'est que la contempler à face dé-
couverte. Secondement, qui sont
ceux qui la contemplent ainsi, &
pourquoy S. Paul dit que cette
contemplation se fait comme en
vn miroir. En troisieme lieu,
comment il entend que ceux qui
contemplant la gloire du Sei-
gneur comme en vn miroir, sont
transformés en la mesme image
de gloire en gloire. Et en fin,
pourquoy il adjouste que c'est
comme de par l'Esprit du Sei-
gneur. Or quant à la premiere de
ces choses, ie vous ay dit dans le
Sermon que i'ay fait sur les paro-
les immediately precedentes,

Q

que ce nom de *seigneur* signifie ordinairement au Nouveau Testament la personne de Iesus Christ, & ie vous en ay déduit les raisons ; & la fuite du propos de l'Apostre monstre clairement que c'est en ce sens qu'il le prend en cette sentence. Et cela estant sans difficulté, ie n'y insisteray pas davantage. Mais pour ce qui est de *la gloire* du Seigneur, par ce que ce mot signifie diuerses choses en l'Ecriture, il sera bon de voir vn peu plus particulièrement de laquelle il est icy parlé. Communement ce mot de *la gloire de Christ*, signifie tant celle qu'il possède maintenant dans les lieux celestes, que la manifestation de

i. Pier. la dignité de sa personne & de la
i. II. divinité de sa vocation, par la resurrection d'entre les morts. C'est de cela que S. Pierre parle quand il dit, que *les Prophetes ont dili-*

gemment recherché quand & en quel temps l'Esprit Prophetique de Christ qui estoit en eux, declaroit les souffrances qui deuoient aduenir à Christ, & les gloires qui s'en deuoient ensuiure. Et nostre Seigneur Iesus au xvii. de S. Iean. *Pere, mon desir est touchant ceux lesquels tu m'as donnés, que là où ie suis ils soyent aussi avec moy, afin qu'ils contemplent ma gloire, laquelle tu m'as donnée.* Et S. Iean encore, au septieme du mesme Euangile: *Le S. Esprit n'estoit point encore donné, pour ce que Iesus n'estoit point encore glorifié:* dequoy il se pourroit produire vne infinité d'autres exemples. Mais il n'est pas question de cette gloire du Seigneur en cet endroit. Car ny les Apostres ny aucuns autres n'ont peu dire en cette vie qu'ils contemploient la gloire de nostre Seigneur Iesus Christ à face de-

Iean.

17. 24.

couuerte; cela n'estant donné si-
 non à ceux qui sont morts & re-
 cueillis dans le ciel. Et si S. E-
 stienne, peu deuant sa mort, a dit,
Voicy ie voy les cieux ouuerts, & le
Fils de l'homme estant à la dextre de
Dieu; ç'a esté vne chose non seu-
 lement rare, mais tout à fait sin-
 guliere à ce personnage, laquel-
 le consistoit en quelque transport
 extraordinaire de son esprit, &
 qui ne conuenoit pas à la dispen-
 sation ordinaire dont Dieu a vsé
 enuers les Apostres & les fideles
 icy bas. Et il ne faut pas faire non-
 plus autre iugement ny du ra-
 uissement de S. Paul au troisie-
 me ciel, ny des visions qui luy
 ont esté adressées à l'heure de sa
 conuersion, ny de celles que S.
 Iean a veuës au commencement
 del'Apocalypse, & qui estoient
 plustost des representations sym-
 boliques des vertus de nostre Sei-

gneur Iesus Christ , & de l'assistance de sa Prouidence au milieu de son Eglise , que des images de la gloire dont la personne est revestue & environnée à la dextre de son Pere. Que si quelcun disoit qu'il s'agist icy d'une contemplation qui se fait par les yeux de l'entendement , que la distance des lieux , & les espaces des airs , & l'interposition des spheres celestes n'empeschent pas , d'autant que l'ame s'eleue iusqu'ou il luy plaist , & qu'il ne se peut mettre d'obstacle au mouvement de sa pensée , il seroit aisé de luy répondre. Parce premierement que quelque idée que nous taschions de nous former en l'esprit pour nous figurer cette gloire de Iesus Christ , cela ne se peut pas appeler une contemplation à face découverte. Car si S. Paul en parlant mesmes des mysteres de l'E-

I. Cor.
13. 12.

vangile, dit que nous ne les voyõs maintenant *qu'obscurément* & comme en enigme, au lieu qu'au temps de la perfection que nous attendons, *nous verrons*, dit-il, *face à face*, comment diroit il icy que nous verrions dès maintenant *à face déconuerte* la gloire de Christ, de la nature de laquelle nous n'avons point de si claire revelation que des autres verités Euangeliques ? Puis apres, eussions nous de beaucoup plus claires représentations de cette gloire dans l'entendement, que nous n'en avons, tant y a que cela ne nous transforme point encore en la mesme image, & qu'il n'y a point transformé les Apostres tandis qu'ils ont esté icy bas, leur condition ayant plustost porté des marques de leur conformité à l'aneantissement de nostre Sauveur, que de la communication.

qu'ils deuoyēt quelque iour auoir de sa gloire.

Il n'est non plus icy question de la transfiguration de nostre Seigneur, qui s'appelle aussi quelquesfois de ce nom de gloire. Car S. Pierre en parle en ces termes.

Il auoit receu de Dieu le Pere honneur & gloire, quand vne telle voix luy fut enuoyée de la gloire magnifique, cettuy-cy est mon Fils bien-aimé auquel i'ay pris mon bon plaisir :

Et nous ouïsmes cette voix enuoyée du ciel, estans avec luy en la sainte montagne. Et de fait, si S. Paul appelle en ce chapitre icy la resplendeur de la face de Moyse, de ce nom de gloire, parce que c'estoit vne lumiere éclattante, & qui iettoit des rayons bien lumineux, on peut bien ainsi nommer en plus forts termes ce qui arriua alors à nostre Seigneur, puis que son visage y *deuint res-*

Matt.

17. 2.

*plendissant comme le Soleil, & que
ses vestemens y deuinrent blancs com-
me la lumiere.* Mais ny d'entre les
fidelles, qui n'ont point esté A-
postres, il n'y en eut iamais au-
cun qui ait veu cette gloire là,
excepté Moyse & Elie seulement,
ny d'entre les Apostres il n'y a eu
que Pierre & Iacques & Iean à
qui nostre Seigneur ait fait l'hon-
neur de les admettre à la contem-
pler. Encore ne nous est-il point
rapporté qu'ils ayent esté trans-
formés de mesme en la contem-
plant, & que cette gloire leur ait
esté communiquée.

Le vous ay déjà dit diuerses fois,
mes Freres, qu'il faut icy pren-
dre garde bien soigneusement à
l'opposition que S. Paul fait entre
nostre Seigneur & Moyse, dau-
tant que l'intelligence de tout son
propos dépend principalement de
là. Parce donques qu'il a parlé

de la gloire de la face de Moyse, il parle aussi de la gloire de nostre Seigneur, & parce qu'il considere Moyse comme type de nostre Seigneur, il veut que par la gloire du Seigneur nous entendions ce qui a esté figuré par la gloire, c'est à dire, par la resplendeur de la face de Moyse. Or ie vous ay déjà dit que ce sont les verités Evangeliques qui ont éclatté de la presence de Christ, & de sa manifestation en l'Vnivers. C'est la bonne nouvelle de sa naissance; c'est l'histoire de sa vie, de ses miracles, & de sa predication: ce sont ses sanglantes passions & sa glorieuse resurrection, comme elles nous sont rapportées en l'Evangile: c'est la merveille de son ascension dans les cieux, & de l'enuoy de son Esprit sur ses Apostres en la terre: C'est la doctrine de la iustification par la foy, &

de la sanctification par la Grace;
& de la predestination des eleus;
c'est celle de la vocation des Gentils,
& de l'établissement du règne de Iesus Christ en la terre,
c'est la claire manifestation de
l'esperance de la resurrection du
corps, & du iugement eternal;
c'est en vn mot la revelation des
secrets du royaume des cieux,
tant de ceux qui consistent en hi-
stoires, qu'en dogmes & en cere-
monies, qui compose cette gloire
dont il est icy parlé. Car de fait,
ce mot de gloire, en l'Ecriture,
signifie d'ordinaire non pas vne
sombre lueur qui s'écoule de quel-
que corps peu lumineux, mais
vne lumiere viue & abondante,
qui émane d'une source extraor-
dinairement belle & feconde,
& qui éclatte magnifiquement.
Autre est, dit Saint Paul, *la*
gloire du Soleil, & autre la gloire de

la Lune , & autre la gloire des étoiles ; & une étoile est différente de l'autre étoile en gloire. Termes qu'il n'employeroit pas volontiers s'il estoit question d'autre chose que des astres. Or si ce qu'est la lumiere corporelle aux yeux, cela est la reuelation de la verité à l'entendement, & derechef, si à proportion de ce que l'entendement est plus excellent que les sens du corps, les verités qui luy sont destinées pour objet, meritēt de plus beaux tiltres que ne fait la lumiere corporelle, ditès moy, Freres bien aimés, ces diuines verités dont ie viens de vous parler, ne deuroyent elles pas estre appellées de quelque autre nom plus glorieux que n'est celuy de la gloire mesme?

Quant à ce que dit S. Paul, que luy & quelques autres contemplant cette gloire à face décou-

uerte, il mérite d'estre pesé, & qu'on y considere les allusions que l'Apostre y fait à l'histoire du voile de Moyse. Et premieremēt, lors que Moyse ostoit son voile, ainsi que nous vous auons dit qu'il faisoit quand il remontoit en la montagne pour communiquer avec l'Eternel, il estoit capable d'estre veu; & si on ne le contemploit pas à l'heure qu'il auoit ainsi le visage découuert, la faute n'en estoit pas en l'obiet qui se rendoit alors tout à fait visible; elle estoit dans la foiblesse des yeux du peuple d'Israël seulement. L'Apostre veut donc dire icy que dans l'Euangile nostre Seigneur paroist toujours tel que Moyse estoit à l'heure qu'il ostoit son voile : tellement qu'il n'y a desormais rien, en ce qui est de la reuelation de l'object, qui empesche qu'on ne le puisse contempler

templer tout à son aise, & dans toute la plenitude de lumiere, dans toute la splendeur de verité dont estoit capable l'accomplissement des temps. Apres cela, lors que Moyse estoit déuoilé, il en voyoit mieux luy mesme, n'y ayant rien deuant ses yeux qui en empeschast l'action. Comme donc ie vous ay dit ailleurs que quand il auoit le voile sur son visage, il representoit en quelque égard la condition du peuple dont il estoit Mediateur, dautant que ce peuple là deuoit auoir vn voile sur les yeux de l'entendement qui l'empescheroit de reconnoistre la beauté des verités de l'Evangile ; ie vous diray aussi maintenant que S. Paul nous veut icy donner à entendre que ceux dont il parle sont d'une toute autre condition ; & que comme leur objet leur est clairement reuelé dans

l'Evangile, & mis deuant les yeux. tout a nu, ils n'ont plus auffi d'empeschement qui arreste les fonctions & les operations de leurs ames. Ainsi de costé & d'autre la reuelation & la contemplation se fait comme à face découuerte. En fin, ce mot de contempler a vne particuliere emphase. Car il signifie proprement vne veuë qui se fait par vne application & attentue & constante de l'organe & de la faculté de la veuë sur vn corps, ou lumineux, ou illuminé; tellement qu'une veuë foible & languissante, ou qui ne se fait qu'à passades, soit que l'objet s'enfuye de deuant nos yeux, cōme quand il y passe des éclairs, soit que nos yeux soyent obligés de se retirer souuent de dessus leur objet à cause de leur foiblesse ou de son trop grand éclat, cela ne s'appelle point cōtemplation.

Si donc quelques vns des Israélites ont entreueu quelque rayon de la face de Moysé, quand il en échappoit de dessous, on ne peut pas dire pour cela qu'ils l'ayent contemplée. Et si quelques vns des Israelites encore, ont, comme il n'en faut pas douter, apperceu dans les oracles de l'Ancien Testament quelque chose des doctrines de la Grace, il ne se peut pas dire que pour cela ils les ayent contemplées non plus. Car en la lecture de l'Ancien Testament, où les doctrines de la Loy, & celles de la Grace sont tellement meslées, que la Loy s'y rencontre beaucoup plus ordinairement, ils changeoyent d'objet tout aussi tost. Ou bien s'ils se vouloyent arrester vn peu fixement à la consideration de quelque endroit où reluisist vn peu extraordinairement vne doctrine Euangelique,

elle leur iettoit dans les yeux des rayons si éclattans & si brillans qu'ils ne les pouuoient soutenir long-temps, de sorte qu'ils estoient incontinent obligés de détourner leurs entendemens sur quelque matiere plus sombre. Au lieu que ceux dont parle S. Paul n'ayant deuant eux sinon vn seul & mesme obiet, toujours egal, toujours vniforme, & d'ailleurs ayant assés de force dans les yeux pour en supporter la lumiere, quelque brillante quelle soit, ils le contemplent attentivement & d'une veüe fermée & arrestée. Mais j'anticipe sur le second Point. Car ce mot de contempler n'est point dans l'original, sinon conjoint avec ces paroles, *comme en un miroir*, de sorte que S. Paul y dit en vn mot, mais beau & significatif, ce que nous exprimons en quatre. Voyons donc qui sont

ceux dont S. Paul parle, & comment ils contemplent cette gloire comme en vn miroir.

Il y a, mes Freres, trois diuerfes opinions sur l'interpretation de ces mots de *nous tous*. Car quelques vns estiment que l'Apostre, qui en diuerfes autres occasions fait opposition entre les Iuifs & les Gentils, veut en cet endroit signifier qu'à l'égard de ceux qui ont creu en nostre Seigneur Iesus Christ, cette difference est ostée. Tellement que quelque chose qui ait esté autrefois soit de Moysé, soit de son visage, ou du voile qu'il mettoit dessus, quelques diuers égards que cela ait peu auoir au peuple d'Israël, & aux diuers euenemens qui luy sont arriuez, tant y a que nostre Seigneur se montre par l'Eyangile indifferemment à tous, & que Iuifs & Gentils l'y peuuent contempler à

face découverte. En effect, comme Moÿse a esté le Mediateur du peuple d'Israël seulement, & non des autres nations, il a esté raisonnable que les choses de cette nature qui luy sont arrivées pour en signifier d'autres qui deuoient aduenir à ceux dont il estoit Mediateur, ne regardassent que ce peuple là non plus. Et au contraire, comme nostre Seigneur est le Mediateur de tous les peuples de l'Vniuers, rompant, ainsi, qu'il a fait, la barriere d'entre les Iuifs & les Gentils, il a deu se reueler & se communiquer à eux d'une façon toute semblable. Et c'est ce que dit S. Paul en quelque lieu, *qu'en Iesus Christ il n'y a ny*

Gal. 3. *Iuif ny Grec, & que ny Circoncision*

28. & 6. *ny Prepuce, n'y a aucune vertu.* Les autres croient que l'intention de l'Apostre est de designer par ces mots de *nous tous*, vniuerselle-

ment tous les fidelles , non seulement sans auoir aucun particulier égard à cette distinction de Iuifs & de Gentils, pour l'oster, mais mesme sans mettre aucune difference entre les diuerfes conditions des fidelles, soit qu'ils soyent Apostres, ou qu'ils ne le soyent pas. Les raisons sur lesquelles ils se fondent, sont, que si l'Apostre auoit dit simplement, *nous qui contemplons*, il pourroit sembler auoir voulu se designer avec ses compagnons en l'Apostolat, à qui Dieu auoit fait des graces tout à fait particulières. Mais que disant *nous tous*, il veut exprimer quelque chose de plus general. De plus, la chose mesme dont il parle semble le nous enseigner ainsi. Car puis qu'il est icy question de la revelation que Christ a faite de soy dans l'Evangile, n'est-ce pas vn mesme Evangile lequel est presenté à tous? Ne sont-ce pas les

mesmes Verités , & les mesmes secrets , qu'il nous a apportés du sein du Pere ? En fin , non seulement en ce qui est de la manifestation de l'object , mais encore en ce qui est de la constitution de ceux à qui il est offert , leur condition ne paroist pas differente. Car à tous les fidelles le voile qu'ils auoyent auparauant sur le cœur , a esté osté ; vn mesme Esprit leur a esté distribué , qui les rend tous capables de la contemplatió de la face du Seigneur , & de supporter l'éclat de sa gloire. Mais il y en a pourtant qui nonobstant toutes ces raisons estiment que proprement & directement il n'est icy parlé sinon des Apostres. Ils disent donc que dans tout le propos precedent l'Apostre n'a parlé que de luy & de ses compagnons , à qui le ministère de l'Esprit auoit esté com-

mis, & que c'est d'eux seuls, & non pas des fidelles en general, qu'il a fait opposition avec Moyse & son ministere. Ils adjouſtent que dans le commencement, & meſmes bien auant dans la ſuite du chapitre ſuiuant, il ne parle que d'eux ſeuls non plus, & que c'eſt vne choſe toute claire. *Pour cette cauſe, dit-il, ayant ce miniſtere ſelon la miſericorde que nous auons receuë, nous ne nous anonchalifſons point. Nous auons entierement re-jetté toutes cachettes de honte, nous ne cheminons point avec rufe; nous ne falſifions point la parole de Dieu.* Et ainſi dans les ſentences ſuiuantes. Cela donc qui va deuant, & ce qui vient apres encore, notoirement n'eſtant que d'eux, quelle apparence y a-t-il de prendre ce paſſage plus generalement, & de le détacher de leur contexture? L'Apôſtre a-t-il accouſtumé d'in-

terrompre ainſi ſes raifonnemēs,
& de ſauter ſans neceſſité d'un ſu-
jet à l'autre ? En eſſeēt, mes Fre-
res, c'en'eſt pas ſon ordinaire, &
la conſideration meſme de cette
parole, *nous contemplons comme en
un miroir*, pourroit bien confir-
mer cette derniere opinion, à
cauſe de ſon emphafe. Exami-
nons la donc vn peu.

Dans la veuë qui ſe fait des
obiets par le moyen des miroirs,
il ſe rencontre diuerſes choſes
leſquelles il faut diſtinguer, par
ce qu'il y en a quelques vnes qui
conuiennent à l'intention de S.
Paul en cet endroit, & quelques
autres qui s'en éloignent. Pre-
mierement, dans les miroirs, à
proprement parler, on ne void
pas les choſes meſmes, mais ſeu-
lement leurs images. Car quand
vous ne voyés point le viſage
d'un hōme ſinon par la reflexion

de ce qui s'en reçoit dans vn miroir, c'est a peu près cōme si vous ne le consideriés qu'en son portrait. Et s'il s'estoit trouué moyen de fixer dans les miroirs ces representations naturelles des choses qui s'y reçoient, ce seroit comme vne espee de peinture. Or y a-t-il bien de la difference entre voir la chose & voir son portrait, & n'y a personne qui ne reconnoisse que la veüe de la chose mesme est incomparablement plus auantageuse. C'est pourquoy le mesme S. Paul nous voulant donner à entendre combien la connoissance que nous auons des mysteres du royaume des cieux icy bas, est obscure & imparfaite, au prix de celle que nous esperons auoir & que nous aurons effectiuement dans le ciel, dit que *nous voyons maintenant* 1. Cor. *par vn miroir obscurement*, mais ^{13.}

qu'alors nous verrons face à face. Icy tant s'en faut qu'il oppose voir face à face, & voir par un miroir, comme choses tresdifferentes, qu'au contraire il les conioint, & de ceux là mesmes dont il dit qu'ils contemplent *comme dans un miroir*, il dit aussi qu'ils contemplent *à face découverte*. De plus, il arriue ie ne sçay comment, mais tant y a qu'il arriue, que la connoissance des choses que l'on n'acquiert sinon par l'entremise des miroirs, ne s'attache pas ordinairement bien fort à l'esprit. Mais comme si les miroirs communiquoyent à nos esprits quelque chose de leur nature, nous recevons bien fort prontement & fort nettement à la verité l'impression de ce qu'ils nous mettent deuant les yeux, mais elle s'efface tout aussi tost que le miroir est osté : ainsi que le miroir mesme
reçoit

reçoit avec vne facilité & vne netteté admirable l'image de ce qu'on met deuant; mais elle n'y demeure qu'autant de temps que l'object est là présent; l'object osté, il n'en reste pas vne seule trace. Et c'est ce que S. Iacques Iacq. 1.
23. 24. a remarqué en ce passage où il dit, *que si quelqu'un écoute la parole, & ne la met point en effect, il est semblable à l'homme qui considere en un miroir sa face naturelle. Parce que s'estant considéré soy mesme, & s'en estant allé, il a aussi tost oublié quel il estoit.* Icy tout au contraire S. Paul parle d'une contemplation qui a vne telle force d'imprimer dans l'esprit l'idée de ce que lon contemple, que tant s'en faut qu'elle s'efface ou qu'elle s'évanouisse tout aussitost, que ne se contentant pas d'y demeurer fixe & permanente, elle le transforme en la mesme image de gloire en

S

gloire. Ce n'est donc pas à l'égard des defauts qui se trouuent en cette sorte de veüe , que S. Paul parle icy de la façon. Mais aussi d'autre costé , quoy que ce soit que l'on voye dans vn miroir, si la glace du miroir est bonne, on l'y void tres-distinctement, de sorte que pour ce qui est de la netteté des lineamens, & de la viuacité des couleurs, & de la proportion des parties, il n'y a que peu ou point de difference entre cela & la chose mesme. Tellement que si, comme ie vous disois tantost, on auoit trouué le moyen d'arrester & de rendre permanentes les images des choses dans les miroirs, mesmes en l'absence des objets, toutes les autres peintures n'eseroient rien en comparaison, pour ce qui est de la naïveté de la representation, & de son exactitude. Après cela, si cette

forte de contemplation a ce defaut, que les idées des choses qu'elle met dans nos esprits, s'arrestent en leur surface, d'ou elles s'écoulent facilement, il semble qu'il y ait aussi, soit dans les miroirs quelques attraits, soit dans nos esprits quelques inclinations, qui nous obligent ou a auoir toujours les yeux dessus, quand nous en auons quelcun deuant nous, où à les y ramener souuent, si nous ne les y pouuons pas tenir toujours fixes. De sorte qu'en fin, si nous auons toujours exposé à nostre veüe vn miroir qui nous representast vn bel objet, l'assiduité de le contempler nous en imprimeroit l'idée bien profondement en l'imagination; ce qui estant conioint avec la naïueté de la representation, nous en aurions par ce moyen vne tres-exacte & tres-parfaite connoissance. Et c'est

à cette occasion que l'Apostre parle maintenant ainsi.

Or est il bien vray , mes Freres, pour retourner deormais à mon propos , que si vous faites comparaison de la connoissance que nous auons des Verités Evangeliques , avec ce peu de lumiere que les fidelles Israëlites en ont peu auoir autresfois , certes nous pouuons bien dire que *nous tous* , tant que nous sommes , qui auons veritablement creu en nostre Seigneur Iesus Christ, contemplons sa gloire à face decouverte , & comme dans vn miroir. Car quelle proportion y a-t-il entre leur condition en cet égard & la nostre ? Mais si nous nous comparons avec les Apostres , ie pense que vous m'auoüerés qu'il y a vne tres-grande difference entre nos connoissances & leurs revelatiõs , & que cette grande abondance de sapience qui leur a esté commu-

niquée par l'enuoy du S. Esprit, & par tant d'inspirations, tant de diuines visions qui leur ont esté adressées, surpasse de bien loin la mesure d'intelligence que Dieu distribué à ses fidelles ordinairement. De sorte qu'ils peuuent bien auoir dit en beaucoup plus forts termes que nous ne le pouuons dire quant à nous, qu'ils ont veu la gloire du Seigneur à face découverte, & comme dans un miroir, & s'attribuer en cet égard quelque notable prerogatiue. Si donc on entend cela des Apostres, il faudra rendre la raison pourquoy S. Paul a employé ce mot de *tous*, & on en pourra alleguer deux différentes. Car on peut dire premierement, que S. Paul estant celuy qui escriuoit cette Epistre, il a voulu s'expliquer en telle sorte qu'il n'y eust aucun qui peust soupçonner qu'il voulust en

cela s'auantager par dessus ses compagnons , & s'attribuer en cet égard quelque priuilege qu'ils n'eussent pas. Estant, comme ie le vous ay representé au commencement, exposé aux mauvais discours des hommes , & y ayant par tout des gens qui ne cherchoient que les occasions de le choquer, il a deu autant qu'il a peu aller au deuant de leurs mauuaises pensées , & leur retrancher tout sujet de penser de luy autrement qu'il ne falloit. Et vous sçaués que dans les choses où il a quelque auantage , comme dans la quantité de ses trauaux , & la grandeur & multitude des dangers qu'il a courus, & l'excellence de ses reuelations , & la mieuille de ses rauissemens & de ses visions , lors que pour maintenir l'autorité de son Apostolat il est obligé de s'en vanter , il ne le fait

qu'avec toute la circonspection & toutes les precautions imaginables. Où donques il est d'un mesme rang avec les autres, & où il ne se veut rien attribuer par dessuseux, sa prudence le peut bien avoir induit à employer quelque tel mot qui le donnast ainsi à entendre. On peut dire en second lieu qu'il s'est serui de ce terme *de nous tous*, expressément afin de se mettre du nombre de ceux qui contemplent la gloire de nostre Seigneur Iesus de la sorte, & qu'aucun ne vint à estimer qu'il y fust inferieur à ses compagnons. Car vous sçaués, mes Freres, comment ses ennemis auoyent accoustumé d'éleuer les autres Apostres au dessus de luy. Les autres Apostres auoyēt veu nostre Seigneur Iesus de leurs yeux pendant le temps de son économie en la terre, & auoyent

conuersé familièrement avec luy.
Quelques vns d'entr'eux auoyent
veu sa transfiguration en la mon-
tagne, & auoyent esté témoins
de la gloire dont il y auoit res-
plendi. Il s'estoit apparu diuer-
ses fois à eux apres sa resurre-
ction, & leur auoit déployé de-
uant les yeux les enseignes de sa
victoire. C'estoit en leur presen-
ce qu'il auoit esté élevé au ciel, &
qu'il estoit allé prendre possession
de son royaume en magnificence.
C'estoit sur eux que le S. Esprit
estoit descendu le iour de la Pen-
tecoste, afin de les rendre capa-
bles d'exercer la charge que no-
stre Seigneur leur auoit donnée,
d'estre les témoins autentiques
de sa resurrection en tout l'Uni-
uers. Et dautant que S. Paul n'a-
uoit point esté de leur nombre
lors que toutes ces choses leur
sont arriuées, ses aduersaires luy

ostoyent autant qu'ils pouuoient la gloire de l'Apostolat. Il veut donc dire que tout cela n'empesche pas qu'il ne se puisse vanter de voir & de contempler la gloire de Christ tout à découuert, parce que la contemplation dont il parle, gist en la connoissance des secrets de l'Euangile, dont nostre Seigneur Iesus Christ luy auoit donné vne telle reuelation, qu'en cela il n'estoit en rien inferieur aux autres Apostres. Parce que s'ils auoyent eu toutes les prerogatiues dont ie viens de vous parler; la façon de laquelle il auoit esté appellé quant à luy, les occasions ausquelles il auoit veu le Seigneur, les exstases desquelles il auoit esté transporté, les diuerses visions qui luy auoyent esté adressées, son rauissement iusques dans le troisieme ciel, & sur tout, la communication extraordinaire

de l'Esprit de Christ, qui luy auoit esté très-liberalement dispensé, recompensoit assés ces défauts qu'on luy reprochoit, & s'il n'en estoit eleué au dessus, au moins certes en estoit il mis à l'égal des plus excellens Apostres.

Dans le troisieme point de nostre propos, nous auons deliberé de voir ce que c'est qu'estre *transformé en la mesme image; de gloire en gloire*; & icy encore il faut obseruer les allusions que l'Apostre fait à l'histoire de Moyse, & la difference qu'il veut mettre entre ce grand Prophete & Christ. Moyse, comme nous auons veu ailleurs, auoit bien receu dans son visage vne admirable impression de lumiere par la communication qu'il auoit eüe avec Dieu; mais il n'auoit point avec cela receu la faculté de pouuoir communiquer cette lumiere là aux

autres. Tellement que si les Israélites l'eussent peu contempler, & qu'ils eussent eu dans les yeux assés de force pour cela, ils en eussent bien peu recevoir & de l'admiration, & du contentement tout ensemble. Car c'estoit vn spectacle auquel il n'y auoit iamais rien eu de pareil. Mais leur visage n'en eust pas changé pourtant, & leur peau n'en fust pas deuenüe plus radieuse. En ce qui est de la contemplation de la gloire de Iesus Christ, il en va tout autrement. Car elle se communique à ceux qui la regardent attentiuement, & les transforme comme il est dit icy, en la mesme image. C'est à dire, qu'elle s'imprime de telle façon en eux, qu'ils en deuiennent eux mesmes resplendissans, & qu'ils representēt en leurs personnes, la splendeur du visage de celuy qu'ils ont re-

gardé: de maniere que comme la Lune deuient en quelque sorte semblable au Soleil, & se transforme en son image, quand elle le void en son plein, ceux dont S. Paul parle en cet endroit deuiennēt semblables à Iesus Christ, parce qu'ils le contemplent en face. Et la raison de cela n'est pas malaisée à rendre. Vn homme comme Moyse, qui n'estoit simplement qu'homme, a bien peu de la communication extraordinaire laquelle il a eüe avec Dieu, tirer cette participation de gloire qui l'a rendu rayonnant: mais il n'en a pas peu tirer la vertu de rendre les autres rayonnans de mesmes. Car cette lumiere n'estoit pas en luy comme en sa source, mais par communication, & comme par emprunt seulement. Au lieu que Christ estant Dieu benit eternellement, a bien tiré la
la

la gloire dont nous parlons , de la communication qu'il a eue avec son Pere ; mais c'est en telle sorte pourtant qu'elle luy est intime & essentielle , & qu'elle est en luy comme en son principe , estant, comme il est , la *Lumiere* , & la *Verité*. De sorte qu'il l'a peu tellement répandre sur ceux qui l'ont contemplé, qu'ils en sont devenus luisans eux mesmes , & que par vne espece de reflexion & de rejaillissement , ils en ont illuminé ce qui s'est trouué alentour d'eux. Et cela, mes Freres, sert à confirmer l'opinion de ceux qui croient qu'il est icy question des Apostres proprement. Car il est certain que ce sont eux qui de la contemplation de la gloire de nostre Seigneur , & de la reuelation qu'il leur a donnée de son E-uangile , sont devenus si lumineux , que ç'a esté par leur clarté,

T

qu'ils auoyent receuë de Christ, que tout le monde a esté illuminé autrefois, & que maintenant encore se dissipent les tenebres de l'ignorance & de l'erreur dont les ames des hommes seroyent autrement remplies. Et c'est ce que S. Paul dit au chapitre suiuant,

2. Cor. *Dieu, dit-il, qui a dit que la lumie-*
 4. 6. *re resplendist les tenebres, est celuy*
qui a relui en nos cœurs, pour don-
ner illumination de la connoissance
de la gloire de Dieu, laquelle est en
la face de Iesus Christ. Qui peut
 douter qu'il ne regarde en ces pa-
 roles à l'histoire de Moyse, &
 qu'il ne die que Dieu a tellement
 resplendi par la vertu & par les
 reuelations de son Esprit dans
 l'entendement de luy & de ses
 compagnons, qu'ils ont contem-
 plé la gloire de Dieu, laquelle
 paroist, non plus dans la face de
 Moyse, mais dans celle de Iesus :

Christ, & qu'ils en ont esté illuminés non pour leur vſage & pour leur ſalut particulier ſeulement, mais pour en donner auſſi l'illumination autres ? Il veut donc dire que Moyſe n'a point dequoy ſe vanter de ſes auantages ſur luy & ſur ſes compagnons. Parce que ſ'il a veu la face de Dieu, ils ont contemplé celle de Chriſt, qui eſt Dieu benit eternellement, égal à ſon Pere. Si le viſage de Moyſe en eſt deuenu reſplendiſſant, ils ont eſté transformés en la meſme image de la gloire de Chriſt. Si les rayons de la face de Moyſe ont éclatté tout autour de luy, l'irradiation qu'ils ont receuë de la gloire de Chriſt, les a rendus capables d'en épandre le ſplendeur par tout le monde. Or cela, comme vous voyés, conuient incomparablement mieux aux Apôtres, qu'à aucuns autres.

Ce que S. Paul adjouste que cette transformation se fait *de gloire en gloire*, merite d'estre consideré. Quelques vns estiment qu'il a voulu donner à entendre que la communication que Christ nous donne de sa gloire icy bas, fera suiuite de la participation de celle de là haut ; la gloire, dis-je, qui gist en connoissance, de celle qui consistera quelque iour en magnificence d'estat & de condition. Eneffect, tous ceux qui connoissent nostre Seigneur d'une connoissance viue & efficace, reçoient ces deux bien faits de sa communion. L'un, que dès cette vie il remplit leurs ames de la lumiere de sa verité ; l'autre, que quelque iour il remplira leurs corps de felicité & de gloire. Et ce mesme Apostre appelle le changement que la communication de la lumiere de la verité de

Christ apporte en nos esprits, de ce nom de transformation: *soyez,* dit-il, *transformés par le renouvellement de vostre entendement:* par ce qu'en penetrant toutes les parties de nos ames, cette diuine clarté leur donne comme vn nouvel estre, & au lieu des tenebres de peché lesquelles y regnoient, elle y fera reluire la beauté de la sainteté & de la iustice. Et derechef il nomme la glorification de nos corps de ce nom de *transfiguration*, qui est en cet endroit là de semblable signification, & à peu près de meisme force. *Il trans-* Phil. 3.
figurera, dit-il, *nostre corps abject* 21.
& vil, afin qu'il soit rendu conforme à son corps glorieux. Parce que cette admirable vertu laquelle il y déployera, changera tellement toute la constitution de nos corps, qu'au lieu de ces qualités terriennes, & corruptibles, & tenebreu-

ses, dont ils sont maintenant reuestus, elle les reuestira de qualités lumineuses, incorruptibles, & celestes. Mais bien que tout cela soit vray, il ne s'ensuit pas pour tant que ce soit l'intention de l'Apostre de le dire en ce passage. La plus commune opinion des interpretes est que cette façon de parler, où vn mesme mot est reputé de la sorte, signifie les progrès & l'augmentation d'une chose de degré en degré, tellement que de petis commencemens elle va continuellement en s'auançant. Et ils ont accoustumé de confirmer cela par ce passage du Pseaume où nous chantons, *De force en force ils marcheront*, où ils pensent que le Prophete represente le courage des fidelles qui montent pour le seruice de Dieu en Sion, & qui tant s'en faut qu'ils manquent de vigueur par la longueur du chemin,

que mesmes ils sont plus alaigres
& plus dispos lors qu'ils arriuent
vers la fin de leur voyage. Et
posé que cela soit, S. Paul aura
voulu dire icy que luy & ses com-
pagnons, depuis qu'ils ont com-
mencé à estre transformés en l'i-
mage de nostre Seigneur Iesus
par la contemplation de sa face,
ont toujours eu nouuel accroisse-
mēt de reuelatiōs, & qu'ils se sont
continuellement auancés en con-
noissance. Si les reuelations des
Apostres ont accru de temps
en temps, & si vers la fin de leur
ministere ils estoient plus enten-
dus dans les secrets du royaume
des cieux qu'au commencement,
c'est chose qu'il n'est pas besoin
que nous examinions mainte-
nant. Tant y a que depuis que
nostre Seigneur leur eut enuoyé
le S. Esprit d'enhaut, ils ont pres-
ché l'Euangile avec vne pleine

certitude de verité, & vne merveilleuse euidence. Mais i'estime que qui considerera la chose de prés, trouvera que cette façon de parler n'a pas toujours cet vsage là, & que l'Apostre saint Paul a eu icy quelque autre pësée. Quand on dit que quelque chose demeure *de generation en generation*, on n'entend pas que la generation qui suit soit plus grande que la precedente; mais on veut seulement signifier la continuation de la chose & sa perseuerance. Quand il est dit que les Israe-

M. 34. *lites vont de bande en bande pour se presenter denant Dieu en Sion; ce n'est pas à dire que les dernieres bandes soyent plus grandes que les premieres, mais seulement que dans les chemins qui conduisent vers Sion, il y a tant de peuple qui chemine, que ce sont comme de perpetuelles proces-*

sions , qui se touchent les vnes les autres. Et si lon aime mieux suivre la Version des septante Grecs qui ont traduit là *de force en force*, cela peut bien signifier que le courage & la vigueur de ceux dont il parle , ne leur manque point. Car celuy à qui la vigueur vient à manquer , marche *de force en foiblesse*. Mais celuy qui se maintient , marche de la force en laquelle il a commencé , en la force qui luy continuë. S. Paul au chapitre premier de l'Epistre aux Romains , dit que dans l'Evangelie *se reuele tout à plein la iustice de Dieu de foy en foy* ; ce qui semble encore signifier vne foy constante & perseuerante. Car il allegue incessamment ce passage d'Habacuc ; *Or le iuste viura de foy* , dans lequel l'auteur de l'Epistre aux Hebreux à remarqué , que la foy à laquelle la vie est promise , doit

Rom. i.

17.

Heb.
10. 36.
37. 38.

estre ferme & permanente, *Vous*
aués, dit-il, *besoin de patience*, afin
qu'ayans fait la volonté de Dieu vous
en rapportiés la promesse. Car enco-
re tant soit peu de temps, & celui qui
doit venir viendra, & ne tardera
point. Or le iuste viura de foy; mais
si quelcun se soustrait, c'est à dire,
tire le pied en arriere, & ne perse-
uere pas en la foy, *mon ame ne*
prend point plaisir en luy. Suiuant
ce stile, estre transformé en la
mesme image de gloire en gloire,
est estre rendu participant d'une
gloire qui ne s'esteind & ne se dis-
sipe pas, mais qui demeure tou-
jours vniforme. Et en cela est en-
core contenuë vne fort belle op-
position à l'histoire de Moysé.
Car cette resplendeur de son vi-
sage, qu'il tira de la contempla-
tion de la face de Dieu, & que
l'Écriture appelle gloire, dura
bien quelque temps à la verité,

mais elle s'éuanouït pourtant à la fin, & n'y a point d'apparence qu'elle ait persisté pendant tous les quarante ans que le peuple fut au desert sous la conduite de ce Prophete. Le miracle de la manne, & peut estre encore celuy de l'eau qui decoula du Rocher, ont duré vn fort long tēps, parce qu'il estoit ainsi necessaire pour la subsistance du peuple. Mais celuy cy n'estant point absolument necessaire pour cela, n'a pas deu estre si durable. Et de fait apres cet endroit du trante-quatrieme chapitre de l'Exode où il nous est rapporté, il n'y en a dans l'histoire de Moysé aucune trace. Quant à ce qui est de la gloire en laquelle les Apostres ont esté transformés en contemplant celle du Seigneur, il n'en est pas de mesme. Cette merueilleuse connoissance que le Seigneur leur

a donnée des myſteres de ſon E-
vangile , ces incomparables re-
uelations dont il a rempli leurs
eſprits , cette lumiere de verité
dont il a éclairé leur intelligence,
les a aſſiſtés iuſques à la fin de
leurs iours , & a relui & en eux,
& autour d'eux , durant tout le
temps de leur ſejour en la terre,
En quoy vous voyés que leur
gloire a vn grand auantage par
deſſus celle de Moyſe , & que leurs
inſpirations ont eſté beaucoup
plus excellentes que n'eſtoient
celles des Prophetes. Car les en-
thouſiaſmes des Prophetes eſ-
toient ordinairement tels , mes
Freres , que c'eſtoient comme
des éclairs qui leur paſſoyent par
l'entendement ; de ſorte que
quand le rauifſement eſtoit paſſé,
& que l'Eſprit auoit ceſſé d'agir
en eux , ils redeuenoyent tels
qu'ils eſtoient auparauant , &
quasi

quasi semblables aux autres fideles. Et s'il est arriué que l'impression de l'Esprit ait duré quelque temps assés considerable en eux, si est-ce qu'ils n'en estoient pas toujours également éclairés pourtant, & qu'ils auoyent besoin ou de consulter la bouche de l'Eternel, ou d'attendre que sa main & son Esprit fust sur eux, quand il se presentoit quelque nouvelle occasion où leur instruction estoit necessaire. Mais quant aux Apostres, la façon de laquelle Dieu les a inspirés & illuminés a esté si admirable, qu'elle n'est point allée & venue par accès & par interualles, elle n'a point souffert d'éclipses ny d'obscurissemens, elle ne les a iamais laissés hesiter sur les doctrines qu'ils ont deu enseigner à l'Eglise, elle leur a esté toujours presente lors qu'il a fallu dénouer quelque no-

table difficulté , ou donner quelque conseil dans vne matiere importante ; en vn mot, elle a esté comme vn œil incessamment ouuert, ou comme vne Raison qui ne s'endort iamais , & qui ayant vne clarté & vne force tout à fait extraordinaire , est toujours presté à toutes sortes d'objets , pour les concevoir , pour les contempler , pour en appercevoir tous les égards & en approfondir toutes les beautés , & pour y former des raisonnemens d'une indubitable verité , & d'une infaillible iustesse. Dequoy l'Apostre rend la raison en disant que c'est comme de par l'Esprit du Seigneur.

Ce mot de *comme* , mes Freres, n'a pas esté icy employé par nostre Apostre pour donner à entendre que cette transformation de luy & de ses compagnons , en l'image de la gloire de Iesus Christ,

a quelque ressemblance avec les effets que produisent les operations de l'Esprit de Dieu, encore que ce ne soit pas l'Esprit de Dieu qui en soit veritablement la cause. Au contraire, il veut dire qu'il ne faut pas trouver étrange vn si grand & si merueilleux effect, puis que la cause en est l'Esprit de nostre Seigneur, qui fait toutes les choses qu'il luy plaist avec vne facilité entierement incomprehensible. Car c'est l'emphase de ce mot de *comme* en diuerses occurrences. Au dernier verset du chapitre immédiatement precedent, S. Pauls'est serui deux fois de ce terme en ce sens, en disant: *Nous ne sommes point maquignons de la Parole de Dieu, comme plusieurs, mais nous parlons touchant Christ comme en sincerité, & comme de par Dieu, deuant Dieu.* Car là il veut affirmer

auec toute l'efficace qui se peut, que c'est & en sincerité, & de par Dieu qu'il parle. S. Iean s'en sert de mesme en cette belle sentence, qui a, pour ce qui est des termes, & des personnes dont il s'agit, beaucoup de ressemblance avec celle-cy. *Nous auons contemplé sa gloire, voire vne gloire comme de l'vnique issu du Pere.* Car là aussi S. Iean veut enseigner que ç'a esté par la contemplation de sa gloire, que Christ a esté reconnu pour l'vnique issu du Pere, d'autant qu'il n'y auoit que le seul Fils vnique de Dieu qui en peust auoir vne telle, & qui portast des marques si indubitables de la diuinité du sujet d'où elle resplendissoit. De fait, que ç'ait esté l'Esprit de nostre Seigneur Iesus qui a esté la cause de cette transformation des Apostres, & la source d'où ils ont puisé toutes ces admirables

Jean I.

142

connoiffâces qu'ils ont puis apres
répanduës en tout l'Vniuers, l'E-
vangile le nous apprend, leur hi-
stoire le nous confirme, & leur
propre confession en rend vn té-
moignage tres-authentique. Christ
le leur promet ainsi en l'Evangi-
le selon S. Iean. *Quand celuy là* Iean 16.
sera venu, à sçauoir l'Esprit de Ve- 13. 14.
rité, il vous conduira en toute verité:
car il ne parlera point de par soy mes-
me; mais il dira tout ce qu'il aura ouï,
& vous annoncera les choses à venir.
Vous sçaués comment l'histoire
de l'accomplissémēt de cette pro-
messe nous est rapportée au se-
cond chapitre du livre des Actes,
& que le iour de la Pentecoste,
qui suiuit immédiatement l'As-
cension de nostre Seigneur, le
Saint Esprit avec son descieux, &
distribution de langues de feu,
descendit sur les Apostres, & les
remplit des mysteres de l'Euan-

gile, & de la faculté de parler divers langages, afin de s'en expliquer à toutes sortes de nations.

Et quoy que S. Paul n'y fust pas present; voicy pourtant commēt il parle de foy au commencement de la premiere Epistre qu'il écrit

1. Cor.

2. 7. 8.

2.

à l'Eglise de Corinthe. *Nous proposons la sapience de Dieu qui est en mystere, c'est à dire cachée; que Dieu auoit ia deuant tous les siecles déterminée à nostre gloire. Laquelle nul des Princes de ce siecle n'a connuë; car s'ils l'eussent connuë, iamais ils n'eussent crucifié le Seigneur de gloire. Mais ainsi qu'il est écrit, ce sont les choses qu'œil n'a point vues, ny oreille ouïes, & qui ne sont point montées en cœur d'homme, que Dieu a préparées à ceux qui l'aiment. Mais Dieu les nous a reuelées par son Esprit: car l'Esprit sonde toutes choses, voire mesme les choses profondes de Dieu. Et certes, mes Freres, il*

falloit bien que ce fust le S. Esprit qui les leur reuelast, & qui transformast ainsi leurs entendemens de tenebres en lumiere, puisque non seulement les mysteres de l'E-uangile auoyent esté inconnus & aux yeux, & aux oreilles, & au cœur des hommes iusques alors, ainsi que S. Paul en atteste là, mais mesmes qu'il estoit absolument impossible que la Raison les peust deuiner, & que les hommes y peussent atteindre sous sa conduite. Car quoy ? Comment la considererons nous ? Corrompuë, ou en son entier ? Si nous la considerons comme corrompuë, l'experience de tous les siecles a montré de quoy elle estoit capable, & quel a esté le succès de ses efforts quand en matiere de Religion elle a voulu essayer d'introduire quelque nouvelle lumiere au monde. L'erreur, l'idolatrie, la

superstition, la phrenesie & l'ex-
trauagance, sans conter ce qui s'y
est meslé de l'artifice des demons,
ont esté le fruit des productions
del'intelligence humaine en cette
matiere. Et maintenant encore,
en cette grande lumiere de l'E-
vangile, en cette grande splen-
deur de la gloire de la predica-
tion, tant s'en faut que la Raison
de l'homme, gastée comme el-
le est, ait esté capable de rien in-
uenter de tel, qu'elle ne l'est pas
mesmes de recevoir ces diuines
verités, ny de les comprendre.
Si nous la considerons en son en-
tier, où la prendrons nous? En
quel lieu du genre humain en re-
ste-t-il quelque fibre, ou quelque
trace? Le peché ne s'est il pas éga-
lement emparé de l'esprit de tous
les mortels? Et qui est-ce qui s'est
exempté des tenebres qu'il a ap-
portées avec soy, excepté le seul

Redempteur du monde ? Mais posé le cas que dans quelque Isle éloignée de la connoissance des autres humains, Dieu creast quelque homme d'un nouveau sang, & qu'il le doüast des mesmes facultés dont il pourueut Adam lors qu'il luy donna son estre, ie dis que sans vne extraordinaire & miraculeuse revelation des cieux, quelque effort d'esprit qu'il peust faire, il ne sauroit trouuer la moindre partie du mystere de pieté, soit que vous le considériés dans l'histoire de nostre Sauueur, soit que vous le regardiés dans les doctrines qui en dépendent, & dans les Promesses qui l'accompagnent. Je diray plus. Luy mist on, non la Loy de Moysé seulement, mais tout le Vieux Testament entre les mains, quelque attention qu'il y apportast, il ne pourroit parfaitement y demesler

les principes de l'Evangile d'auec l'alliance de la Loy , & quand il les auroit demeslés , il ne sçau- roit de la consideration de si petis commencemens , paruenir par la voye du raisonnement à la moindre de ces merueilles dont la gloire du Seigneur est maintenant composée en l'Evangile. Car tout l'Evangile est bien contenu dans les oracles de l'Ancien Testament , mais c'est comme les grands arbres sont contenus dans leurs semences. Qui n'auroit iamaïs veu aucun effect de la puissance & de la merueille de la Nature en la production des plantes , deuinerait il ce qui doit sortir d'une noix , les fruits, les feuillages, le tronc d'un grand arbre tout entier , la distribution de ses racines & de ses branches ? C'a donc esté , & ç'a d'eu estre côme de par l'Esprit du Seigneur, que les Apo-

stres ont esté ainsi transformés, mais S. Paul a encore voulu dire icy quelque chose dauantage.

Le vous ay déjà aduertis diuer-
ses fois, mes Freres, qu'à peine
l'Apostre a-t-il écrit vn mot icy
sans ietter vn trait de ses yeux sur
l'histoire de ce qui est arriué au
visage de Moyse. Il ne nous est
point expressément rapporté com-
ment ce miracle se fit en luy, seu-
lement est il dit que *la peau de sa*
face estoit deuenue resplendissante
pendant qu'il parloit avec Dieu, &
cela sans qu'il s'en apperceust.
C'est à dire, que cette lumiere qui
s'imprima sur son visage, estoit
seulement comme vne resplen-
deur de celle dont Dieu est na-
turellement enuironné, & à peu
prés comme si le Soleil luisoit
sur vn corps capable de recevoir
ses rayons, & de les renvoyer
par vne reflexion éclattante. Et

Exod.
34. 29.

neantmoins , pour faire que la peau du visage de Moyse retint ces rayons , & les reflechist lors mesme qu'il n'estoit plus en la presence de Dieu , il fallut qu'il se deployast en luy quelque vertu de la puissance divine. Car de soy mesme la constitution naturelle de la peau du visage de l'homme n'est pas telle , qu'elle puisse garder vne telle impression tant soit peu longtemps. Or encore qu'en cette admirable & incomprehensible économie des personnes de la glorieuse Trinité , celle qu'on nomme le S. Esprit soit creuë estre , comme elle est véritablement , la vertu laquelle est commune aux deux autres , & par qui elles executent leurs volontés , & accomplissent leurs ouvrages , si est-ce que cette sorte d'opérations qui ne se déploient que sur le corps , pour en alterer

alterer la constitution naturelle par l'impression de quelque telle qualité , n'ont pas accoustumé de s'attribuer à l'Esprit de nostre Seigneur en l'Ecriture. C'est d'ordinaire sur les ames que l'Esprit de Dieu est dit agir; & cōme c'est vn sujet beaucoup plus excellent que non pas le corps, aussi ses operations y sont elles beaucoup plus nobles. Et c'est vne cōsideration de laquelle S. Paul pretend tirer encore de l'auātage à la gloire de sō ministere. Adioustés à cela que ces paroles, *cōme de par l'Esprit du Seigneur*, iointes immediatemēt à celles là, *de gloire en gloire*, ont vne particuliere emphase. Car cette vertu, quelle qu'elle fust, qui arresta ces rayons de lumiere sur la peau de la face de Moyse, cessa d'agir quand elle eut fait sō effect. De sorte que cette resplendeur ayant duré quel-

que temps, autant comme il estoit necessaire, soit pour donner au peuple d'Israël les instructions dont il estoit capable alors, soit pour servir de type & de representation pour ce qui devoit arriver apres plusieurs siecles, elle s'effaçà peu à peu, & disparut en fin tout à fait, & le visage du Prophete retourna à sa constitution naturelle. Mais quant aux operations de l'Esprit de nostre Seigneur, elles ont accoustumé d'estre considerées comme beaucoup plus constantes. Car soit, comme il est tres-vray, que dès la premiere impression qu'il fait de ces nouvelles qualités qu'il insinüe dans les ames, son operation soit plus profonde, & penetre beaucoup plus avant qu'en n'est leur surface, au lieu que ce fut la partie exterieure de la peau qui seule devint lumineuse au visage de

Moyse , tellement qu'elle se rende maistresse des principes mesmes de la Nature , & qu'elle les empesche de preualoir avec le temps : soit que l'action mesme & l'inspiration de l'Esprit se renouuelle de temps en temps, pour reparer les traits & les caracteres de ces nouuelles qualitez que les principes de la nature effaceroyēt peu à peu ; tant y a que là où l'Esprit de nostre Seigneur a déployé sa vertu , les habitudes dont il reuest les entendemens où il agit, ont accoustumé d'estre permanentes. Il est bien vray qu'il faut distinguer entre les graces extraordinaires & miraculeuses de l'Esprit de Dieu , dont la dispensation est aucunement plus libre & plus indeterminée à diuerses sortes de sujets ; & ses graces ordinaires & salutaires, dont il a déterminé la distribution à ses éleus

seulement. Car quant à celles cy, on en peut dire en beaucoup plus forts termes que des autres ; que

Rom. *les dons & la vocation de Dieu sont*
 19. II. *sans repentance* : parce qu'ayant absolument resolu dans son conseil eternal, d'amener ses élus à la jouissance du salut sans qu'il se puisse rencontrer chose quelconque qui empesche & qui arreste l'exécution de son dessein, ou bien il se rend tellement maistre de leurs cœurs dès la premiere fois qu'il s'y loge, qu'il oste à leur corruption naturelle toute puissance de se rebeller ; ou s'il permet au peché de causer quelque tumulte dans leurs pensées, & de produire dans leurs affectiōs quelque rebellion contre luy, il renforce de iour en iour l'entendement par de nouvelles illuminations, & inspire quelque vigueur au nouvel homme pour

combattre avec succès contre le vieil. Au lieu que la communication des graces extraordinaires & miraculeuses ne dependant pas du principe de l'election, ny du conseil arresté d'amener necessairement à salut ceux à qui elles sont données, mais seulement de la volonté de les rendre utiles à l'édification de la gloire de nostre Seigneur, leur continuation & perseuerance en vn suiet, n'est pas d'une necessité si absolument ineuitable. Mais dans les Apostres de nostre Seigneur ces deux differentes sortes de dons ont esté conioints d'une liaison indissoluble. Parce que comme Dieu auoit de toute eternité resolu de les amener à salut comme élus, il auoit aussi arresté de se seruir d'eux pendant tout le temps de leur vie, comme d'Apostres de son Fils, pour l'établir.

fement de son Eglise en la terre. Tellement que ces admirablemēt belles reuelations qu'il leur donnoit en qualité d'Apostres, pour l'instruction de l'Vniuers, & cette viue illumination par laquelle il les persuadoit des verités Evangeliques en qualité d'élus pour leur propre salut eternal, estoient de telle sorte meslées en eux, que non seulement il estoit impossible qu'elles s'y separassent en effect, mais mesmes il estoit tres-difficile de les y distinguer par la pensée. Voila pourquoy dans ce passage que ie vous ay desja allegué vne autre fois, S. Paul ayāt cité les paroles de Dauid, *I'ay creu,* & *pource ay-ie parlé*, il adiousté incontinent; *aussi croyons nous,* & *pourtant parlons-nous*, attribuant la Parole, qui est indubitablement celle de la predication par laquelle les Apostres seruoient à

2. Cor.
4. 13.

l'edification de l'Eglise de Dieu, à la foy, qui neantmoins leur auoit esté donnée pour leur propre salut a eux mesmes. En effect, mes Freres, la connoissance, la sapience, la reuelation qui leur auoit esté donnée en qualité d'Apostres, & la foy, l'illumination, la persuation des verités salutaires qui leur auoit esté communiquée en qualité d'éleus, sont égalemēt appellées de ce nom de lumiere en l'Ecriture. Or quand deux lumieres se meslent ensemble, bien qu'elles partent de deux principes, comme il arriue au plein de la Lune sur le coucher du soleil, & que peutestre elles font deux diuerses ombres, si estce qu'elles se penetrent tellement l'une l'autre, & qu'elles penetrent & remplissent tellemēt l'air dans lequel elles se reçoient comme dans leur sujet, qu'il n'y a œil d'hom-

me viuant qui les puisse discerner, ny mesmes subtilité d'entendement qui puisse nettement conceuoir la distinction qu'elles gardent entre elles dans leur meslange. Encore donques qu'il y ait quelque difference ou de principe ou de nature entre ces deux sortes de grace & de lumiere qui ont esté communiquées aux Apostres, à l'égard de ces deux diuerses relations, si estce que dans leurs esprits elles donnoient si peu de marques de leur distinction, que tant s'en faut qu'aucun autre la y peust apperceuoir, qu'elle n'estoit pas sensible ny reconnoissable à eux mesmes. Et quoy que les effectz qu'elles produisoient fussent en cela differens, qu'en qualité d'Apostres ils procuroyent le salut d'autrui, & en qualité d'éleus & de fidelles ils seruoient au leur propre; si estce

que la distinction de la cause en estoit absolument imperceptible. Aussi voyés vous que nostre Seigneur les exhortant à auoir *la foy* Marc 11. 22. *de Dieu*; en quoy il a sans doute principalement égard à celle qui 23. 23. embrasse les promesses de Dieu à salut; il adiousté incontinent vne parole qui regarde directement la foy qui a pour objet les promesses particulieres de faire des choses extraordinaires & miraculeuses. *En verité ie vous dis que quiconque dira à cette montagne, Enleue toy & te iette en la mer; & ne fera point de difficulté en son cœur, mais croira que ce qu'il dit se fera; tout ce qu'il aura dit luy sera fait.* Puis il les conioint toutes deux dans les paroles suiuentes. *Pourtant vous dije que tout ce que vous demanderés en priant, croyés que vous le receurés, & il vous sera fait*: par ce qu'à leur égard ces

deux fortes de foy estoyent comme si elles n'en eussent composé qu'une.

Telle estant, mes Freres, l'operation de l'Esprit de Christ en celuy de ses Apostres, vous voyés aisement combien elle a esté plus illustre & plus glorieuse, que n'a esté celle de la vertu qui a rendu autrefois le visage de Moyse resplendissant : parce que l'effect en a esté permanent, au lieu que la gloire de la face de Moyse a esté de peu de durée. Et ie ne sçay si ce mot mesme de *transformer* n'a point esté icy employé par S. Paul, pour continuer ses allusions & les tacites oppositions qu'il a voulu faire de luy & de ses compagnons, à l'histoire de ce Prophete. Parce que comme ie le vous ay desja remarqué, il ny auoit que la peau du visage de Moyse qui resplendist : la vertu.

qui l'auoit ainsi rendu rayonnant n'auoit pas passé plus auant dans l'interieur, & n'y auoit apporté aucun changement en la constitution de son estre. Encoré cette lumiere qui s'estoit attachée à son exterieur, ne s'estoit elle point fait sentir; ce qui monstre qu'elle n'auoit produit aucun effect fort considerable en la personne. Car les grandes mutations sont sensibles à ceux en qui elles se font, & leur donnent des mouuemens ou de volupté, ou de douleur, ou de tristesse, ou de ioye, seló la nature de leur actiõ, & des causes qui les produisent. Mais icy l'Apostre nous parle d'une *transformation* c'est à dire d'une metamorphose, car c'est le mot dót il se sert en l'original, laquelle donne vne nouvelle nature à tout son estre. Parce qu'encore qu'elle n'ait point changé la substance de son esprit,

si estce qu'elle en a tellement re-
fondu toutes les puissances, elle
en a tellement changé toutes les
habitudes & les qualités, elle en
a tellement pénétré toutes les
parties, que si Christ eust aboli
son premier estre pour luy en
créer vn tout nouveau, le chan-
gement n'eust pas esté plus émer-
ueillable. Et de là est venu qu'en-
core que les Chrestiens ayent
beaucoup mieux reconnu la mer-
veille de cette transformation,
que les Israelites n'ont apperceu
la splendeur du visage de Moyse,
parce que les effects de l'Aposto-
lat par lesquels il s'est signalé en
tant de diuines predications, en
tant d'actions miraculeuses, en
tant de choses qui ont présenté
sujet d'estonnement à tout le
monde, ont esté beaucoup plus
capables de se faire estimer &
admirer, que non pas quelques
rayons

rayons de clarté qui éclattoient du visage de ce Prophete, si estce que ce n'est pas de là principalement que les Apostres ont reconnu ce qu'ils estoient. La merueille de leurs connoissances, les mouuemens heroïques de leurs cœurs, la paix dont leurs consciences estoient remplies, la ioye inenarrable & glorieuse qui les transportoit, les eleuations admirables que l'Esprit de Dieu leur donnoit, les diuers langages qu'ils parloyent, & les autres choses de cette nature, ne les laissoient point douter qu'ils ne fussent de tout autres hommes qu'ils n'auoyent esté auparauant. Et ces paroles mesmes de S. Paul, *Nous tous qui contemplons comme en un miroir la gloire du Seigneur à face découuerte, sommes transformés en la mesme image de gloire en gloire, comme de par l'Esprit du Seigneur,* ont ie ne

fçay quel air de grandeur & de majesté dans lequel vous lifés assés, comme ie croy, le sentiment que ce grand homme auoit de soy mesme.

De toutes les choses que vous aués entenduës, mes Freres, il est aisé de recueillir vne doctrine que l'Apostre S. Paul a disertement affirmée dans les passages precedens : c'est qu'encore que le ministère de la Loy ait esté glorieux, si estce que celuy de l'Euangile surpasse de beaucoup en gloire. S'il falloit comparer Mediateur à Mediateur, c'est à dire, Moysé à Iesus Christ, & tirer de là vn argument de l'inegalité qui se trouue entre les alliances qu'ils ont establies, personne ne hesiteroit à prononcer que l'auantage de l'Euangile est merueilleusement grand, puis que Iesus Christ est Dieu benit eternellement, &

que l'autre n'a esté qu'un homme. Icy la comparaison se fait d'homme à homme seulement, à sçavoir de Moyse avec les Apostres de Iesus Christ, en quoy cette inégalité semble estre beaucoup moins apparente. Neantmoins, qui considerera la chose de prés, troupera que l'Evangile de nostre Seigneur y en a d'autant plus d'avantage. Car Moyse estoit le Mediateur de l'alliance legale, ce qui estoit la plus haute dignité qu'en cette ancienne économie un homme pouvoit avoir apres Dieu : & les Apostres n'ont point esté mediateurs de l'alliance de l'Evangile, mais seulement ministres de Iesus Christ, qui seul en a esté Moyenneur. Si donc la gloire du ministère de Moyse, dont la resplendeur de son visage estoit un emblème & un argument, est de beaucoup inferieure à celle des

Apostres de Iesus Christ, il est plus que manifeste que la Loy de laquelle Moyse estoit le Mediateur parmy la nation des Iuifs, est d'une incôparablement moindre dignité que n'est la doctrine de salut, dont les Apostres n'ont esté sinon les ministres, & les herauts, & les annonciateurs par toute la terre. En effect, la dignité d'une charge ayant son principal fondement, & sa principale racine dans l'excellence du suiet sur lequel on en exerce les fonctions, il faut que là où les charges sont absolument inegales en dignité, il y ait à proportion de l'inegalité en l'excellence des sujets mesmes. Certainement, mes Freres, quand nous ne comparerions ces deux alliances sinon selon les auantages que les Apostres ont eus par dessus Moyse, & que S. Paul nous donne icy

l'occasion de remarquer, la comparaison se trouueroit merueilleusement disproportionnée. Moyse a en quelque sorte veu la face de Dieu : mais les Apostres ont contemplé celle de Iesus Christ beaucoup plus à decouvert ; & Iesus Christ est Dieu benit eternellement, égal à son Pere. Moyse a tiré de la contemplation de l'Eternel quelque notable communication de gloire, pour ce qui estoit de son corps : & les Apostres ont tiré de celle de Christ vne admirable cōmunication de lumieres & de connoissances, pour ce qui estoit de leurs esprits. Moyse n'a eu que la peau du visage lumineuse, & les Apostres n'ont eu aucune partie de leurs ames qui n'ait esté transformée en l'image de Christ. La gloire de Moyse s'est effacée & n'a duré que peu de temps ; au lieu que

celle des Apostres a esté durable & permanente. Ce qui a esté vn augure indubitable de la diuerse condition de ces deux diuerses alliances: c'est que la Loy deuoit prendre fin, & son lustre se deuoit ternir, au lieu que la splendeur de Iesus Christ est eternelle.

Heb. 2.
2. 3.

si donc, comme dit l'Apostre, la parole prononcée, soit par Moÿse, soit par les Anges a esté ferme, & toute transgression a receu iuste retribution: Comment échaperons nous si nous venons à mespriser vn si grand salut, lequel ayant premierement commencé d'estre déclaré par le Seigneur, nous a esté confirmé par ceux qui l'auoyent ouï, ou qui auoyent contemplé sa gloire? Et c'est là la premiere instruction que nous auons à tirer de ces paroles.

Mais encore que nous en ayons en quelque sorte restreint l'interpretation aux Apostres seulemēt,

ce n'est pas à dire pourtant qu'elles ne nous regardent point, ou que nous n'en puissions recueillir d'autres enseignemens qui seruēt à l'edification & à la consolation de nos consciences. Car ie vous prie, mes Freres, n'auons nous pas aussi sujet de nous vanter, quoy que ce ne soit pas en si forts termes que S. Paul, d'auoir contemplé la gloire du Seigneur à face decouuerte ? Nostre Seigneur a-t-il mis vn voile sur son visage quand il est descendu des cieux pour nous ? Ses Apostres ont ils couuert ses verités de quelque nuage d'obscurité, qui nous empesche de les pouuoir considerer dans leur splendeur naturelle ? Reste-t-il encore maintenant dans leurs écrits quelque chose des doctrines & des instructions de la Loy, qui ombrage la doctrine de la Grace & la bonne nouuelle de

salut ? Nous ont-ils celé quelque chose du conseil de Dieu pour ne le nous mettre pas deuant les yeux dans vne pleine euidence ? Et puis que le Seigneur Iesus est non tant portraict que viuant dans leur predication , qu'en quelque endroit que nous ouurions leurs diuines histoires , quelque passage que nous lisons de leurs diuines Epistres , quelque texte que les ministres de l'Euangile nous en traittent en nous enseignant publiquement , nous le rencontrons qui se presente à nos yeux , qui se fait ouïr à nos oreilles , & qui nous découure amiablement toutes les gloires de sa face auguste & rayonnante, auons nous à nous plaindre que ce diuin objet ne nous ait pas esté reuelé , ou qu'il ne nous soit apparu qu'enveloppé d'enigmes & de tenebres ? Nos peres certes eussét esté mieux

fondés que nous à faire de telles plaintes, lors que les docteurs de Rome ne leur entonnoyent aux oreilles autre chose que la Loy, qu'ils n'amusoient leurs esprits qu'à des bagatelles de ceremonies, qu'ils ne les entretenoyent que des fables de la vie des saints, ou que s'ils rapportoyent quelque chose de veritable de leur histoire, c'estoit comme pour étouffer la memoire du nom de Christ, que lon ne reconnoissoit plus parmy la foule de tât de nouveaux Moyenneurs, de tant de nouveaux Redempteurs, dont on auoit perpetuellement les images deuant les yeux à contempler, & la recommandation qui retentissoit dans les Temples. Mais maintenant, mes Freres, que Dieu a dissipé toutes ces tenebres là, qu'il a mis en pieces le voile qui nous cachoit le Seigneur

Iesus, & qu'il s'est présenté à nous comme tout de nouveau en ces derniers temps, par la reformation de sa Religion, & par la predication pure & lumineuse de sa parole, il n'y a rien qui nous arreste que nous ne le puissions considerer attentiuement, & que nous ne foyons, au moins certes en quelque notable degré, transformés en la même image. Et nous le sommes veritablement, si nous ne portons point le nom de Chrestiens à fausses enseignes. Son Euangile a éclairé nos entendemens, son Euangile a irradié nos cœurs, son Euangile a illuminé & reformé toutes les puissances de nos ames. Et cela nous est venu de la communication de son Esprit, qui nous a rendus capables de recevoir l'impression de cette lumiere celeste. Ce n'est pas que nous nous vantions ny

de reuelations femblables à celles des Prophetes, ny de rauiffemens femblables à ceux des Apoftres, ny de ces inspirations extraordinaires que les hommes de Dieu ont senties pour deuenir eux memes si radieux qu'ils ont rempli de lumiere le rond de la terre habitable. L'Esprit du Seigneur qui nous a esté donné ne consiste pas en ces choses. Il consiste en ce que sa vertu a ouuert les yeux de nos entendemens à ce que la lumiere de l'Euangile y resplendist, & qu'il les a tellement renforcés qu'ils en ont peu soutenir l'éclat, il les a tellement arrestés sur leur objet, & le leur a fait contempler si fixement & si constamment, qu'il n'en à pas illuminé la superficie seulement, il y a penetré bien auant, il s'y est incorporé avec eux, de sorte que desormais ce n'est pas vne clarté passagere,

& qui s'enuole d'elle meſme, ou qui ſe laiſſe ſurmonter par les tenebres naturelles de nos cœurs, c'eſt vne lumiere fixe, c'eſt vne ſplendeur permanente, c'eſt vne transformation qui demeure de gloire en gloire. Et ie m'aſſeure mes Freres, que vous le trouués ainſi au dedans de vous, & que le ſentiment que vous en aués ſurpaſſe encore de bien loin l'efficace de mes paroles. Car quoy ? Quand vous vous comparés avec le temps de voſtre ignorance, ou ſi Dieu vous a fait la grace de naiſtre au milieu de ſon Eglise, & d'y receuoir les inſtructions de ſa Parole dès le berceau, quand vous vous comparés avec ceux que vous voyés maintenant giſans ſous les tenebres de l'erreur & de l'ignorance, ne vous ſemble-t-il pas que vous eſtes comme ceux qui ſont clairuoyans, au milieu
d'une

d'une multitude innombrable de misérables aveugles? Ils tastonnent, & vous marchés seurement; ils s'égarent, & vous suiuez les sentiers de l'Eternel; ils ne savent où ils vont, & vous connoissés distinctement le but auquel vous tendés & la voye qui y meine; ils sont en de continuelles allarmes, & vous possédés vos ames en paix; la detresse & l'angoisse, & l'horreur du iugement de Dieu les tient saisis, & vous vous éjouissés en la connoissance de Christ d'une ioye inenarrable & glorieuse. Or comme les Apostres ont esté tellement transformés en l'image de Christ, que leur illumination n'a pas esté pour eux seulement, mais aussi pour la communiquer aux autres, selon ce que dit S. Paul au passage que ie vous ay déjà allégué, que *Dieu a relui en leurs cœurs, afin qu'ils donnassent illumi-*

nation de la connoissance de la gloire de Dieu, laquelle est & paroist *en la face de Iesus Christ*, nostre deuoir est, à chacun selon sa vocation, & selon la mesure de la grace de Dieu en luy, de tascher à épandre & à semer cette belle lumiere en la terre. Et premierement, c'est aux ministres de Iesus Christ, qu'il a appellés d'une façon particuliere à imiter ses Apostres en cela, c'est di-je aux ministres de l'Euangile, qui doiuent auoir le visage plus radieux de la connoissance du Seigneur, & de la contemplation continuelle de sa gloire, à reluire par les predications publiques, & par les instructions particulieres selon les occasions, & à écarter par les rayons de leurs bons enseignemens, les tenebres de l'ignorance du monde. Car ils sont en ce siecle icy comme des astres dans la

nuit. Les Apostres y ont esté comme des Planetes , c'est à dire, comme des étoiles beaucoup plus lumineuses, & plus éclatantes, & qui n'auoyent point de station arrestée, mais alloient deçà delà, où la Prouidence de Dieu les conduisoit , porter la connoissance du nom de nostre Seigneur Iesus, & la lumiere de la vie. Les Ministres ordinaires y sont comme ce que l'on appelle ordinairement étoiles fixes, c'est à dire, comme des feux beaucoup moins luifans, & mesmes d'une differente grandeur entr'eux, attachés en certains endroits , pour y épandre leur clarté, autant que s'estend la circonference de leurs Eglises. Mais quoy qu'il en soit, ce sont des feux pourtant , que Dieu a expressément allumés afin qu'ils éclairent entre les hommes. Aussi nostre Seigneur les a-t-il autrefois repre-

sentés , au commencement de l'Apocalypse, par des étoiles qu'il a dans la main , qu'il contemple, qu'il protege , qu'il soustient , mais qu'il secouëra pourtant, si elles ne luisent d'un feu bien pur & bien lumineux en la terre. Apres cela , c'est aux fides , de quelque condition qu'ils soyent, à s'efforcer de contribuer quelque chose à l'illumination des autres. Car encore qu'ils ne soyent pas appelés à monter en chaire , ny à faire les fonctions publiques du saint ministère, c'est à eux tous pourtant que S. Paul parle en la personne des Philippiens , quand il leur dit qu'ils reluisent *comme*

Phil. 2. *flambeaux au monde , qui portent au*
15. *devant d'eux la parole de vie.* Les conversatiōs familières, les diuer-
ses occurrences de la vie , les affli-
ctions des uns , les prosperités des
autres, & les differens accidens

qui arriuent à tous generalmente, presentent vne infinité d'occasions où les fidelles de Iesus Christ doiuent faire paroistre les instructions qu'ils ont apprises en son Ecole. Car ce n'est pas en discours oiseux, & destitués de sel & de grace, & beaucoup moins en discours sales & corrompus, ou en profanetés contre la Parole de Dieu, & en blasphemies contre Dieu mesme, que se doiuent consumer les entretiens que les Chrestiens ont entr'eux. Ce doit estre en paroles d'edification, de consolation, & d'instruction de nostre Seigneur, & qui tournent à la gloire de son grand nom, & au salut eternal des hommes. En fin, nostre deuoir est à tous, de quelque qualité, de quelque condition, de quelque sexe que nous soyons, de penser sans cesse à ces paroles & à cette

exhortation du Seigneur Iesus.

Vous estes, dit-il, la lumiere du monde ; On n'allume point la chandelle
 Matth. 5. 13. 14. *pour la mettre sous le boisseau, mais*
 15. *sur le chandelier, & elle éclaire à tous ceux qui sont en la maison. Ainsi relaise vostre lumiere deuant les hommes, afin qu'ils voyent vos bonnes œuvres, & qu'ils glorifient vostre pere qui est aux cieux. Car ce commandement nous regarde tous, sans distinction & sans difference. Rendons donc, Freres bien aimés, nostre conuersation digne de la vocation à laquelle nous sommes appellés, & de la connoissance que Dieu nous a donnée de sa verité celeste. Que cette gloire de la face du Fils de Dieu qui s'est imprimée en nos entendemens, & qui nous a transformés en son image, resplendisse sur les paroles de nos bouches, & sur les actions de nos mains, &*

que toute la conduite de nostre
sejour icy bas en soit rayonnante.

Que la vie de chacun de nous
éclatte en iustice & en sainteté;
que de toutes parts on voye éclai-
rer au milieu de nous les flam-
mes de la charité, & que de ces
lumieres particulieres se forme
vne diuine splendeur, dont tout
le corps de l'Eglise iette les rayons
tout alentour, au milieu des tene-
bres de ce present siecle. De là,
plus que d'aucune autre chose,
resultera la gloire de nostre grand
Dieu; de là naistra l'estonnement
& l'admiration des hommes: de
là s'épanouïra la ioye & le con-
tentement des gens de bien: de là
en fin, comme d'une marque in-
dubitable tant de nostre élection
eternelle, que de nostre iustifica-
tion, germera l'attente de la bien-
heureuse immortalité, qui rem-
plira nos ames d'une paix laquel-

le surmonte tout entendement,
 iusques a ce que nous voyions
 tout à fait éclore nos esperan-
 ces, & que nous en cueillions le
 fruit en la participation de la gloi-
 re du Sauueur du monde. A luy
 qui nous en a donné les promes-
 ses, & qui par l'efficace de sa gra-
 ce nous en fait sauourer les auant-
 gousts en nos cœurs, à luy, di-je,
 comme au Pere & au Saint Esprit,
 vn seul Dieu benit eternellement,
 soit gloire, force, & empire, dès
 maintenant & à toute eternité :
 A M E N.

F I N.



Handwritten text at the top right corner, possibly a date or page number.

Handwritten text along the right margin, possibly a page number or a reference.

7-2-2



